

**Josephi Jacobi Plenck ... Doctrina de morbis venereis ... / [Joseph Jacob Plenck].**

**Contributors**

Plenck, Joseph Jacob, Ritter von, 1738-1807.

**Publication/Creation**

Viennæ : Apud R. Græffer, 1779.

**Persistent URL**

<https://wellcomecollection.org/works/pbhpcfct>


**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>




F. ix  
18/p

7/6



Digitized by the Internet Archive  
in 2019 with funding from  
Wellcome Library

<https://archive.org/details/b30533375>



JOSEPHI JACOBI PLENCK,

CHIRURGIÆ Doctoris, nec non Chirurgiæ, Anatomæ, atque Artis obstetriciæ Professoris Regii,  
publici ac ordinarii in Regia Universitate Budensi.

ho: Howell.

1830. D O C T R I N A

D E

MORBIS VENEREIS.

---

Nullum credo potentius esse effrenis libidinis antidotum,  
quam si quis miserrimas illas vulgivagæ veneris victimas,  
in nosocomiis ad hujus morbi curam institutis collectas,  
contempletur attentius.

VAN SWIETEN.

---



VIENNÆ,

APUD RUDOLPHUM GRÆFFER.

---

M D C C L X X I X.



V I R O  
ILLUSTRI ATQUE EXPERIENTISSIMO  
AUGUSTO GOTTLIEB  
R I C H T E R,  
MEDICINÆ AC CHIRURGIÆ DOCTORI


E. T  
PROFESSORI PUBLICO ORDINARIO  
IN ACADEMIA REGIA GOTTINGENSIS

P R Ä S I D I  
COLLEGII CHIRURGORUM

REGIÆ ACADEMIÆ SCIENTIARUM GOT-  
TINGENSIS ET STOCKHOLMENSIS,  
NEC NON SOCIETATIS MEDICÆ HAF-  
NIENSIS MEMBRO,

*operam hancce in devindissimi animi testimonium  
consecrat*

A U C T O R.



---

---

## P R A E F A T I O.

NULLAM nostro ævo ægritudinem haud solum populosis in urbibus, verum quoque in agrestis populi tabernis, lue venerea esse frequentiorem, quemque medentium salutiferæ artis exercitium docet. Hinc concinne admodum *Doctissimus*, ac *Illusterrimus L. B. de STÖRCK* popularem hunc morbum perpetuam & occulte serpentem appellat pestem, qua præstantissimi sæpe homines jam in ætatis flore aut reipublicæ eripiuntur, aut adeo mutilantur, ut pleaque ad negotia inhabiles fiant. Imo cum vera pestis raro, venerea autem perpetuo furat, hinc cum *Illustri MEADIO* nullus dubito, genus humanum dudum jam viru venereo fuisse extinctum, nisi ejus furor, quo primum nostris invehebatur regionibus, sponte remisisset ac invento antidoto mitigatus fuisset.

HABET enim teterimus hicce morbus id cum reliquis contagiis commune, ut una solum sufficiat femina immunda pluribus contaminandis familiis, pagis, societatibus, cuius rei mul-

## P R A E F A T I O.

ta de nutriciis venereis apud authores prostat  
observatio.

**A C C E D I T**, quod lues hæc non raro seræ  
quoque sobolis progeniei inhærere consuescat,  
morbosque causet larvatos, quorum diagnosis  
accuratio persæpe medentes eludit. Lues  
demum ipsa vix plures, quam male adhibitum  
medicinæ genus pessundat; quivis enim idiota,  
tonsor, anus curationem horum ægrorum clan-  
cule suscipit, cum miseros hos ægrotos, vagi  
amoris consciens, chirurgum medicumve hone-  
stum consulere, intempestive pudeat.

Has ob rationes singulo anno scholaftico  
peculiarem de morbis siphyliticis cursum, quem  
hic exhibeo, auditoribus meis tradere suevi.  
Methodum meam, gummoso hydrargyro mor-  
bum hunc sanandi, quam anno 1766 cum publi-  
co communicavi, iterum iterumque commendo;  
non ex pruritu inventoris nomine gloriandi aut  
libidine celeberrimis in arte viris contradicendi,  
quæ insania ingratitudoque longe ab animo meo  
abest, sed ex tredecim annorum praxi, qui-  
bus hanc methodum venereis quamplurimis

## P R A E F A T I O.

feliciter adhibui; quosve alia præparata mercuralia tardius, periculosius aut penitus non curarunt. Pericula demum exteris in regionibus ut in *Anglia* \*) *Gallia* \*\*) *Suecia* \*\*\*) aliisque in locis a Clarissimis viris cum mercurio gummoso instituta me de efficacia methodi meæ luem curandi confirmarunt.

UT autem mercurium gummosum ex omnibus præparatis mercurialibus pro usu interno efficacissimum tutissimumque inveni, ita mercurii sublimati corrosivi solutionem aquosam pro usu externo ad ulcera pessima inveteratamque gonorrhæam sanandam deprehendi utilissimam; adeo ut his duobus remediis in solo nosocomio, quod Budæ ad praxim chirurgicam demonstran-

---

\*) *A new and easy method of giving mercury by J. PLENCK. — translated from the latin by W. SAUNDERS. 3 Edit. Lond. 1772.*

\*\*) *Méthode nouvelle d'administrer le vif-argent — ouvrage traduit du latin de M. PLENCK par M. LAFITZ à Nancy.*

\*\*\*) *Abb. der Schwedischen Akad. 32. Band. 291. S. ODHELIUS Versuche mit Mercurio gummoso.*

## P R A E F A T I O.

dam , a duobus jam annis consignatum habeo ,  
ultra centum ægrotos , labe celtica contami-  
natos , coram meis auditoribus sanitati integer-  
rimæ restituerim .

Q U I D demum præter commodum pro aca-  
demicis prælectionibus ordinem in hoc opuscu-  
lo præstiterim judicent alii .





## ELENCHUS CONTENTORUM.

---

De morbis venereis generatim.

### MORBI MEMBRI VIRILIS.

Gonorrhæa.

Dysuria.

Ischuria.

Vesiculæ crystallinæ.

Tubercula penis.

Ulcera glandis.

Cancer glandis.

Ulcera urethræ.

Phymosis.

Paraphymosis.

Priapismus.

Satyriasis.

Curvatura penis.

Impotentia virilis.

### MORBI TESTICULORUM.

Testiculorum inflammatio.

— induratio.

Ulcera scroti.

### MORBI GLANDULÆ PROSTATAE

Prostatæ inflammatio.

— abscessus.

— scirrus.

## MORBI PERINÆI ET ANI.

**Fistula perinæi.**

— ani.

**Arctura ani.****Condylomata.**

## M O R B I . I N G U I N U M.

**Bubones.****Physconia.**

## M O R B I C U T A N E I.

**Maculæ.****Scabies.****Rhagades.****Psydracia.****Herpes.****Tinea.****Alopecia.****Unguium corruptio.****Pruritus.****Lepra.****Ulcera.**

## M O R B I O C U L O R U M.

**Ophthalmia.****Lippitudo.****Corneæ macula.**

— ulcus.

Hypopyum.

Fistula lachrymalis.

Hordeolum.

Cataracta.

Amaurosis.

### M O R B I   A U R I U M.

Cophosis.

Otorrhœa.

### M O R B I   N A R I U M.

Coryza

Ozæna.

Deformitas nasi.

Paraphonia.

### M O R B I   O R I S.

Aphthæ.

Ulcera palati.

Scabies menti.

### M O R B I   C O L L I   E T   F A U C I U M.

Scrophulæ.

Angina.

### M O R B I   O S S I U M.

Tophus.

Hyperostosis.

Caries.

Spina ventosa.

Mollities.

Fragilitas.

## MORBI ARTICULATIONUM.

Ganglia.

Anchylosis.

## MORBI VENEREI MULIERUM.

---

### MORBI GENITALIUM MULIEBRIUM.

Leucorrhæa.

Phlogofis genitalium.

Induratio genitalium.

Ulcera vulvæ.

--- vaginae.

## M O R B I U T E R I.

Menostasia.

Exulceratio uteri.

Tympanites uteri.

## M O R B I M A M M A R U M.

Mammarum inflammatio.

--- ulcus.

--- carcinoma.

## MORBI VENEREI INTERNI.

## F E B R E S V E N E R E A E.

- Venerea simplex.
- exanthematica.
- inflammatoria.
- Lenta
- biliosa.
- Intermittens,

## S P A S M I

- Tetanus.
- Epilepsia.

## A D Y N A M I A E.

- Languor.
- Paraplegia.
- Hemiplegia.

## D O L O R E S.

- Cephalæa.
- Agrypnia.
- Pleurodine.
- Colica.
- Arthritis.
- Rheumatismus.
- Ischias.
- Osteocopus.

Dyspnœa.

Tussis.

Raucitas.

### P R O F L U V I A.

Ptyalismus.

Tenesmus.

Proctorrhæa.

Pyuria.

### E M A C I A T I O N E S.

Atrophia.

Tabes.

Phthyfis.

\* \* \*

De lue gravidarum.

--- --- infantum.


--- --- latente.

--- --- larvata.

--- --- complicata.

--- luis prophylaxi.

Formulæ medicamentorum.





## D E

### MORBIS VENEREIS GENERATIM.

**M**orbi qui a *viru venereo* excitantur, *veneri* dicuntur.

*Classis CHRISTOPHORI COLUMBI* anno 1493  
hoc virus ex insulis Americanis in Euro-  
pam tulit. A)

---

\* Sunt equidem plures Authores, ut BECKETUS & SANCHES, qui contendunt luem venereum in Italia & Gallia multo fuisse antiquorem, quam COLUMBI redditum ex America. Idem WEIDMANUS de Germania putat. At scriptores seculi XIV & XV solummodo de morbis & ulceribus penis scripserunt, quæ homines luxuriosi ex concubitu cum femina leprosa vel alio vitio immunda, contraxerunt. Nam hæc mala erant topica, nunquam in luem venereum abibant ac sine mercurio sanabantur. Lues venereæ veræ tanta erat crudelitas, ut nunquam tot medicorum, qui ante COLUMBI redditum scripserunt, notitiam fugisset, aut absque nomine proprio mansisset, si ante hæc tempora in Europa dominata fuisset. V. Cel. ASTRUC lib. de morb. veneris, Tom. II.

Inde in obsidione Neapolitana hoc virus adeo vulgatum fuit, ut ab exercitu obsidentium *malum Gallicum* ab obfessis *Neapolitanum*, ab iis qui ex America novum malum Hispanil adtulerunt, *Hispanicum* dictum sit. \*)

Videtur virus venercum degeneratio esse morbi Americani *Yaws* dicti, insulis Antillis potissimum endemii.

Hunc morbum aliud clima exasperavit, ut etiam nostro ævo venerea lues eo sævior sit, quo regio magis ad septentriones vergit. \*\*)

\*) Alii hanc luem *siphylidem* vocant a **SIPHYLO**, qui regis **ALCITHOI** greges pascens, illorum numero & pulchritudine superbus soli insultavit, ad cuius superbiam puniendam imissa fingitur in terram dira lues. V. *Illustriſſ. VAN SWIETEN Commentar. T. V. p. 372. Edit. Lugdun.*

\*\*) Nuper adhuc *Illust. HALLERUS* in *Bibliotheca medicinæ practicæ*, T. I. p. 474. opinionis fuit, morbum Americanum *Yaws* matrem esse nostræ luis venereæ. Cum morbus *Yaws* coitu ac lactatione propagetur atque mercurio curetur, hinc credo originem nostræ luis non male adeo ab illo morbo derivari, licet sint authores, qui morbum *Yaws* non esse venereum censant, cum in nostra regione *Yaws* non oriantur. At lues suis in initijs tubera in toto corpore produxit, & ego vidi rusticum, qui toto fere in corpore etiam inter digitos pedum atque in facie condylomata habuit, quæ excrementiæ morbo *Yaws* non dissimiles esse videntur. Quo assumptione utique consequitur prout semina unius ejus-

Nova hæc lues in Europa suis in initiis multo acrior fuit, continuo enim pessimis ulceribus & tuberibus universum aggrediebatur corpus. Temporis successu ejus furor sensim sponte remisit.

**PROPRIETATES** hujus miasmatis ab omnibus huc usque notis acrimoniis & contagiis sunt penitus diversæ, hinc *miasma sui generis* est. Est autem hoc virus

i. *Tenuissimum*, minima enim vascula & poros nostri corporis intrat.

---

ejusdemque plantæ pro diversitate cœli, soli & culturæ plurimum diversa folia, flores & fructus gerunt, sic etiam miasma Yaws in nostro climate alios morbos per repetitam venerem, adhibitaque medicamenta producere potuisse. Originem autem morbi Yaws ab esu fructus arboris *Musa*, qui panis loco in his regionibus commedi solet, derivat Cel. SCHILLIG v. *Diatrībe de morbo in Europa pene ignoto*, quem Americani vocant *Yaws*. p. 9. §. 73.

Quidam a *promiscua meretricum venere*, alii a coitu cum *leprosis*, alii ab *astrorum influxu*, alii ab *aëris corruptione* ob *pluviarum frequentias* originem contagii existimant. Alii ab *hepate affecto*, alii ab *aquarum pestilentia*, alii denique a potionē vini, quod Hispani *sanguine leprosorum* contaminarant; Alii ab esu *carnium bumanarum*, alii a coitu hominis cum *equo*; Alii denique ab iectu vel esu cuiusdam *serpentis Americani* ortum luis venereæ repetunt. V. Clar. GRUNER *morborum antiquitates*. p. 80 & 81. Alii deum a summo D E O in scorta-

2. *Fixum*, nullo enim experimento constat sola exhalatione sine attacu miasmatis quemdam fuisse affectum.
  3. *Acre inflammatorium*. Irritando enim lentas inflammationes & humorum spissitudinem phlogisticam, lentaque ulcera producit.
  4. *Affinitatem cum mucosis & oleosis humoribus* habet. Hinc glandulas muciparas & ossa adeo saepe afficere amat.
  5. Nec *acidum* \*) nec *alcalinum*, nec *putridum*, nec *salsum* est.
  6. *Noctu* ut plurimum magis furere solet.
  7. *Solo mercurio* deleri potest.
  8. Nunquam in nostro corpore nascitur, semper in illud *ingeritur*. \*\*)
- 

torum pœnam hanc luem esse datam opinantur, at hi cogitent persæpe innocentes infantes, uxores, nutrices hac lue sine propria culpa infici.

\*) Sunt, qui opinantur miasma venereum esse acidæ indolis, quia tabum venereum ossa emollit, violaceos succos rubefacit, salibus alcalinis & mercurio, quem acidum absorbere dicunt, curetur. V. CÉZAN *Manuel antisyphilitique, ou Essai sur les Maladies vénériennes*. Paris 1774. p. 205. At alcalina luem curare nondum certo demonstratum est. Et mercurius sublimatus corrosivus, acido salis ditissimus, quomodo acidum venereum absorbeat?

\*\*) Lues extemporanea, quæ sine impuro coitu sua sponte nasci dicitur, ut quidam authores observasse volunt, non vera lues, sed muci urethræ spontanea corruptio vel lues venerea latens coitu vel alia causa solummodo evoluta mihi esse videtur.

*MODUS INFECTIONIS*, qua hoc virus corpori  
stro ingeri solet, est *quadruplex*.

1. *Generatione ex matre venerea*, quæ cum sanguine fœtui virus communicat. An pater cuius semen venereum est, prolem labe venerea infectum fine matris infectione generare possit, dubium est.
2. *Lactatione* Sic infantes sæpe a nutrice venerea & nutrices sanæ ab infante venereo afficiuntur. \*)
3. *Coitu vel viri sani cum muliere leucorrhæa venerea laborante*, vel mulieris sanæ cum viro gonorrhæa venerea affecto. Hæc Methodus infectionis frequentissima est. Ex centum infectis nonnaginta novem ex hac causa luem habent.
4. *Contactu tabi venerei*, præsertim si locus tangens vulneratus, vel tenui epithelio solumodo tectus est. Hinc osculo, poculo, habitu, lectu, accubitu, tactu, acie phle-

\*) Huc etiam pertinet infecio per suætrices seu feminas quæ puerperis mammæ exsugunt. v. BLANCHARD von der belagerten und entsezten Venus. S. 477. — Medicinische Versuche und Bemerkungen einer Gesellsch. in Edimburg. 3. B. 444. S. — der Arzt, eine Wochenschrift 3. B. 637. S. — BLOCHS medicinische Bemerkungen. S. 151. seu geschichte einer durch eine Auffaugerin auf viele familien verbreiteren venerischen Krankheit.

botomi aut cubi sacrificatorii lues ~~com-~~  
municata legitur. \*)

Rara est hominum *idiosyncrasia*, qui his qua-  
tuor modis non afficiuntur.

*Pars* primum a viru tacta, primum afficitur.

Quandoque tamen at rarissime observatur  
miasma partem primo tactam non afficere,  
sed ab ea absorberi & ad aliam corporis  
partem illico migrare.

Primarius in parte affecta miasmatis *effectus* est.

1. *Irritatio* partium solidarum, unde inflam-  
matio lenta & affluxus humorum.

2. *Mutatio* humorum in *liquidum puriforme*; hinc humoris puriformis effluxus vel  
accumulatio in parte affecta.

3. Demum *exulceratio* lardacea sequitur.

Miasma tandem, a parte primum affecta *absorptum*,  
in alia parte, quandoque in toto corpore  
morbos primario effectui similes producit,  
pro sola varietate partium affectarum varios.

Hinc optima luis venereæ divisio fieri potest

1. in luem *topicam*, quæ unam solummodo par-  
tem occupat.

2. --- --- *universalem*, quæ totum jam inficit  
corpus.

3. --- *laryatam* quæ sub aliis morbi facie latet.

4. — — *complicatam* quæ cum alio morbo  
complicatur.

---

\*) *Illustriſſ. VAN SWIETEN Comment. T. v. p. 378*

*Curatio* luis venereæ exigit 1. *ablationem* miasmatis venerei 2. *reparationem* partium solidarum fluidarumque a miasmate depravatarum.

*Ingens* est medicamentorum farrago, quorum vis medicata ad auferendum miasma venereum laudata fuit. Cum autem temporis successu hæc medicamenta suis laudibus non responderent, ea iterum oblivioni tradebantur, aut solum ut remedia *secundaria* adhibebantur. Efficaciora ex his sunt *lignum guajacum* -- *lignum saffras* -- *Radix sarsaparillæ* -- *bardanæ* -- *chinæ nodosæ* -- *Cortex rad. mezeræi* -- *Herba cicutæ* -- *stipites dulcamaræ* -- *lobellia syphilitica* -- *antimonium crudum.* \*)  
Gratiola \*\*)

Docuerunt vero innumera experimenta *hydrargyrum* esse unicum, optimum ac tutissimum virus venerei antidotum, quod specifice delet.

Modus autem mercurium exhibendi generatim duplex est, vel enim *externe* vel *interne* corpori applicatur.

\*) Cel. BOEHM *diss. varia Syphilidis therapia.* Argent. 1771.  
prostat etiam in *Illustr. BALDINGER Sylloge selectorum opusculorum* p. 200.

\*\*) Cel. KOSTRZEWSKI *diss. de gratiola.* Viennæ 1775.

*Externe applicatur*  
*in unguento mercuriali*  
*— fumo cinnabarinio*  
*— lavamento ex solutione aquosa subli-*  
*mati corrosivi.*

*Interne datur*

*solus*  
*mixtus vel*  
*præparatus.*

Quælibet harum methodorum est plus mi-  
nus efficax, periculosa, incommoda.

**I**NUNCTIO unguenti mercurialis dividitur  
in *salivatoriam*, si unguentum tanta copia  
quotidie inungitur, ut salivatio excitetur,  
ac continuata inunctione per 6 vel 8 se-  
ptimanas sustineatur.

in *extinxoriam*, si prægresso usu 30 bal-  
neorum, purgatis primis viis, bono  
viatu & decocto purificante diu potato  
unguentum omni tertio die ad 3j vel  
ultra inungitur. Dosis unguenti si vi-  
sum fuerit caute augenda est, si vero  
signa salivationis appareant, aliquot die-  
bus ab inunctione cessandum & lene pur-  
gans exhibendum est. Aptissima inun-  
ctioni loca sunt interna extremitatum in-  
feriorum superiorumque superficies ac  
regiones inquinales. Inunctio ad ignem  
ab ipso ægroto fieri debet.

*Methodus salivatoria* est valde *incommoda*; ob suffocationem & alia gravissima symptomata valde *periculosa*; ob mercurii nimis celerem elapsum e corpore valde *incerta* & *inefficax*; ob mercurii facilem metastasim ad varia corporis loca valde *timenda* & cum lues sine salivatione, ut experientia docuit, perfecte curari possit, hinc *non necessaria*.

*Methodus extinctoria* ob metastases mercuriales timendas, tardam sanationem & non raro difficulter coercendam salivationem, priori methodo vix est melior.

*FUMUS CINNABARINUS* ob periculum subitanæ suffocationis & raro coercendam salivationem damnandus.

*LEVANENTUM* ex solutione aquosa sublimati corrosivi ob incertam absorpti veneni dosim periculosissimum est.

*MERCURIUS SOLUS*, id est crudus, majori copia deglutitus, in intestinis non absorbetur, sed per anum iterum pro maxima parte ejicitur, hinc curatio nulla & incerta.

*MIXTUS* habetur mercurius

1. cum oculis cancerorum ut *mercurius alcalisatus*,
2. --- *saccharo* --- *mercurius saccharatus*.
3. *sulphure* --- *œthiops mineralis*.
4. --- *manna*, *melle crudo vel rheo* ut *merc. manatus*, *mellitus*, *rheatus*.

Omnia hæc admixta remedia mercurium in primis viis facile derelinquunt, hinc parum hujus metalli sanguinem ingreditur. Ideo curatio ab his tardissima, incerta.

**PRÆPARATUS** habetur mercurius

1. Cum *acido vitrioli* ut in *turpetho minerali*,
2. --- *salis* ut in *sublimato corrosivo*, in *mercurio dulci*. in *aquila alba* seu *camomela*,
3. --- *nitri* ut in *præcipitato rubro*
4. --- *aceti* ut in *pisis Kayseri*.
5. --- *tartari* ut in *aqua vegetomericiali*.
6. longa *frictione* calcinatus ut in *mercurio calcinato per se*.

Omnia hæc præparata mercurialia, *majori dosi* & longo tempore data, sunt valde periculosa, acerrimam movent salivationem, tormia, tabem, hæmoptoen, phthysim. *Minori autem dosi* data tarde admodum & palliative tantum, non radicaliter ut multiplex experientia me docuit, curant.

**MERCURIUS GUMMOSUS**, qui ex una parte mercurii vivi & tribus partibus gummi arabici, ope syrapi cichorei cum rheo in mucum contritis, constat, forma pilulari vel syrapi vel mixturæ adeo datur, ut mane ac vesperi decem grana mercurii gummosi assumentur.

Hicce mercurius nec *odore* nec *sapore* ut  
reliqua præparata molestat.

Facile secundas vias intrat, omniaque vasa  
permeat.

Raro admodum *salivationem* mouet.

Non deponitur metastatice, ut mercurius pin-  
guedine subactus deponi solet, quia mu-  
cus arabici gummi mercurium in li-  
quido nunquam derelinquit.

Non acrimonia venenata ut mercurialia fa-  
lina nocere potest.

Omnibus subjectis etiam *infantibus*, *gravi-*  
*dis*, *exhaustis* ac *debilibus* dari potest,  
quod de unguento mercuriali & præpa-  
ratis salinis dici nequit.

Demum, ut experientia me docuit, omnes  
morbos venereo mercurio sanabiles sa-  
nat, imo plures curavi mercurio gum-  
moso, quos reliqua præparata mercuralia  
non sanarunt.

Non indiget tædiosa *præparatione* balneo-  
rum, vacatione ab officiis, inclusione  
in cubiculo calido.

Non causat pauperibus multos *sumptus*.

*Præparatio ægroti* ad usum mercurii gummosi  
exigit

1. *Venæfæctionem* si ægrotus plethoricus est.
2. *Purgans* primarum viarum, quod omni de-  
cimo die repeti dæbet.

3. *Potum diluentem & obvolventem ex sarsaparilla, & bardana si ægroti temperies calida & stricta, aut ex ligno quajaco, si temperies frigida & laxa est.*
4. *Diætam salubrem, dispepta, pinguia & acida evitentur.*
5. *Aerem serenum, frigus nocet, cubiculi calor & vestitus nimium calidus salivam facile movet. Favente tempestate ambulatum pergit ægrotus.*
6. *Si salivationis signa in ore appareant, usus mercurii suspendatur per aliquot dies, & detur purgans.*
7. *Balnea tepida in lue inveterata ante & sub usu mercurii adhiberi debent, in lue autem non adeo inveterata his carere possumus.*
8. *Usus mercurii continuandus tam diu donec omne miasma venereum destrutum sit. Quod noscitur si morbus venereus non amplius a mercurio mutetur ac ægrotus mercurium difficilius ferre incipiat. Tunc suspendatur mercurius ac morbus consuetis remediis tractari continuetur. \*)*

---


\*) Hæc regula in praxi suis venereæ maximi est momenti. Multoties vidi condylomata ani & ulcera faucium, quamvis ab initio usu mercuri interno multum mitigarentur, demum diu in eodem statu

Remedium specificum, quod vim sialagogam mercurii penitus impediret, nondum innotescit. Nec *sulphur*, nec *camphora*, nec *cortex peruvianus*, nec *ferrum* cum mercurio datum id præstat. \*\*)

Sed purgantia omni ostiduo repetita, mercurii copia exigua quotidie exhibita, decocta mucilaginea, caput & collum non multum tegmine calefactum, atmosphæra libera aëris, evitatio sußionis fumi nicotianæ impediunt & coercent salivationem.

mansisse & ægrotum, qui usum mercurii internum diu facile ferebat, deum variis symptomatibus, ut lassitudine, febricula, inappetentia, tussi, & oris ardore cruciatum fuisse. Omnia hæc symptomata suspenso interno mercurii usu evanuerunt, ac ulceræ & condylomata sine usu interno solis remediis externis facile curabantur ut exempla recensebo in notis ubi de angina venerea dicturus sum. Regulam, quam multi inculcant, mercurii formam esse mutandam cum alio præparato mercuriali, si morbus in eodem statu manet, in mea praxi nunquam habui necessariam, nec in hoc casu conveniret.

\*\*) Cel. BLOCHS medicinische Bemerkungen, pag. 169.



## MORBIS VENEREIS SPECIATIM.

## GONORRHÆA VENEREA.

Est muci puriformis stillicidium ex urethra vel glande. \*)

Qui in gonorrhæa effluit humor, neque *semen* neque verum *pus* est, sed mucus glandularum mucipararum, viru venereo in humorem acrem, flavo viridescentem, mulierem sanam leucorrhæa venerea sub coitu inficientem, mutatus. \*\*

\*) Sunt qui opinantur gonorrhœam venereum anno 1540 primum innotuisse, at ALEXANDER BENEDICTUS jam anno 1493 gonorrhœam venereum vidit. v. HALLERI *Biblioth. Medicinæ practicæ* T. I. p. 475. Gonorrhœa quam BECKETUS jam anno 1340, Londini observatam fuisse dicit, ex sola lasciva sorditie ortum habuisse videtur, cum remediis adeo levibus curaretur. v. *Philosoph. Transactions* 30. Band. 359. Num. & Cel. LESKE *Ausserlesene Abb. aus den philosophisch. Transactionen. 2. Theil*, p. 290.

\*\*) Gonorrhœa a graco vocabulo γόνη *semen* & γέω *fluō* derivatur, verum cum in gonorrhœa venerea mucus urethræ, non autem semen stillatim effluat, hinc melius vocaretur *leucorrhœa virilis*, id est fluor albus virorum. Semen autem in gonorrhœa non effluere, docet potentia *semen* emittendi, quam go-

Neque *ulcus urethræ* est causa proxima gonorrhææ. Rarissime enim *ulcus cum gonorrhæa* in urethra invenitur , ut cadaverum sectiones docent. \*)

Virus gonorrhœicum non virus a venereo distinctum esse videtur. \*\*)

norrhoici habent & alia argumenta v. *Illustris TODE vom Tripper in anschung seiner natur und Geschichte.*

1774.

\*) Militem ex pleuritide , cum vehementi simul gonorrhæa mortuum, dissecui, in cuius urethra ruborem ac mucum flavum ex poris urethræ sudantem vidi, nullibi autem *ulcus* deprehendi. Idem observavit nuper *Doctissimus*, ac *Celeberrimus Professor STOLL* qui in cadavere venereo urethram deprehendit leviter inflamatam, phlogosí ab orificio ad semi-alterum digitum procurrende; paulo ante bulbum exigua denuo canalis inflammatio fuit. Ulcera erant nullibi, sanæ reliquæ partes urethræ , uti & testes & vesiculæ seminales. v. *Rationis medendi, pars II,* p. 402. Plures sectiones cadaverum gonorrhœicorum recenset *Illust. MORGAGNI. De sedibus & causis morborum epistola 40.*

\*\*) *Illust. TODE* in libro *Nöthige Erinnerungen für Aerzte und kranke, die den Tripper heilen wollen. Copenhagen, 1777. p. 13.* contendit virus gonorrhœicum non esse virus venereum sed peculiare virus , quod vulgarem luem venereum non dat , sed alios morbos , mercurio non curabiles. Argumentis , quibus vir doctissimus suam fulciri conatus est opinionem , maximi momenti dubia opposuit *Experientis-*

*Signa*, quibus gonorrhæa venerea a non venerea differt, sunt a prægresso coitu suspecto, colore viridescente, & dysuria desumenda; at unicum & certissimum signum est infec<sup>tio</sup> sanæ feminæ. \*)

*opus ac doctissimum Professor RICHTER. v. Chirurg. Bibliothek, 3 Bandes, 3. Stück. 505. Seite.* Quamvis me imbecillem nimis sentiam, ut litem de gonorrhææ indole venerea tantos inter viros agitatam, etiam meam faciam; veritatis amore tamen confiteri cogar me dubium hærere de amplectenda *illustris* Todii sententia. Ex primariis *Cel.* Todii argumentis, cur gonorrhæa morbus venereus non sit, est observatio quod gonorrhæa sine mercurio curetur ac quod mercurius hunc morbum non curet. Ad primum argumentum respondeo, virus venereum ex nulla corporis parte adeo facile sine mercurio eliminari posse quam ex urethæ & vaginæ cavo, ideo s<sup>e</sup>pe gonorrhæam sine mercurio penitus curari. Quod usum mercurii in gonorrhæa attinet fide honesti viri affirmare possum me injectionibus mercurialisibus multas gonorrhæas & leucorrhæas curasse. Interim alia sunt argumenta quibus irrespondere nequeo v. gr. cur gonorrhæa in *Orabeira* nondum observetur, licet lues venerea ibi jam multos afficiat? v. THODES *medicinisch-chirurgisch. Bibliothek. 7. B. 1. St. 31. S.*

\*) Bene distingui debet gonorrhæa venerea a non venerea. Nam effluvium puriforme ex mera genitalium impuritate, ex nativa phymosi orta, ego in puerο 3 annorum observari. Idem in rustico 24 annorum obser-

*Sedes gonorrhææ vulgaris in lacunis Morgagnianis urethræ est.*

*Respectu indolis habetur gonorrhææ simplex, quæ recens & sine alio morbo est.*

vavit *Cel. ALIX*, v. *observata chirurgica fasc. II. p. 63.*

Gonorrhæam contrahere potest, qui cum femina fluore albo acri, licet non venereo, laborante concubit. A materia arthritica ad penem deposita, gonorrhæas vedit *Cel. WHYTT.* vid. *Neue Versuche und Bemerk. von einer gesellschaft zu Edimburg.* 3.

*B. 441.* S. Ex saburra biliosa primarum viarum *Cel. OFTERDINGER* gonorrhæam adnotavit. v. *Anweisung für das Landvolk in absicht auf seine gesundheit.* 1774. p. 472. Effluvium virulentum ex urethra, symptoma hæmorrhoidum interceptarum quandoque esse, *Cel. BRENDL* asseverat. v. *Diss. de hæmorrhoidibus interceptis, morbos verendorum aphrodisiacos simulantibus.* in *opusc. parte II. pag. 77. §. 17.*

Demum a calculo vesicæ urinariæ in purissimo viro puriforme effluvium, quandoque cessans, vidi. A cerevisia recenti, a cantharidibus, ab esu acerum tale effluvium alii fide dignissimi viri observarunt.

v. *FORDYCE Untersuchung der venerischen Krankheiten.* p. 39. & *ILL. SAUVAGES nosol. methodic.* T. 11. p. 401. Omnes hæ gonorrhææ non venereæ noseuntur quod non diu durent, mox fluant, mox cessent, mulierem concubentem non inficiant & ut plurimum sua sponte morbo, a quo oriuntur, curato, evanescant. Gonorrhæa autem seminalis, ab atonia vasorum ejaculatoriorum, ab usu coitus vel pollutionum nata, distinguitur tabe dorsali & effluvio veri seminis.

*inveterata* quæ jam longo tempore durat,  
*complicata* quæ cum alio morbo jungitur.

Quæ cum ulcusculis penis complicatur  
facile luem causat, quia viris ulceræ  
facilius absorbetur, quam sine ulceræ.

**I. Gonorrhœa simplex.** Aliquot post impurum  
coictum dies, raro aliquot post septimanas,  
oritur haud ingrata titillatio in glande &  
urethra penis. Orificium glandis tumet,  
rubet, calet ac hiat; in urethræ orificio  
paululum saniei tenuis conspicitur; paulo  
post dolor ardens & acuum instar pun-  
gens inter mingendum, præcipue sub fi-  
nem mictus sentitur; ac mucus flavoviride-  
scens, quandoque striis cruentis mixtus, ma-  
jori copia ex urethra stillat; tota simul  
urethra ad vesicæ collum usque riget.

Tandem omnis dolor & inflammationis sym-  
ptomata sensim mitescunt, urina vix  
urit; ac mucus exstillans magis albicans  
& æqualis fit.

Demum nullus plane in urina reddenda per-  
cipitur dolor; mucus albus, viscidus,  
fili instar ductilis ex urethra stillat; sen-  
sim hujus muci copia adeo imminuitur.  
ut guttæ solummodo quædam intra diem  
aut noctem exprimi possint; tandem  
quoque & hoc plane cessat.

Hinc

Hinc patet totum hujus morbi decursum in quatuor periodos dividi posse.

In *periodum infectionis*, quæ a coitu impuro ad dysuriæ initium est, hæc aliquot dies ut plurimum, quandoque multo longius durat.

— — *inflammationis*, quæ dolore inflammatorio, febre, dysuria noscitur ac unam vel duas septimanas ægrotum vexat.

— — *purulescentiæ*, quæ dysuriæ absentia noscitur, aliquot vero septimanas durare solet.

— — *mucescentiæ*, quæ ex stillicidio mucii excoloris & pauci noscitur.

*Curatio* gonorrhææ simplicis pro diversitate periodi varia est.

*Periodus inflammatoria* exigit

1. *Venæficationem*, si dolor & inflammatio penis valida est, alias non.

2. *Decoctum emolliens* & simul *antiphlogisticum*, quod ex radice altheæ, sarsaparillæ, herba malvæ, cremore tartari, nitro & syrupo papaveris rhoeados vel semenum papaveris parari potest. Vel

3. *Emulsionem refrigerantem* ex seminibus melonum aut amygdalarum cum nitro & syrupo papaveris albi. Hæc magna copia hauriri & tam diu continuari de-

bet, ac dolor in reddenda urina percipitur.

4. *Pulverem eccoproticum ex rheo & sale mirabili, qui ad drachmam semis omnitem trihorio assumendus est.*
5. *Diæta sit tenuis & antiphlogistica. Vinum, coitus, equitatio, pollutio evitentur.*
6. *In hac periodo purgantia resinosa, acria, balsamica ut balsamus copaivæ, terebinthina, balsamus sulphuris, tinctura antimonii acriis, ac injectiones adstringentes valde nocent vel inflammationem augendo vel gonorrhœam cum maximo periculo suprimendo.*

*Periodus purulescens* exigit

1. *Pulverem eccoproticum cum aliquot guttis balsami copaivæ mixtum \**
2. *Potum purificantem ex bardanæ radice.*
3. *Injectionem mercurialem ex mercurio sublimato corrosivo grano uno & semis mucilagine gummi arabici uncia una & aquæ destillatae libra una. Injectio ter vel quater de die repetenda. \*\**

\*) Laudant aliqui extractum borraginis & buglossæ. v.

*Journal de pharmacie* T. alii extractum aconiti alii extractum gratiolæ in hac morbi periodo utile invenerunt.

\*\*) Internus mercurii usus, quamvis gonorrhœæ virulentiam mutet in humorem biandorem & ægrotum

*Periodus nuceſcens* exigit medicamenta roborantia interna ex cortice, marte, cinnamomo, quæ vino infunduntur.

**II. GONORRHÆA GLANDIS.** Est muci puriformis ſillicidium ex poris excretoriis glandis.

*Curatio* durante periodo inflammatoria eft eadem ut in gonorrhæa urethrali, durante autem periodo puruleſcentiæ loco injectionis mercurialis, balneatio penis in ſolutione mercuriali adhibetur.

**III. GONORRHÆA HABITUALIS** seu *INVETERATA*, eft gonorrhæa quæ jam a multis mensibus vel multis annis durat. *Cauſa* hujus ſpeciei vel *ulcus inveteratum* in urethra vel *atonia* duclum excretorium urethræ eft.

*Gonorrhæa habitualis mucosa*, quam Angli *Gleet* dicunt, ſillicidio muci tenuis, & absentia doloris topici in urethra noſcitur. *Cauſa* hujus gonorrhææ eft frequens durante gonorrhæa coitus, me-

ab infectione a viru venereo absorpto defendat, plane gonorrhæam tamen non auffert. Latet enim miasma in muco lacunarum urethræ, quem perpe- tuο fermenti instar corrumpit & in quem mercurius interne datus vix vim aliquam exercet. Inje- ctio autem mercurialis facile mucum & in eo la- tens miasma venereum deſtruit, hinc patet cur hæc plus ad ſanandam gonorrhæam contribuat, quam **internus** mercuri uſus.

dicamenta balsamica nimis diu continua-  
ta ; nativa vel senio vel alio morbo in-  
ducta lacunarum mucosarum atonia.

*Curatio* exigit medicamenta roborantia inter-  
na & externa ut injectionem vitriolatam,  
balneum penis frigidum ; vinum robo-  
rans ex cōrtice peruyiano, Winteraro ,  
marte , amaris ut gratiola.

*Gonorrhæa habitualis ulcerosa.* Noscitur sa-  
nie purulenta ex pene stillante & dolo-  
re topico in urethræ quodam loco ,  
sub urinæ emissione , candelulæ appli-  
catione vel pressione penis cum digito  
percipiendo.

*Curatio* exigit

1. Internum usum *mercurii gummosi*.
2. Applicationem *candelulæ balsamo mer-*  
*curiali illitæ*.
3. *Injectionem solutionis mercurii sub-*  
*limati*.

## D Y S U R I A V E N E R E A.

Est mictus ardens & dolorificus a viru venereo  
ortus.

*Species* sunt

1. *DYSURIA INFLAMMATORIA.* Oritur ab inflam-  
matione urethræ , quæ ardorem vividissimum

inter mingendum caufat fine ullo muci puriformis effluxu ex urethra. Hinc authoribus quibusdam *gonorrhœa sicca* dicitur.

*Curatio* exigit

1. *Venæfctionem*
  2. *Emulsionem refrigerantem*
  3. Decoctum *radicis altheæ* vel *infusum seminis lini.*
  4. *Purgans antiphlogisticum*
  5. Pilulas ex *mercurio gummoso.*
  6. *Peniluvium* ex lacte cum *mercurio gummoso cocto &*
  7. *Injectionem olei ac lacticis mercurialis.*
2. **DYSURIA GONORRHOICA.** Est symptoma gonorrhœæ recentis; qui enim multoties repetitis gonorrhœis laborant, nulla vel levi saltem dysuria in gonorrhœæ exordio corripiuntur. Quandoque vero gonorrhœam virulentam adstringentibus suppressam sequitur. Sedatur dolor vel saltem remittit quamprimum humor gonorrhœicus iterum fluere incipit.

*Curatio* est eadem ut in priori specie. Cave ne calidis remediis gonorrhœam revocare tentes.

3. **DYSURIA ULCEROSA**, quæ in viris ab ulceræ urethræ, in feminis ab ulceræ orificii urethræ oritur. Hæc species diu durat, noscitur dolore topico, de *curatione* vide *ulceræ urethræ.*

4. *DYSURIA LEUCORRHÆICA*, est leucorrhææ symptoma, quæ cum phlogosi circa urethræ orificium complicata est; nam simplex leucorrhæa dysuriam in suo exordio vix habet.  
*Curatur* ut dysuria gonorrhææ virilis.

### I S C H U R I A V E N E R E A.

Est mictus difficultas aut plane impeditus, quo urina vel tenuis fili, simplicis aut bifurcati forma proflit, aut guttatum solummodo cum summo connatu exprimitur.

*Species* sunt.

1. *ISCHURIA INFLAMMATORIA*. Urethræ vel glandulæ prostatæ inflammatio quandoque in gonorrhææ exordio aut in gonorrhæa injectionibus adstringentibus suppressa, adeo increscit, ut urinæ iter vel plane obturetur aut difficillimum reddatur.

Hæc species ischuriæ a catheteris aut candularum usu valde exasperari solet.

*Curatio* exigit curam antiphlogistica dysuriæ inflammatiæ, quam vide. Si hac methodo urinæ iter non brevi expediatur, tunc vesicæ punctura est instituenda & curatio antiphlogistica continuanda.

2. *ISCHURIA ab INDURATIONE GLANDULÆ PROSTATÆ*. Noscitur ex tumore frigido urethræ principium coarctante, dígito in anum immisso optime percipitur glandulæ tumor.

*Curatio* exigit internum usum mercurii gummofi cum extracto cicutæ, aconiti, belladonæ, gratiolæ.

*Externe* unguentum mercuriale cum mandragora in lacte cocta perinæo applicetur. vid. *Schirrhæ prostatæ*. Urethræ immitatur candelula.

3. *ISCHURIA AB INTUMESCENTIA NODOSA SUBSTANTIÆ CAVERNOSÆ URETHRALIS.* Hæc substantia hinc inde, ob topicam membranæ, quæ urethræ cavum format, ationam, nodorum instar in urethræ cavum prominere solet. *Noscitur* si cathetere obstraculum glabrum & molle percipitur.

*Curatio* exigit usum candelularum.

4. *ISCHURIA AB INTUMESCENTIA VERUMONTANI vel TUBERCULO CUIUSDAM GLANDULÆ MAJORIS.* Hæc intumescentiæ quandoque spongiosæ, quandoque collosæ & induratae sunt.

5. *ISCHURIA AB ULCERIBUS CALLOSIS & TUMIDIS URETHRÆ.* Noscitur ex effluxu purulento vel sanioso ex urethra. *Curatio* exigit candelulas balsamo mercuriali illitas.

6. *ISCHURIA A CICATRICIBUS URETHRÆ.* Quæ chordas callosas urethræ cavum coartantes formant. Cathetere noscuntur ac candelulis curantur.

7. *ISCHURIA CARUNCULOSA*, seu a verruca carnea, molli, in urethræ cavo post ulceræ hujus cavi relicta vel nata. Noscit dicitur ex obstaculo molli, quod cathetere percipitur, ac ex urinæ effluentis filo bifurcato. Rarissime autem caruncula est causa stranguriæ venereæ.

*Curatio* usum candelularum postulat.

8. *ISCHURIA A SPONTANEA CONTRACTIONE URETHRÆ*. Noscitur ex filio tenui urinæ ac candelulæ immisione quæ urethram vel ubique vel hinc inde solummodo angustatam invenit. Hæc species omnium facillime candelulis curatur.

9. *ISCHURIA VENEREA SENILIS*. Homines, qui suam juventutem reiteratis gonorrhæis contaminarunt, post 50. annum levi dysuria corripi dicuntur, quæ quandoque plures annos perseverat, & non raro in ischuriā abit.

Anatomica dissectio ægrorum cum hac ischuria mortuorum urethræ phlogosim ac angustationem non autem carunculas ut vulgo putabatur, exhibuit.

Omnis hæc ischuriæ species a prægressis & male curatis vel sibi relicitis gonorrhæis aut ulceribus urethræ nascuntur. Difficillimum autem est sola exploratione cum cathetere vel candelula diversitatem causarum rite

distinguere ; Interim *curatio* hujus mali non adeo diversa est ac exigit.

1. Usum internum *mercurii gummosi* ac decoctum *sarsaparillæ*, his enim medicamentis labes venerea tollitur.
2. *Balnea emollientia*, quæ urethram relaxant ac candelularum introductionem facilitant.
3. Usum *candelularum*, quibus angustatio urethræ dilatatur. Ab initio candelulæ tenues, sensim crassiores introducantur. Statim post balnei usum hæ candelulæ facilime applicantur. \*)

\*) Candelulæ *ex corda* paratæ facilius, si magna urethræ angustatio adest, quam candelulæ *ex massa ceracea* ut *Gouvardianæ* sunt, applicari possunt, Chordæ etiam intumescendo urethram magis dilatant, ac ob flexilitatem diutius sine irritatione in urethra relinquuntur. v. Foot *Kritische untersuchung der alten und neuen Art die krankheiten der Haruröbre zu behandeln.* S. 103. His magis adhuc præferri debent candelulæ cavæ *ex resina elastica*, quæ urinæ exitum continuo liberum simul servant. v. Cel. THEDEN *Sendschreiben an den berühmten Herrn Professor RICHTER, die neu erfundenen Catheter aus der Resina elastica betreffend.* Berlin 1777. Cave ne catheterem eo plumbo, mercurio illitum, applies, facile enim plumbum a mercurio frangitur & fragmentum in vesica relictum calculo dat basim.

## VESICULÆ CRYSTALLINÆ VENEREÆ.

Sunt vesiculæ limpidæ, crystalli instar resplendentes, semen sinapis magnitudine æquantes, in glande vel præputio.

Ut plurimum aliquot post dies in ulcuscula *Chancre* dictas abeunt.

*Curatio* peragitur interno usu mercurii gummosi & ablutione externa cum tenui solutione mercurii sublimati.

## TUBERCULA VENEREA PENIS.

Sunt tubercula pisiformia, quandoque majora, in pene.

Respectu *sedis* dividuntur

1. *TUBERCULA GLANDIS* hæc juxta frœnulum in ipsa glandis substantia in *glandulis Morgagni* resident, vel juxta coram glandis in *glandulis odoriferis*.

2. *TUBERCULA PRÆPUTII*, quæ præputium occupant.

3. *TUBERCULA GLANDULÆ COWPERI*, quæ ad finem crurum penis supra bulbum urethræ locantur.

4. *TUBERCULA ALIARUM GLANDULARUM*, quæ hinc inde in pene apparent.

Respectu *indolis* hæc tubercula sunt vel *calida* vel *frigida*.

1. *Calida* noscuntur rubore, dolore & erubescatione muci gonorrhœici, si digitis præ-

mantur. Abeunt quandoque in ulcera profunda.

*Curatio* exigit resolutionem ope mercurii interne & externe adhibiti.

2. *Frigida* noscuntur duritie & absentia inflammationis. *Curantur* ut tubercula calida.

### ULCERA VENEREA GLANDIS.

Sunt ulcera glandem vel internam præputii superficiem devastantia, quæ Gallis *Chancres* vocantur.

1. *ULCERA APHTHOSEA*. Hæc a prægressis vesiculis crystallinis incipiunt, superficialia sunt, ac solutione mercuriali aliquoties de die abluta, facile sanantur.

2. *ULCERA VULGARIA*. Sunt ulcuscula subrotunda in ambitu rubra, in medio grysea, aphthofis ulcusculis latiora & profundiora.

*Curatio* exigit usum internum mercurii gummosi. *Externe* balsamus mercurialis vel solutio sublimati applicetur.

3. *ULCERA CANCRESCENTIA*. Hæc admodum dolent, labia habent erosa & papillosa, totam glandem perrodunt. v. *Cancer penis*.

4. *ULCERA PENIS EXTERNA* quæ nempe in dorso vel infra vel ad latera penis, ut vidi, aliquoties oriuntur.

*Curatio* est ut in ulceribus glandis.

## CANCER PENIS VENEREUS.

Est glandis vel præputii degeneratio in cancrum. Pessima methodus est si ulcusculum glandis, ut venenum destruatur, aliquoties de die lapi de caustico, infernali vel vitriolo cœruleo angatur, sic sœpe ulcus venereum simplex glandis in pessimum cancrum degenerat.

Respectu indolis cancer penis est duplex.

1. *CANCER VULGARIS.* Est ulcus malignum quo præputium & glans cum ingenti dolore consumitur, quod constanter dolet, papillosum & sanguinolentum perpetuo est.

*Interne* mercurius gummosus cum cicuta detur. *Externe* extractum cicutæ in saturata solutione sublamati corrosivi solutum applicetur. Tentetur etiam applicatio aëris fixi.

Si hæc medicamenta non juvent tunc penis amputatio est facienda. Neque hæc juvat si glandulæ inquiales simul a materia cancroso jam ut vidi induratæ deprehendantur.

2. *CANCER FUNGOSUS.* Præputium vel glans vel utrumque in ingentem, aliquot pugnorum magnitudinis fungum spongiosum & sanguinolentum quandoque, a male tractatis ulcusculis glandis, degenerat.

*Curatio* exigit amputationem penis, quæ sub fine fungi cancerosi ope ligaturæ optime ac tutissime peragitur. \*)

## ULCERA VENEREA URETHRÆ.

Sunt ulcera in urethræ cavo hærentia vel ex aliis partibus pus in ejus cavum eructantia.

1. *ULCUS URETHRÆ SIMPLEX.* Noscitur ex pertinaci gonorrhœa & dolore ac ardore topico in peculiari ac fixo urethræ loco, sub emissione urinæ, tactu externo ac candulæ applicatione percipiendo.
2. *ULCUS GLANDULÆ PROSTATÆ.* Noscitur prægresso abscessu hujus glandulæ & facta ruptura abscessus in urethram. v. *Abscessus prostatæ.*
3. *ULCUS VESICULÆ SEMINALIS.* Noscitur prægressa inflammatione & suppuratione vesiculæ seminalis & effluxu seminis ex fistula.
4. *ULCUS GLANDULÆ CUJUSDAM MAJORIS.* Noscitur prægresso tuberculo calido & pro-

\*) Aliquot ante annos 32 annorum hominem, qui duorum pugnorum fungum venereum loco glandis & præputii habuit, ope ligaturæ perfecte sanavi. Alium vidi, qui cancro nervo, medium penem jam depascente, laboravit, fuit penis cultro amputatus at cancer oriebatur in inquine sinistro & ægrotum tæbe cancerosa enecuit.

fundo penis, suppurato & in urethram rupto. Quandoque ut vidi hæc ulcera in externam penis superficiem simul erumpunt & urinam emittunt.

*Curatio ulcerum in urethra latentium vel in eam se evacuantium præter usum internum mercurii gummosi exigit usum candelularum balsamo mercuriali illitarum.*

### P H Y M O S I S V E N E R E A.

Ex præputii intumescentia, quæ glandis denudationem impedit. \*)

i. *PHYMOSIS INFLAMATORIA*, quæ ab inflammatione venerea præputii oritur.

Raro *simplex*, ut plurimum cum ulceribus, condylomatibus aut gonorrhæa glandis & præputii *complicata* est hæc inflamatio.

\*) Pueris & juvenibus quibus nativa præputii angustia est, non raro ob immuditiem, sub præputio collectam, phymosis inflammatur & puriformis humor effluit, facile autem peniluvio ex lacte vel aqua vegeto minerali hæc phymosis non venerea curatur. *Cel. ALIX* in rustico tales vidit casum, qui ab inepto barbitonsore pro venereo habitus, divertio ansam date potuisset, nisi author morbum non venereum esse declarasset. v. *obs. chirurg. fasc. II. p. 63.*

*Curatio* præter venæsectionem & alia anti-phlogistica interna exigit simul pilulas ex mercurio gummoso & externe peniluvium ex laſte mercuriali aut ex solutione aquosa sublimati corrosivi.

Rarissime opus est præputii dissectione, si hæc methodus rite adhibetur, ut multoties observavi. Sola membra virilis balneatio in laſte tepido, aut aqua vegeto minerali & illitio unguenti neapolitani nihil profuit.

2. *PHYMOSIS CRYSTALLINA* est pellucida, cœdematosa vel serosa præputii intumescentia.

*Curatio* exigit præter purgantia & internum mercurii gummosi usum peniluvium ex solutione aquosa sublimati cum spiritu vini mixta.

3. *PHYMOSIS SCIRRHOSA* est præputii induratio ut plurimum tuberculosa. *Interne* mercurius gummosus cum extracto cicutæ & gratiolæ. *Externe* solutio aquosa sublimati cum cicutæ & gratiolæ foliis parata convenit.

4. *PHYMOSIS CANCROSA*. Totum præputium quandoque in enormem cancrum fungosum degenerat. *v. Cancer penis.*

5. *PYMOSES GANGRÆNOSA*, quandoque causticitate virus venerei, ut plurimum autem mala inflammationis medella gangræna præputii oritur. *Curatio* exigit antiseptica interna

& externa , quibus gangrenosum a sano  
facile separatur.

## PARAPHYMOYSIS VENEREA.

Est inflammatio venerea glandis , quæ præputium  
adeo reprimit , ut hoc colaris ad instar re-  
tro glandem reprimatur.

Hic morbus bene distinguendus est a para-  
phymosi non venerea quæ a violenta  
præputii repressione sub coitu quando-  
que contingit.

*Species* paraphymoseos venereæ sunt

1. *PARAPHYMOYSIS INFLAMMATORIA* quæ ut  
plurimum cum ulceribus aut condylomati-  
bus glandis complicatur , exigit præter  
venæsectionem & internum mercurii gumosi  
usum , simul balneum penis ex solutione  
sublimati ac retractionem præputii , si pos-  
sibilis est.

2. *PARAPHYMOYSIS GANGRÆNESCENTIA*. Si glan-  
dis gangræna instet , quam livor glandis  
docet , tunc retractum præputium lateralibus  
incisionibus dilatari ac antrorsum trahi  
debet.

*Gangræna glandis* exigit in & externe ap-  
plicata antiseptica. Rarius hæc gangræ-  
næ ultra glandem serpit , hinc ejus am-  
putatio nunquam , ut vidi , necessaria est.

PRIA-

## PRIAPISMUS VENEREUS.

Est penis ingrata, non libidinosa ac diu durans  
erectio.

1. *PRIAPISMUS GONORRHOICUS.* Oritur ab urethræ inflammatione, hinc dysuriæ ac gonorrhææ inflammatoriæ symptoma est.

*Curatio* exigit mercurium gummosum & antiphlogistica. *Vid. Dysuriam inflammati-  
riam.*

2. *PRIAPISMUS CHRONICUS.* Vidi juvenem, qui jam a sex septimanis post gonorrhæam adstringentibus suppressam priapismo fine omni alio morbo venereo laborabat.

*Curabatur* interno usu mercurii gummosi & balneo penis ex solutione aquosa sublimati ac linimento mercuriali, quo membrum involvebatur.

## SATYRIASIS VENEREA.

Est coeundi major cupiditas cum libidinosa penis erectione & non raro insequente pollutione.

1. *SATYRIASIS A COITU IMPURO.* Observatur in illo gonorrhææ stadio, quod inter infectionem & incipientem inflammationem gonorrhœicam intercedit. Hinc est infectionis signum & gonorrhææ prodromus.

*Oritur ab irritatione nervorum, urethram percurrentium & vesiculas seminales in consensum trahente.*

*Curatio exigit ut illico injectiones ex solutione aquosa sublimati in urethram fiant, sic aliquando ut observavi, gonorrhæa prævertitur.*

## CURVATURA PENIS VENEREA.

*Est penis eretti incurvatio tortuosa, vel sursum vel deorsum vel ad latus.*

1. *CURVATURA PENIS GONORRHÖICA.* Quando frenulum præputii inflammatur, tunc sub gonorrhææ periodo inflammatoria penis inter erigendum valde tortuosus incurvatur. Gonorrhæam cum tali curvatura complicatam dicunt authores *gonorrhæam chordatam*.

*Curatio exigit antiphlogistica cum mercurio gummofo V. Dysuria.*

2. *CURVATURA PENIS A TUBERCULIS.* A reiteratis gonorrhæis quandoque glandulæ induratæ aut nodi substantiæ cavernosæ in urethra remanent, quæ hanc curvaturam inducunt.

Curvatura semper in latere, quod nodo opposita est, observatur. Sic nodus in dextro latere sinistrorum, in sinistro dextrorum ; in parte inferiori sursum ; in

parte superiori deorsum penem curvare facit. Hi nodi simul urinæ & semenis iter reddunt difficilium.

*Curatio* curvaturæ exigit ablationem nodi vel tuberculi, quod vero non raro difficillimum est; resolutio vel suppuration tuberculi tentanda.

3. *CURVATURA PENIS A DEFECTU TELLAR CELLULOSÆ*, quæ quodam in penis loco ulcere ac magna suppuratione destructa fuit.

*Curatio* vix possibilis esse potest. \*)

### IMPOTENTIA VIRILIS VENEREA.

Est semenis sterilis effusio aut impedita ejaculatio.

1. *IMPOTENTIA A LUE UNIVERSALI*. Si semen simul viru venereo corruptum est, tunc lui, non autem proli propagando inserviet.

*Curatio* exigit mercurium gummosum.

2. *IMPOTENTIA A VESICULIS SEMINALIBUS CONTRACTIS*. Hoc vitium a prægressis morbis venereis vesicularum seminalium in cadaveribus quandoque repertum fuit.

3. *IMPOTENTIA AB ORIFICIS DUCTUUM EJACULATORIORUM CONCRETIS*. Etiam hoc ut prius vitium in cadaveribus venereorum

\*) Supplément au traité de M. PETIT sur les Maladies Chirurgicales, rédigé par M. LESNE, & Göttingen, gelehrt Nachrichten, zugabe von 1778. §t. 29.

deprehensum fuit. Utrumque vitium in homine vivente nosci nequit, utrumque est incurabile.



## MORBI TESTICULORUM.

### INFLAMMATIO TESTICULORUM VENEREA.

**E**st intumescentia calida & dolorosa unius vel utriusque testiculi.

1. *INFLAMMATIO GONORRHOICA.* Hæc sub stadio gonorrhææ inflammatorio ab urethræ consensu cum testiculis oritur, atque sedata urethræ inflammatione sponte evanescit.

*Curatio* hinc exigit antiphlogistica, ut urethræ inflammatio sopiaatur. Testiculi tumidi sunt *suspensorio scroti* sursum ligandi.

2. *INFLAMMATIO AB INFECTIONE TOPICA.*

A suppressâ vel parcus fluente gonorrhæâ & ab ulcere glandis exsiccatâ frequenter unus vel uterque testiculus inflammari solet.

*Curatio* exigit

1. Pilulas ex *mercurio gummoso*, quo fluxus gonorrhœicus sâpe restituitur & virus deletur.

2. *Emulsionem refrigerantem ac purgans antiplogisticum.*

3. *Cataplasma* ex farinis emollientibus in aqua vegetominerali coctis, quo dolor & inflammatio sopitur.

4. *Suspensorium scroti*, quo testiculi tumidi sursum ligentur.
3. *INFLAMMATIO SUPPURATORIA*. Noscitur testiculus suppurans si prægressa ejus inflammatione in uno vel pluribus locis scroti fluctuatio puris percipiatur.

*Curatio* exigit incisionem loci fluctuantis & emissionem puris V. *Ulcera scroti*.

## INDURATIO TESTICULORUM VENEREA.

Est unius vel utriusque testiculi intumescentia dura, frigida, vix dolens.

1. *INDURATIO TESTICULORUM A PRÆGRESSA INFLAMMATIONE*. Hæc enim sedata inflammatione quandoque remanet. *Curatio* exigit

1. *Mercurium gummosum* cum extracto cicutæ & gratiolæ.
2. *Cataplasma* ex foliis cicutæ & seminibus lini in lacte coctis. Interdum linimentum ex bryonia, mandragora, gratiola, atque unguento neapolitano plus profuit.
3. Quandoque *inoculatio gonorrhææ* ope candelulæ pure gonorrhœico illitæ facta profuit \*)

\*) Primus, quantum scio, Cl. HIRSCHEL, vide *Betrachtungen über den izigen Gebrauch des Mercurii subl. cor-*

2. *INDURATIO EPIDIDIMIDIS.* Hæc resoluta quamvis tumore testiculi per multos annos remanet.

3. *INDURATIO TESTICULI CANCROSA.* Noscitur dolore lancinante, duritie lapidea testiculi, scirrum inveteratum excipiente.

*rofivi 1765. Berlin*, mentionem inoculationis gonorrhææ in testiculorum induratione fecit. Methodus autem gonorrhæam inoculandi sequenti modo peragitur. Nempe immittitur in urethram viro, gonorrhæa virulenta laboranti candelula, hæcque per aliquot horas in urethra relinquitur, donec candelula bene materie gonorrhœica fuit inuncta. Jam hæc introducitur confestim in uretham hominis adstantis morbo ex gonorrhæa suppressa laborantis, ibique per 4 vel 6 horas asservatur, donec ardor & reliqua gonorrhææ symptomata apparuerint. *Experiissimus Chirurgus militaris ODENKIRCHEN* militi 30 annorum laboranti scirro testiculi sinistri, æquante duorum pugnorum magnitudinem, & lignea duri tie prædicto, ad tactum tantum dolente, ex gonorrhæa ante quatuor annos suppressa caussato, candelulam pure venereo illitam immisit in urethram, ibique per septem horas reliquit, quo temporis spatio elapsa gonorrhæa cum suis symptomatibus apparere incepit, quam altero die binis novis immisis candelulis ita auxit, ut rivi instar fueret, que eam lege artis tractavit. Et jam revera sub ejus decursu minui animadvertisit testiculum, novam ideo fecit inoculationem, eamque ad finem vergentem tam saxe repetiit, donec decem hebdomadarum spa-

*Curatio* exigit extirpationem testiculi, si funiculus spermaticus nondum ad annulum inquinalis usque induratus inventiatur.

### ULCERA VENEREA SCROTI.

Sunt ulcera in scroto a viru venereo excitata.

Respectu *sedis* sunt triplicia.

I. *ULCERA SCROTI CUTANEA*, quæ in sola corte sedent, lata, superficialia, in ambitu rubra, in medio sordida sunt.

Facile *curantur* interno usu mercurii gummosi ac externa applicatione balsami mercurialis aut solutionis aquosæ sublimati.

---

tio testiculus affectus ita resolutus fuerit, ut sano perfecte similis esset. Hoc experimentum dein sepiissime in morbis testicularum semper optimo cum successu repetiit. Inoculationes cum benigna materia gonorrhœica institutæ raro succedebant, nam in permis nulla oriebatur gonorrhœa, in aliis vero mucosa tantum, morbum plane non tollens. Quum in praxi privata non semper habetur virus gonorrhœicum virulentum, hinc suadente Celeberrimo & doctissimo Medico LANGE, servabantur septem candelulae bombice & viru venereo imbutæ per 4 & 5 menses in vitro bene obturato; at unica ex his candelulis levem fecit gonorrhœam, quæ penitus testiculum resolvere non potuit. Vide Cl. LANGE *commentatio medico-chirurgica de ophthalmia. Tironaviae 1777. p. 75.*

2. *ULCERA SCROTI TESTICULARIA*, quæ in substantiam testiculi penetrant, noscuntur stillo, prægressa inflammatione, supuratione testiculi & exitu substantiæ albicantis subfibrosæ.

Si hæc testiculi substantia continuo exprimitur, tunc sanato ulcere *tabes testiculi*, vix nucis magnitudinem habentis, remanet.

*Curatio* exigit præter internum mercurii usum, ut substantia testiculi non exprimatur & solutio sublimati cum balsamo commendatoris externe applicetur.


3. *ULCERA SCROTI URINOSA*, quæ in urethræ cavum penetrant, conum unum vel plures spongiosos in postica scroti parte formant, qui rubent, dolent, post urinæ fluxum ex urethra subito intumescent ac dein ex innumeris poris urinam sudoris forma eructant, ac paulo post aliquantum iterum demutescent. \*)

*Curatio* præter internum mercurii gummosi usum exigit.

1. *Candelulam cavam*, balsamo mercuriali illitam, cavo urethræ immittendam, ut ulcus in urethræ cavo apertum sanetur atque ut simul fluxus & infiltratio urinæ in tellam cellulosam scroti impediatur.

\*) *Illust. Van SWIETEN Comment. T. V. p. 427.*

2. *Conus fungosus* in scroto saepius leniter exprimatur ac solutione aquosa sublimati deligetur.



## MORBI GLANDULÆ PROSTATÆ.

### INFLAMMATIO PROSTATÆ VENEREA.

**E**st inflammatio glandulæ prostatæ a viru venereo.

*Signa* sunt

1. *Sensus gravitatis, ardoris & doloris* in intestino recto. Totum *hypogastrum* quandoque dolet.
2. *Digitus* intestino recto immissus tuberculum durum & calidum sub collo vesicæ tangit. Si tumor admodum magnus est, tunc etiam in perinæo aliquantum tangitur.
3. *Midus urinæ* difficillimus est ac paullatim penitus supprimitur.
4. *Catheter* difficillime vel plane non in vesicam immitti potest ac obstaculum ante collum vesicæ offendit.
5. *Fæces alvinæ* duriusculæ crenam exhibent impressam; vehementissimus & continuus observatur *tenebris* quandoque, quamvis fæces alvinæ egerantur liquidissimæ.

Hæc inflammatio periculi est plenissima , non raro enim in vesiculos seminales totamque vesicam urinariam proserpit & intra triduum sphacelo vesicæ necat. \*)

6. Quandoque gonorrhæa simul adest, quandoque a suppressa gonorrhæa malum est ortum.

*Curatio* exigit revocationem gonorrhææ & resolutionem inflammationis. Hæc indicationes obtinentur.

1. Per venæfæctionem

2. --- emulsionem refrigerantem

3. --- pilulas ex mercurio gummoſo.

4. --- Fomenta ex farinis emollientibus & aqua vegetominerali paratis.

5. --- enemata exigua ex aqua vegetominali & emollientibus herbis parata.

## ABSCESSUS VENEREUS PROSTATÆ.

Est tumor purulentus glandulæ prostatæ.

1. *ABSCESSUS CLAVUS*. Noscitur.

1. ex signis *inflammationis prægressæ*.

2. --- *tačtu* tumoris in intestino recto sub stadio inflammationis duri , jam nunc mollioris & fluctuantis.

\*) Cel. TUBB Medicamenta circa methodum luis venereæ curandæ. Upſalæ. 1777. p. 48.

3. --- *catheteris* facilitiori applicatione.

*Curatio.* Si prostatæ inflammatio resolvi se non finat, tunc

1. *Cataplasma* emollientissima perinæo applicentur, ac
  2. similia *enemata* ano injiciantur.
  3. Si tumor intestino recto jam mollis & fluctuans digito percipiatur & sua sponte non rumpatur, tunc vel applicatione *catheteris* urethræ profunde immissi vel acu triquetra, curva, ano immissa aperiri potest.
2. *ABSCESSUS APERTUS.* Prostatæ abscessus quadruplici modo rumpi solet
1. in *urethram*, in hanc frequentissime præsertim sub applicatione catheteris subito rumpitur.
  2. --- *intestinum rectum*, quod rarius contingit.
  3. --- *vesicam urinariam*, quod quandoque observatur.
  4. --- *perinæum*, quod sæpius jam visum fuit.

*Noscitur* ruptura 1. si subito magna puris coeti copia vel ex urethra, vel ex vesica cum urina emissâ vel ex ano vel ex abscessu perinæi erumpit.

2. Si urinæ iter liberum reddatur, atque febris reliquaque symptomata inflammatoria subito & penitus remittant.

*Curatio abscessus aperti exigit injectiones detergentes vel in anum vel in urethram immittendas, quæ ulcus apertum consolidant.*

*Interne detur mercurius gummosus.*

## SCIRRHUS VENEREUS PROSTATAE.

Est glandulæ prostatæ induratio a viru venereo.

1. *SCIRRHUS VULGARIS.* Signa sunt

1. Prægressa *inflammatio* glandulæ prostatæ, quæ in abscessum non abit.
2. *tardus* tumoris duri vix dolentis in intestino recto.
3. Urinæ *emissio* difficilis
4. Fæces duriusculæ, ano emissæ *crenam* in medietate impressam exhibentes.

*Curatio* exigit ut scirrhus resolvatur, hinc detur

1. *Mercurius gummosus* cum extracto cicutanæ, gratiolæ & aconiti.
2. *Unguentum mercuriale* cum unguento de arthanita perinæo applicetur.
3. *Candelula* urethræ applicetur. An inoculatio gonorrhææ tentanda?

4. Si vero totalis urinæ retentio a scirrhio  
prostatæ oriatur , tunc ope lithotomi  
discindatur corpus glandulæ scirrhosæ ,  
ut glandula in suppurationem deduci  
possit.
2. *SCIRRHUS FUNGOSUS PROSTATÆ.* Hanc  
peculiarem prostatæ degenerationem atten-  
ta cum cathetere exploratio vesicæ forsitan  
detegere posset. *Medelæ* vix locus esse vi-  
detur. An facta lithotomia excisio fungi  
aut ligatura tentanda ? \*)
3. *SCIRRHUS CANCROSUS.* Dolor & reliquam  
cancri signa , quæ docent scirrum in  
cancrum abire , simul docent malum lethi-  
ferum adesse. *Cura* palliativa adhibenda.

\*) *Celeberrimus ZUBER* in cadavere viri septuagenarii  
malæ frugis hominis , secta vesica urinaria fungum  
ingentem vidit , qui ex glandula prostatæ natales  
duxit & totam fere vesicam explebat , summitate  
ejus excepta. Durus erat in loco originis , sensim  
sensimque emollescebat ejus habitus , nec ulli ve-  
sicæ lateri erat accretus. Diducebat hic fungus la-  
tera colli vesicæ , ideo sub fungo perpetuum urinæ  
stillicidium contingebat. Induratio glandulæ prosta-  
tæ , viru venereo constanter lacesita , ut aliæ partes  
vasculosaæ nervosæ in fungum degenerante videtur.  
*V. ZUBER Diss. de vesicæ urinariæ morbis. Argento-  
rati 1771. p. 58.*

---

## MORBI PERINÆI ET ANI.

---

### FISTULA PERINÆI VENEREA.

**E**st fistula in perinæo a viru venereo orta.  
*Species* sunt.

1. *FISTULA PERINÆI AD URETHRAM PENTRANS.* Noscitur, si urina ex fistula sub emissione urinæ e multis foraminibus exit. Referunt hæ fistulæ conum fungosum multis aperturis urinam quasi exsudantem.

*Curatio* præter internum usum *mercurii gummosi*, exigit

1. Ut urethræ imponatur *candelula cava* balsamo *mercuriali* illita, ne urina sub exitu ex urethra in tellam cellulosam perinæi infiltretur, ac ulcus in urethra consolidetur
2. Loco fistuloso perinæi *balsamus mercurialis* vel *solutio sublimati* applicetur.

2. *FISTULA PERINÆI AD GLANDULAM PROSTATAM PENETRANS.* Noscitur ex signis prægressæ inflammationis & suppurationis glandulæ prostatæ, ac subsequente abscessu perinæi.

*Curatur* interno usu *mercurii gummosi* ac externa applicatione balsami *mercurialis* vel *solutionis mercurialis*.

3. *FISTULA PERINÆI AD VESICULAM SEMINALEM PENETRANS.* Noscitur prægressa inflammatione & suppuratione vesiculæ seminalis, subsequentे abscessu perinæi & effluxu semenis.

*Curatur* quamvis difficilius ut prior species.

### FISTULA ANI VENEREA.

Est fistula in ani ambitu a miasmate venereo orta.

1. *FISTULA ANI EXTERNA*, quæ a furunculo venereo ani aut condylomate male curato originem habet & intestinum rectum non penetrat.

*Curatio* peragitur usu interno *mercurii gummosi*. Externe solutio sublimati injici vel applicari potest, quandoque balsamo mercuriali solo sanatur.

2. *FISTULA ANI INTERNA*. Ab ulcere glandulæ prostatae vel vesiculæ seminalis ut plurimum oritur. *Noscitur* hinc ex prægressa inflammatione & suppuratione harum partium, & semenis sub coitu effusione in intestinum rectum. \*)

*Curatio* tentari potest injectione solutionis mercurialis atque interno usu mercurii gummosi. Si sanatio non succedat, fiat dissectio omnium partium subjacentium,

---

\*) III. SAUVAGES, *Nosol. method.* T. II. p. 411.

ut medicamenta ad locum læsum seu fundum fistulæ applicari queant.

### ARCTURA VENEREA ANI.

Est orificii ani & intestini recti spontanea contractio a viru venereo.

*Curatio* exigit ut contractum intestini orificium

1. *Candela*, balsamo mercuriali illita, dilatetur.  
Candelæ sensim adhibeantur crassiores.  
Interne detur merc. gummosus.

2. Si contractio candelis dilatari se non finat,  
fiant leves *scarificationes* orificii ani,  
atque continentur candelæ. \*)

### CONDYLOMATA VENEREA.

Sunt excrescentiæ fungosæ a viru venereo ortæ.

Frequentissima *sedes* harum excrescentiarum in viris sub præputio glandis, in feminis juxta anum est. Interim ea etiam in labiis vulvæ, in toto scroto, in inquinibus, in ore, in

\*) Hanc dissectionem in quodam viro a *Cel. BRAMBILLA* cum fructu institutam fuisse scio. V. *Ill. VAN SWIETEN Comment.* T. V. p. 451. *Cl. SHARP* querter viderat intestinum rectum adeo contractum circa annum ut in uno ex his ægris cavum intestini non excederet diametrum calami scriptorii, v. *Critical Enquir. &c.* p. 143.

facie,

facie, imo semel ea in toto fere corpore  
etiam inter digitos pedis vidi.

Videtur morbus papillarum cutanearum, viru-  
nereo irritatarum & excrescentium esse.

Respectu figuræ & magnitudinis varia obtinent  
nomina, ut

I. *CONDYLOMATA CRISTOSA*. Hæc cristis  
gallinaceis, fructibus rubi idæi aut mori  
rubri figura & magnitudine sunt similia.

*Curatio* præter internum usum mercurii  
sublimati exigit ut hæc excrescentiæ quoti-  
die bis aqua caustica ad condylomata vel  
forti solutione sublimati mediante penicillo  
illiniantur ac illico linimento mercuriali  
obtegantur. Sic facile intra aliquot hebdo-  
mata evanescunt \*)

\*) Celeberrimus chirurgus W. DEASE pluribus demon-  
strat observationibus condylomata repetitis etiæ  
salivationibus vel non evanescere vel saltem radica-  
liter non curari. V. Medicinische Commentarien von  
einer Gesellschaft der Aerzte zu Edinburg. 4. Th.  
304. S. Ego autem testari possum, me centies  
observasse ingentem numerum condylomatum mea  
methodo radicaliter intra 3 vel 4. septimanas cu-  
rari. Curatio autem non succedebat, si loco aquæ  
causticæ ad condylomata, lapide infernali, vi-  
triolo viridi aut butyro antimonii fuerint usus.  
Cel. GARDINER condylomata vidit adeo indurata ut  
nullo caustico afficerentur, at cum hæc cepa oleo

2. *CONDYLOMATA FICOSA*, quæ glabra sunt ac figura & magnitudine ficum referunt. Hæc species crasso pedunculo pendet, ac optime per ligaturam vel abscissionem auffertur.
3. *CONDYLOMATA THYMOSA*, quæ magnitudine & figura caput brassicæ caulifloræ repræsentant. \*) Etiam hæc species cultro vel forfice afferri debet.
4. *CONDYLOMATA PAPILLARIA*. Quandoque tota cutis in scroto, vel in inquine vel circa anum minimis papillis ingenti numero scatet, quæ papillæ microscopio visæ, vera exhibent ut observavi condylomata minutissima.

*Curantur eadem methodo ac condylomata cristosa.*

---

cocta fuerint emollita, tunc insperso pulvere sabinæ abigabantur. V. *Neue Versuche und Bemerkungen einer Gesellschaft zu Edinburg.* 3. B. 373. S.

\*) Tum hæc scribo defertur in nosocomium meum puella grava cujus ani orificium excrescentia, infantilis capitis magnitudinem habentem ex meris condylomatibus sex pollices & ultra longis, constante, adeo obsidetur ut vix ulla alvi depositio fieri potest, sèpius de die & nocte præ dolore convellitur. Ideo forfice altero statim die tota excrescentia quæ caput maximum brassicæ caulifloræ referebat, ab ani orificio excidebatur, haemorrhagia non adeo magna fuit, convulsiones post operationem penitus cessabant usu mercurii interno demum penitus curari vide-

## MORBI INQUINUM.

### BUBONES VENEREI.

**S**UNT tumores glandularum inquinalium, quorum modo unus modo plures in uno vel utroque inquino nascuntur.

Ipsorum *figura* ut plurimum teres & oblonga est. *Magnitudo* quandoque exigua, quandoque ovi columbini aut gallinacei, imo pugni magnitudinem excedit.

In nutrīcibus venercum infantem lactantibus bubones *sub axillis* observantur. Semel bubenem *in pube* vidi. In infantibus a vene-  
reō nutrice lactatis bubones *submaxillares* seu scrophulæ venereæ oriuntur.

Ratione *aquisitionis* habetur quadruplex bubo-  
num varietas

1. *BUBO GONORRHÖICUS*, qui in gonor-  
rhœæ stadio inflammatorio persæpe obser-  
vatur ac remittente inflammatione urethræ  
iterum sponte evanescit. Videtur hæc spe-  
cies e sola inflammatione urethræ per  
consensum nervorum oriri.

---

batur; at incidit paulo post in dysenteriam autum-  
nalem, epidemice in furentem, peperit & post par-  
tum soporosa evadit, moritur.

*Curatio* bubonis consensualis exigit antiphlogistica.

2. *BUBO AB INFECTIO NE TOPICA*. Miasma venereum suppressa aut parcus fluente gonorrhæa, frequentius vero ab exsiccato lucifculo glandis vel præputii, ope vasorum lymphaticorum glandulis inquinalibus illatum, hanc bubonis speciem producit.

3. *BUBO AB INFECTIO NE UNIVERSALI*. Hæc species lui jam universali præsentí supervenit.

4. *BUBO A LUE LATENTE*. Quandoque sine præsentibus aliis luis venereæ signis erumpunt e lue latente bubones \*)

Respectu *indolis* sequentes observantur bubonum varietates.

1. *BUBO PHLEGMONOIDEUS*. Rubet, callet, dolet, duriusculus est ac ad ovi gallinacei magnitudinem increscit. Vix resolvi potest, ut plurimum in suppurationem abit.

*Curatio*. Incipiens bubo cataplasmate resolvente ex farinis & radice mandragoræ in aqua vegetominerali coctis, aut limento ex melle & radice mandragoræ tegatur. *Interne* pilulæ ex mercurio

---

\*) Ab usu decocti stipitum dulcamarae quandoque bubones venereos latentes evolvi. *III. SAUVAGES* adnotavit. *Nosol. meth. T. II. p. 549.*

gummoso, ac omni tertio die purgans  
detur. Diæta fit antiphlogistica.

**2. BUBO SUPPURATORIUS.** Si bubo inflammatus hac methodo discuti nequeat, tunc emplastro diachilon, unguento basiliconis & cataplasmate emolliente *suppuratio* est promovenda. Diæta fit aliquantum lautior; ac percepta fluctuatione tumoris est incisio facienda.

Si autem bubo his remediis ad perfectam fluctuationem perduci nequeat, tunc particula lapidis caustici, quæ lentis magnitudinem habet, una alterave hora bubonis medietati applicetur; inusta eschara unguento basiliconis cum neapolitano mixto ac cataplasmate emolliente deligetur. Sic bubo insensibiliter se evacuat ac sensim evanescit. *Interne* pilulæ ex mercurio gummoso continuuntur. \*)

\*) Hac methodo multos bubones, quos emplastro vel unguento mercuriali aliisque medicamentis resolve-re non potui, felicissime intra 3 vel 4 septimanas curavi. Quandoque jam intra horam medianam & citius lapidem causticum amovi & exigua eschara inusta pro curatione suffecit. Dolor e caustico non fuit magnus, reliqua bubonis portio sensim in suppurationem abiit & evanuit; nunquam ulcus mali moris exinde oritur. Si vero ut multi solent magna lapidis caustici portio per 12 vel plures horas bu-

3. *BUBO INDURATUS.* Noscitur duritie ac indolentia. Adeo quandoque est pertinax ut nec resolvi nec in pus mutari ullo remedio possit.

*Resolutio* tentetur interno usu mercurii gummosi, extracto cicutæ, gratiolæ ac aliis resolventibus. Externe unguentum neapolitanum cum anatica portione unguenti de arthanita & pulvere radicis mandragoræ mixtum applicetur. Quandoque fomentum ex solutione aquosa sublimitati corrosivi profuit.

Si bubo induratus nullo medicamine resolvi possit nec emollientibus in suppurationem redigatur, tunc lapis causticus eadem methodo, ut in priori specie docui, applicetur.

4. *BUBO ÆDEMATUS.* Quandoque bубonis indurati magnus ambitus œdematosse intumescit ac a digito impresso foveam retinet.

*Curatio* exigit fomentum resolvens aromatum, ac purgantia repetita, quæ præter internum mercurii usum danda sunt.

---

boni applicetur, tunc dolor, inflammatio ac febris excitatur; quandoque bubo exinde gangrenescit, ut plurimum vero ulcerus magnum, serpens, difficilime sanandum, quandoque in verum ulcerus cancroideum abiens sequitur, ut multoties præsertim in putrido nosocomiorum aere observavi.

5. *BUBO GANGRÆNOSUS.* Bubones in corporibus scorbuticis, putridis ac in aëre nosocomico decumbentibus, caustico nimis lato tractati quandoque gangrænescunt.

*Curatio* tunc exigit usum in & externum antisepticorum, corticis, camphoræ, arnicæ.

6. *BUBO EXULCERATUS.* Ulcera e bubonibus nata quandoque levia sunt & aqua phagædenica vel balsamo mercuriali facile sanantur. At quandoque hæc ulcera late serpunt, vehementer dolent, papillosa fiunt, nulli remedio cedunt ac cancercentem indolem exhibent.

*Curatio* exigit ut interne mercurius gummofus cum conserva cicutæ & cortice peruviano detur.

*Externe* solutio sublimati corrosivi cum melle & extracto cicutæ mixta profuit. \*) Laudatur etiam admissio aëris fixi. \*\*)

\*) Ulcus in utroque inquine cancroideum ad perinæum in dextro latere excurrens, jam a sepiem mensibus durans interdicto usu mercurii gummofisi bono viatu & solutione ex IV granis mercurii sublimati corrosivi in una uncia aquæ & totidem mellis parata intra 6 septimanas integre sanavi.

\*\*) Ulcus cancroideum inquen sinistrum, radicem penis, partem scroti & purinæi misere devastans aëre fixo

7. *BUBO FISTULOSUS.* Bubo suppurans, hinc  
inde aperitur ac fibi relictus uno vel plu-  
ribus locis fistulas quandoque profundas  
contrahit.

*Curatio* exigit ut finus fistulosi aperiantur,  
ac ut prior species tractentur.

8. *BUBO CANCROSUS.* Bubones per multos  
annos fibi relictæ, aut medicamentis incon-  
gruis tractati in vera carcinomata scirrho-  
sa vel fungosa degenerant. \*)

*Curatio* exigit excisionem carcinomatis si  
spes est totam massam penitus extirpari  
posse.

## PHYSCONIA VENEREA ABDOMINIS.

Est adipis subcutanei induratio in abdome a vi-  
ru venereo.

externe applicato ac interne cum potu dato cura-  
tum legitur. *Sammlung der auferlesensten und neuesten  
Abhandlungen für Wundärzte.* 2. St. 85. S.

\*) In viro qui bubonem venereum a septendecim annis  
in inquine gessit, subito adeo angebatur tumor ut  
tum illum viderem tres pugnos magnitudine supe-  
raret, dolens, durissimus, ac inæqualis fuit, periit  
miser tabe consumptus. Vedit *Celeber. PIETSCHEN*  
ex bubone venereo fungum cancerosum pilei caput  
magnitudine & quantem subito excrescere & agro-  
tum necare. *Geschichte praktischer Fälle von Gicht  
und Podagra.* VI. Tb. p. 5.

*Curatio* exigit præter internum mercurii usum, ut induratio unguento neapolitano aliquoties inungatur. \*)

---

## MORBI CUTIS VENEREI.

---

### M A C U L Æ V E N E R E Æ.

SUNT maculæ rubro - flavæ, circulares, parum elevatæ, cum margine albido. A viru venereo ortæ.

Frequentissime circa frontem erumpunt & sic dictam *coronam venereum* constituunt. Non raro in facie, in antica parte thoracis, & inter scapulas, quandoque in toto fere corpore existunt.

Valde pruriunt, quandoque exiguae ut ephelides, quandoque admodum latæ sunt. In *infantibus* a matre venerea natis paullo post partum circa anum & ambitum genitalium primo erumpunt.

---

\*) In viro syphilitico abdomen mire turgebat & adeps subcutaneus abdominis induratus fuit. Celebrata autem hydrargyrosi & abdomine septies unguento neapolitano inuncto, evanuit abdominis protuberantia. SAUVAGES *Nefol. meth.* T. II. p. 490.

*Curatio* exigit internum usum mercurii gummosi. *Externe* aqua phagadænica aut diluta solutione sublimati corrosivi lavari debent.

### S C A B I E S V E N E R E A.

Sunt papulæ duræ, rubræ, in apice suppurantes & crustosæ, quæ cum maculis venereis cuprei coloris in fronte vel aliis partibus erumpunt.

*Curantur* ut maculæ venereæ.

### R H A G A D E S V E N E R E Æ.

Sunt fissuræ siccæ & profundæ, quæ in cute circa anum & vulvæ orificium, quandoque etiam in volis manuum ac plantis pedum observantur.

*Curantur* admodum difficulter. Interne danus est mercurius gummosus. *Externe* solutio saturata mercurii sublimati & pomatum ex mercurio præcipitato albo vel rubro adhibetur.

### P S Y D R A C I A V E N E R E A.

Sunt maculæ rubræ, multum elevatæ, in ulcera cutanea brevi abeuntes.

Frequentissima *sedes* est in cruribus ac circa anibrachium, quandoque circa anum & genitalia.

Raro diu sine exulceratione adsunt, hinc illico præter internum usum mercurii solutione mercuriali sèpius lavari debent.

### H E R P E S V E N E R E U S.

Est macula rubra, minimis papulis vel vesiculis in furfures abeuntibus plena.

Auribus & capillatæ capitî partî frequenter, quandoque etiam thoraci aliisque partibus infidere solet.

*Curatio* exigit ut interne mercurius gummösus detur. *Externe* lotio herpetis cum aqua phagadenica vel solutione sublimati prodest. \*)

### T I N E A V E N E R E A C A P I T I S.

Est agmen crustarum ficcarum vel albarum vel viridescentium quæ in capitî parte capillata quandoque simul circa frontem & tempora in venereis observari solent.

I. *TINEA ALUE UNIVERSALI*, quæ maculas venereas aliqua symptomata luis venereæ simul secum juncta gerit.

\*) Feminam, quæ multas ac palmam latas herpetes in thorace, brachiis ac femoribus gerebat hac methodo nuper curavi. Herpetum a miasmate latente

*Curatur interno usū mercurii gummosi. Externe balsamum mercuriale hinc inde prudenter illiniatur. In malo inveterato lotionem cum aqua phagadenica vel solutionem sublimati corrosivi deprehendi utilem.*

2. *TINEA A LUE LATENTE*, quæ in infantibus a matre venerea natis aut nutrice simili lactatis sine aliis luis venereæ notis deprehenditur. *Curatio* est eadem ac in priori specie. \*)

---

exempla refert *Cel. FABER* Vol. I. p. 289 & 332.  
Vide etiam *Celeberrimi SCHMUCKERS Chirurgische Schriften.* I. B. 166. S.

\*) *Cel. Medicus classarius KOEHLER* vidit cum nosocomium, quod Neapoli curandis infantibus tinea capitis laborantibus vacat, frequentaret, 283 infantes e numero 400, a parentibus, qui in eodem nosocomio morbis venereis ægrotabant, natos esse. Statuit porro *Illustris Archiater ROSENSTEIN* tineam capitis, quæ vel peñinum vel mitrarum ope in alios propagatur, venereæ esse indolis; nam usū externo & interno spiritus mercurialis SWIETENII maximas capitis tineas sanavit. V. *Anweisung zur Kenntnis und cur der Kinderkrankheiten.* 662. S. Ego plures infantes & adultos tineosos interno usū mercurii gummosi quandoque cum quandoque sine capitis ablutione cum aquosa sublimati solutione feliciter curavi.

## ALOPECIA VENEREA.

Est capillorum, vel pilorum totius corporis de-  
fluvium.

Quandoque supercilia, cilia ac pubes a viru ve-  
nereo defluunt.

*Curatio.* Si bulbi pilorum a viru venereo  
jam destructi sunt, tunc pili non amplius  
curata quamvis lue recrescunt.

## UNGUIUM CORRUPTIO.

Est unguis unius vel plurium corruptio ulcerosa.

Hoc vitium frequentius in pedum quam manuum  
digitis observatur. Quandoque a lue uni-  
versali, quandoque a latente est. \*)

*Curatio* interno usu mercurii gummosi pera-  
gitur si *externe* simul solutio sublimati  
corrosivi cum spiritu vini mastichino mixta  
applicetur.

\*) BERNARDINUS TOMITANUS qui circa centesimum cir-  
citer a huius initio annum scripsit, dicit, *Vidit ætas  
proxime asta, in multis fieri dentifluvium; parcus  
nunc id videmus ac multo sæpius, cadere supercilia,  
capillos & barbam experimur.* ANTON MUSA BRAS-  
SAVOLUS unguis a lue cecidisse, pilos accidentes de-  
fluuisse ad notat. V. III. VAN SWIETEN Comment.  
T. v. p. 406.

## P R U R I T U S V E N E R E U S.

*Est sensatio quæ ad scalpendum cogit a viru venereo orta.*

1. *P R U R I T U S G E N I T A L I U M.* A coitu impuro in viris in capite penis, in feminis in finu vulvæ adeo vehemens quandoque est ut unguibus sibi cutem fere abradunt, multosque dies durat.

*Curatio* exigit ablutionem cum solutione aquosa sublimati aut applicationem unguenti mercurialis.

2. *P R U R I T U S U N I V E R S I C O R P O R I S.* Ante & sub eruptione macularum aut miliarium venerearum ingens pruritus in toto quandoque corpore observatur, præsertim circa vesperas.

*Curatio* exigit internum usum mercurii gummosi; Balnea, ablutionem cum sublimato.

## L E P R A V E N E R E A.

Cutis pilis destituta, rhagadibus, tuberibus & crutis faciei aliarumque partium a viru venereo defœdata, dicitur *lepra venerea.* \*)

\*) Cel. RAYMOND vide *Traité des Maladies qu'il est dangereux de guérir*, p. 357, sequentem habet observationem: Mulier quinquagenaria habebat oculos solito turgidiores & rubros cum debili visu, nulla cilia, nec supercilia, labia crassa tumida, vocem

*Curatio* præter internum mercurii usum exigit ut tota corporis superficies solutione mercuriali largetur. Vera autem lepra mercurio non curatur. \*)

---

debilem, raucam, nasum depresso, nares patulas, humorem fœditum exstillantes, frontem rugosam, caput omnino calvum, lobos aurium solito crassiores, cutem omnino glabram sine pilis, lucidam, crassam, asperam, inæqualem, pluribus in locis indurataam, aliqualem pruritum in toto corpore, agheustiam, anhelitum sordidum cum cappitis gravitate & auditu obscuro. Maritus syphilide laboraverat & hoc solum morbi principium incusari in muliere potuit; unde adhibita hydrargyrosi intra duos menses ea mulier omnino convaluit, cutis mollitiem, caput capillosum suos, visus & auditus suam acutiem recuperarunt. Etiam lepræ species, quæ in nosocomio florentino S. EUSEBII, externo usu sublimati corrosivi curatur, venereæ indolis esse videtur *V. Dissertatione sopra le malattie, que si curano nel regio spedale di S. EUSEBIO in Fiorenze.*

1771.

\*\*) Nihil frequentius est connubio leprosi & venerei veneni dicit *Cel. SCHILLING* in suo egregio libro *de lepra* p. 39. & 40. Nam homines lepra affecti tum inter initia, quam in progressu morbi ad rem venereum mirabiliter incitantur. Hoc igitur stimulo incitati variam frequentissimamque venereum exercent, atque sic virus leprosum cum aliis communicant & vicissim venereo ab aliis hausto inficiuntur. Sunt autem inter symptomata conjunctorum horum mis-

## ULCERA VENEREA CUTIS.

Sunt ulcera solam cutem infestantia , ut plurimum rotunda , lardacea , quorum margines molles sunt & rubent.

Multum convenientiunt ulcera venerea lata cum cancro nerveo , at in ulceribus venereis margines sunt molles & rubicundi in cancrosis sunt durissimi & pallidi. \*\*)


i. *ULCERA A LUE UNIVERSALI.* Hæc oriuntur a prægressis syhydraciis aut pustulis venereis , facile noscuntur ex prægressis vel adhuc præsentibus symptomatibus venereis.

*Curatio* usu interno mercurii gummosi. *Externe* balsamum mercuriale aut solutio aquosa sublimati applicetur.

matum imprimis ulcera cancerosa pudendorum ad omne genus medicaminum rebellia. In his tentavit mercurii usum sed semper mala inde symptomata vedit producta. Omninoque multiplici experientia observavit mercurium superando veneno leproso prorsus ineptum esse , lepram exasperare ac ut plurimum putridissimam producere dysenteriam. Existunt adhuc authores , qui opinantur lepram veterum fuisse luem venereum , vel hanc luem a coitu cum leprosa fuisse ortam ; at lepra vera non inficit genitalia , nec curatur mercurio , & dudum ante luem venereum cognitam medicis fuit nota.

\*) BIRCHEN von den Kennzeichen der Krebschaden. p. 81.

2. *ULCERA A LUE LATENTE.* Hæc sine consuetis luis venereæ signis a lue hæreditaria vel aquifita & male curata oriuntur. In perso mercurio dulci evadunt pura, si sunt venerea, non autem si ab alia causa excitantur. \*)



## MORBI VENEREI OCULORUM.

### OPHTHALMIA VENEREA.

**E**st oculi rubor & dolor a viru venereo.

*Species* sunt

1. *OPHTHALMIA GONORRHOICA.* Est oculi vehementis inflammatio, quæ in viris a suppressa gonorrhœa; in mulieribus a suppresso fluore albo oritur. *Causa* est materies gonorrhœica ex urethra ad cellulosem substantiam membranæ conjunctivæ, bulbi & palpebrarum superficiem obducentis, per metastasim deposita.

*Diagnosis.* Biduo vel triduo post suppressam gonorrhœam oritur uberrimus fluxus ex oculo rubente humoris puriformis, alboflavescens & materiæ gonorrhœicæ, ante ex pene stillanti, simili. Rubor oculorum fere semper in

---

\*) *Ill. ROSENSTEIN l. c. p. 674.*

*chemosim* seu adeo gravem inflammationem abit, ut cornea obscuretur & ob enormem membranæ albugineæ intumescentiam in foveam quasi depressa appareat.

Hæc ophthalmia ut plurimum in suppurationem & exulcerationem corneæ ac albugineæ abit, ex quibus opacitas corneæ, vel hypopyum vel immedicabilis cæcitas a destrutis partibus internis bulbi remanet. \*)

*Curatio* exigit ut mox incipiente oculi inflammatione

1. *Vena* seccetur ac *purgans antiphlogisticum* detur.
2. *Mercurius gummosus* interne quotidie ad grana 30 detur.
3. *Oculus inflammatus laze mercuriali* vel solutione dilutissima sublimati corrosivi mediante parva pelvi ophthalmica vel alio vasculo omni hora balneetur.

Hac sola methodo ego multos feliciter curavi & cæcitatem præverti.

*Curatio* hucusque consueta, nempe *venæfæctiones, hirudines* ad oculorum canthos,

\*) CAMERARIUS *Dissertat. de ophthal. venerea.* 1734.  
ROWLEY *on the diseases of the eyes.* London 1773. &  
C. SCHMUCKER. *Chirurg. Wahrnehmungen.* I. Th.

*vesicatoria, fonticuli, purgantia per octiduum data, cataplasmata discutientia ad oculum & emollientia balnea ad penem, ut gonorrhæa revocetur. Ophthalmoxysis & conjunctivæ excisio nihil juverunt. Ego multos cum hac methodo excæcatos vidi.*

Quid gonorrhææ inoculatio, ope candelulæ, pure gonorrhœico maligno illitæ & urethræ immissæ, ad revocandam in hoc morbo valeat, tentandum est. \*)

## 2. OPHTHALMIA A LUE UNIVERSALI.

Hæc species ab acrimonia venerea per totum corpus diffusa originem dicit. Rubor

) Cel. LANGE *commentatio de ophthalmia.* p. 75. Mira nuper hic loci contigit historia hujus morbi. Lanio ex gente rasciana gonorrhæa laborans aliquot uncias olei terebinthinæ hausit, ut sibi gonorrhæam curaret. Suppressa gonorrhæa subito vehementissima ophthalmia gonorrhœica utriusque oculi afficitur. Chirurgus, qui me hac de re consuluit, ægrotō gonorrhœam ope candelulæ infectæ inoculare tentavit, at agrotus id non admisit, dicens se leniori via sibi revocaturum esse gonorrhœam, adiit ideo eandem, a qua gonorrhœam obtinuit, meretricem, ac altero jam die profusissima gonorrhœa laborabat, oculi inflammatio remisit, & solo interno usu mercurii gummosi intra 6 hebdomadas ab utroque vi-  
tio perfecte curabatur.

ehronicus est non autem adeo vehemens ac in ophthalmia gonorrhœica; circa auroram hæc species remittit ac nunquam ut gonorrhœica in chemofim oculi abit.

*Curatur usu interno mercurii gummosi. Externe balneam ex lacte mercuriali vel balsamum ophthalmicum mercuriale applicetur.] Decoctum malvæ in cuius libra una granum unum mercurii sublimati solutum erat quandoque cito profuit.*

### L I P P I T U D O V E N E R E A.

Est exsudatio humoris puriformis e marginibus palpebrarum.

1. *LIPPITUDO A SUPPRESSA GONORRHÆA VEL FLUORE ALBO.* Hæc species prodromus accessus ophthalmie gonorrhœicæ est; quandoque autem malum manet chronicum.

*Curatio præter internum usum mercurii gummosi exigit balsamum ophthalmicum rubrum, vel solutionem sublimati in decocto malvæ ut mox in ophthalmia venerea suasi.*

2. *LIPPITUDO VENEREA INFANTUM NEUNATORUM.* Infantes a matre venerea nati aliquot post partum septimanis elapsis intumescentia tarforum palpebra-

lum vexari incipiunt, paullo post ingens copia puris albo-viridescentis, ut ex urethra in gonorrhæa, ex oculo effluit, oculi inflammatio quandoque exigua; quandoque gravis est. Hæc lippitudo primarium signum est luis venereæ in infante latentis, apparet quandoque fine omni alio signo venereo & mala curata in pessimam oculi suppurationem atque exacerbationem abit.

*Curatio* eadem exigit ac prior species.

#### MACULA CORNEÆ VENEREA.

Est coloris alienatio in cornea a viru venereo. Quandoque solummodo *pars* quædam corneæ, quandoque *tota* cornea obscurata est.

1. *MACULA A PRÆGRESSO MORBO VENEREO OCULI.* Ut a prægressa ophthalmia, lippitudine vel ulcere venereo corneæ.

*Curatio* exigit internum mercurii gummosi usum. *Externe* macula vel cornea obscurata solutione sublimati corrosivi omni die bis ope penicilli tangatur, dein unguentum ophthalmicum rubrum \*) ter de

\*) Cel. VOLGER diss. de maculis corneæ. Gotting. 1778.  
p. 16. & Cel. THEDEN Bemerkungen 1771. p. 192.

die lentis magnitudine illiniatur maculae. \*)

2. *MACULA A LATENTE LUE INFANTUM NEONATORUM.* Infantes recens nati quorum mater leucorrhæa laboravit venerea, sæpe cornæ obscuratione & oculi atrophia corripiuntur.

*Curatio* medicamentis in priori specie laudatis, in morbi initio tentata, persæpe juvat.

### ULCUS VENEREUM CORNÆ.

Est ulcus in superficie cornæ a viru venereo.

1. *ULCUS A MORBO VENEREO OCULI,* ut a prægressâ vel adhuc præsente ophthalmia gonorrhœica aut venerea. \*\*)

*Curatio* præter usum internum mercurii gummosi exigit ut externe balsamus ophthalmicus mercurialis & diluta solutio sublimati cum melle rosaceo applicetur.

\*) Illust. VAN SWIETEN solo usū interno sublimati cornæ maculam sanavit. V. Medicinische Bemerkungen einer Gesellschaft von Aerzten in London. III. B. 206. S.

\*\*) Cel. JANIN Abb. über das Auge und dessen Krankheiten. S. 317. Beob. IV.

2. *ULCUS A LUE vel LATENTE vel UNIVERSALI.* In utroque casu quandoque corneaæ ulcera fuere visa. *Curatio* est ut in priori specie.

### HYPOPYUM VENEREUM.

Est puris collectio in antica oculi camera.

1. *HYPOPYUM A GONORRHÆA SUPPRESSA.* Hanc speciem sine oculi vehementi inflammatione vidi. Data purgantia & fomentum ex malvæ decocto cum lacte mercuriali mixto profuit.

2. *HYPOPYUM AB OCULI CHEMOSI VENEREA.* Si cornea a pure in cameris oculi turgente erodatur & rumpatur, tunc oculi humores a pure fusi effluunt, bulbi atrophia & cœcitas immedicabilis sequitur.

*Curatio* incipientis hypopii fit ut in ophthalmia gonorrhœica.

### FISTULA LACHRYMALIS VENEREA.

Est effluxus liquidi puriformis, ex punctis lachrymalibus exprimendi, a viru venereo ad glandulas facci lachrymalis deposito.

1. *FISTULA LACHRYMALIS A SUPPRESSA GONORRHÆA.* Curatur usu

interno mercurii gummosi. *Externe* applicetur tenuissima solutio sublimati aquosa. Quandoque talis fistula a lue latente est. \*)

**2. FISTULA LACHRYMALIS A CARIE OSSIS LACHRYMALIS.** Hæc species est pessima; *curatio* præter mercurialia interna exigit spiritum mastichinum, cum sublimato mixtum, ad cariem applicandum.

### HORDEOLUM VENEREUM.

Est tuberculum rubrum, parvo furunculo simile, in tarsis palpebrarum, a viru venereo na-scens.

*Curatur* interno usu mercurii gummosi. *Externe* lac mercuriale applicetur.

### CATARACTA VENEREA.

Est cæcitas, ab opacitate lentis crystallinæ, a viru venereo orta.

**1. CATARACTA A SUPPRESSA GONORRHÆA.** Quandoque sine ophthalmia gonorrhœica cataracta oritur; bis autem vidi a sanata ophthalmia gonorrhœica remansisse opacitatem lentis crystallinæ.

---

\*) *III. ROSENSTEIN von Kinderkrankb. p. 643. & Cel. FAEBRE Traité des maladies vénériennes, 1. B. 12. S. Cel. PETIT fistulam in utroque sacco lachrymali & ulceris in palato a lue latente orto curavit mercurialibus frictionibus.*

*Curatio usu interno mercurii gummosi aut pilularum ex sublimato tentari potest, si curatio non succedit, tentetur extractio cataractæ. \*)*

### AMAUROSIS VENEREA.

Est cæcitas sine apparente vitio in oculo a viru venereo orta.

#### 1. AMAUROSIS A COITU IMPURO.

Quæ paullo post coitum supervenire visa fuit \*\*) Detur illico purgans & mercurius gummosus.

#### 2. AMAUROSIS A LUE UNIVERSALI.

Hæc species cum dolore oculi ac pervigilio stipatur. Quæ ab *exostosi* nervum optimum premente oritur, aut ab hydatibus venereis retinæ vel nervi optici originem habet, salivatione curari dicitur. \*\*\*).

\*) Celebris chirurgus militaris scripserat mihi se usu pilularum ex mercurio gummoso cataractam a gonorrhœa suppressa ortam in milite quodam sanasse.  
III. SAUVAGES dicit cataractam venereum per spiritum antivenereum aliquando disparere. Ego utrumque remedium sine successu in cataracta venerea tentavi.

\*\*) ZACUTUS paucis post coitum impurum horis amaurosim cum ulceribus & varis faciei supervenire videt. *Praxes Cent. V. obs. 49.*

\*\*\*) *Illust. BOERHAAVE, HEISTERUS, BONNET, & SMITH* in sua *optica* casos narrant amauroseos salivatione

Interne tentetur mercurius gummosus vel  
sublimatus corrosivus cum decocto mezerei.

## MORBI VENEREI AURUM.

### COPHOSIS VENEREA.

**E**ST surditas perfecta vel imperfecta a viru  
venero.

1. *COPHOSIS A GONORRHÆA SUPPRESSA.* Noscitur quod paullo post suppressionem gonorrhææ observetur.

2. *COPHOSIS AB EXOSTOSI aut CERVINE INDURATIO aut CARIE AUDITORII ORGANI.* In lue jam magis universali hæc vitia deprehenduntur.

3. *COPHOSIS A VITIO VENEREO INFaucibus,* ut a tuba Eustachiana per exulcerationem concreta, obstructa, aut a tonsillis tumidis compressa.

*Curatio* in omnibus cophoseos speciebus usum internum mercurii gummosi exigit. \*)

---

curatæ. V. etiam Illust. SCHMUCKER *Vermischte chirurgische Schriften* 2. Teil S. 24.

\*) Celeberrimi TRNKA *historia cophoseos*, p. 116, collegit historias surditatum venearum mercurio curatarum. Ego etiam nuper studiosum a suppressa gonorrhææ surdum mercurio gummoso sanavi.

## OTORRHAEA VENEREA.


Est fluxus humoris puriformis ex meatu auditorio externo.

1. *OTORRHÆA SIMPLEX*, quæ sine ulcerare post suppressam gonorrhæam quandoque contingit.

*Curatio* exigit usum mercurii interni atque injectionem solutionis aquosæ sublimati.

2. *OTORRHÆA CARIOSA*. Ossicula auditus, osseusque aurium fornix carie venerea interduni exeduntur. Hinc fœtor rancidus exeuntis liquoris, exitus ossiculorum auditus, immedicabilis surditas, & si caries processum petrosum ad cerebrum usque peredit, mors contingere potest.

*Curatio* exigit præter internum mercurii gummosi usum, ut in cavum auditus injectiones fiant ex solutione sublimati & spiritu mastichino.



## MORBI VENEREI NARIUM.

## CORYZA VENEREA.

Est humoris puriformis stillicidium e cavo narium sine ulceris præsentia.

1. *CORYZA GONORRHÖICA* seu *GONORRHOEA NASALIS*. Paullo post gonorrhæam suppressam oritur quandoque puriformis & copiosi muci stillicidium e naribus sine ulcere narium. Humor de-stillans est humoris gonorrhœico simili-mus.

*Curatio* exigit internum usum mercurii gummosi. *Externe* tenuissima solutio sublimati corrosivi naribus attrahatur.

2. *CORYZA AB INFECTIONE EXTERNA*. Si mediante muccinio vel digitis virus naribus applicetur. *Curatur* ut species prior. \*)

\*) Cel. TODE Medicinischchirurgische Bibliothek. 7. B. 1.  
St. 22. S. recenset ex Clar. DUNCAN medical cases  
sequentem historiam. Ein junger Mensch, der einen  
Tripper hatte, sah sich genöthiget, eine kurze Zeit sein  
Schnupfruch zu brauchen um das Hemd zu schonen.  
Als er andere Lappen bekommen hatte, stekte er aus  
Unachtsamkeit das Schnupfruch in die Tasche und be-  
diente sich desselben wie vorhin die Nase zu schneizen.  
Die Wirkung war eine Krankheit inwendig in der  
Nase, die in allen stücken einen Tripper ähnlich war.  
Cel. TODE hinc omni jure hunc morbum vocat  
einen Nasentripper.

## O ZÆNA V E N E R E A.

Est ulcus venereum intra vel extra narium cavitatem.

2. *Ozæna externa.* Oritur macula rubra circa alas narium, hæc macula sensim in tuberculum planum elevatur & exulceratur, deystat alas nasi & late serpit, nisi brevi legitima medela adhibeatur.

*Curatio* exigit ut locus externus solutione sublimati tegatur & ut *interne* mercurius gummosus detur.

2. *Ozæna interna.* Est ulcus in ipso narium cavo, quod effluxu puris saniosi ac inspectione narium noscitur.

*Curatio interna* exigit mercurium gummiferum cum afa foetida.

*Externe* iniciatur vel naribus attrahatur aqua phagædenica vel solutio sublimati cum essentia mastichina & melle rosaceo mixta.

3. *Ozæna cariosa*, noscitur effluxu puris saniosi & simul valde foetentis, quandoque fragmenta ossiculorum spongiosorum aut septi narium emunguntur. Nasus totus collabitur.

*Curatio* est eadem ac in priori specie.

4. *Ozæna sinus pituitarri frontalis.* Oritur ulcus cariosum supra ra-

dicem nasi, penetrans in finum pituitarium frontis, quod stillo exploratur.

*Curatio* exigit, ut sanie cariosæ effluxus paretur per orificium sinus in cavum narium patens, si orificium concretum foret. \*)

### DEFORMITAS NASI VENEREA.

Est nasi collapsus vel defectus in uno vel utroque latere.

i. *DEFORMITAS A COLLAPSU.* Si caries septum narium, nasum fulciens, vel ut quandoque fit propria ossicula nasi destruit, tunc totus callabitur nasis externus; facies talium hominum simiæ instar deturpatur & tota vita prægressæ luis signa præfert.

Est malum *incurabile*. Quandoque cum naso tota facies mirum in modum deformatur. \*\*)

\*) Vide M. RICHTER *observ. Chirurgic. Fasc. II.* p. 44.

\*\*) Miram totius faciei a lue inveterata defomitatem depingi curavit SEVERINUS in libro *de abscessuum recondita natura. Neapoli 1763*, p. 178. Vidi ego feminam ruralem, cui a lue inveterata totus adeo evanuit nasis, ut ejus loco exigua prominentia, quæ vix pisí magnitudinem æquabat cum foramine

2. *DEFORMITAS A DEFECTU LATERALI NASI.*

Quando in uno vel utroque latere nasi alæ cartilagineæ ulcere consumuntur, tunc nasus in uno vel utroque nare turpiter hiat & deficit.

Malum ut prius est *incurabile*.

## PARAPHONIA VENEREA.

Est vocis sonus ingratus.

1. *PARAPHONIA A VITIO NARIUM.* Si

nares ab ulcere vel tumore venereo obturantur, tunc sonus solo ore fine concurrentibus naribus editur.

2. *PARAPHORIA A VITIO FAUCIUM,*  
ut a faucibus exulceratis, uvula abrosa,  
foramine in palato.

*Curatio* exigit ablationem vitii, cuius paraphonia effectus est.

ejusdem magnitudinis solummodo supereisset; simul oris apertura adeo erat contracta evanidis quasi & concretis labiis, ut vix apice digiti minimi in oris cavum penetrare potuerim. Iconem hujus deformis faciei alia occasione communicabo.



## MORBI VENEREI ORIS.

## APHTHÆ VENERÆ.

**S**unt ulcuscula superficiales in cavo oris.

Non solum cavum faucium, tonsillas & uvulam occupant, sed etiam internam labiorum superficiem & commissuras labiorum oris obfident. Aphthæ autem *mercuriales* ad latera & basim linguae atque ad interiora genarum in orificiis ductuum Stenonianorum confertim erumpunt.

1. *APHTHÆ A LUE UNIVERSALI.* Hæc ulcuscula muco gryseo vel albo sunt obducta & a parte in partem serpunt. Noscuntur ex prægressis symptomatibus venereis.

*Curatio* exigit internum usum mercurii gummosi. *Externe* gargarisma mercuriale applicetur.

2. *APHTHÆ EX LACTATIONE NUTRICIS VENERÆ.* Hæc species in infantibus, qui nutrice venerea lactantur, persæpe observatur. Ab osculo talis infantis contrahuntur, ut vidi, ulcera venerea laborum.

*Curatio* infantum exigit *syrupum mercurialem*. Os eluatur solutione aquosa sublimati melle vel syrupo mixta.

ULCE-

## ULCERA VENEREA PALATI.

Sunt ulcera in palatu a viru venereo orta.

1. *ULCERA SIMPLICIA.* Incipiunt cum macula rubra , aliquantum elevata , quæ sensim in ulcus sordidum abit , & non raro ossa palatia simul carie inficit.

*Curatio externa* exigit solutionem sublimati cum melle rosaceo. *Interne* detur mercurius gummosus.

2. *ULCERA PERFORANTIA PALATUM.* Quandoque caries ossa palatina usque in narium cavitatem peredit ; tunc tetrorem spectaculo pars cibi & potus sub deglutionis connatu in nares & extra eas regurgitat.

*Curatio* præter internum mercurii gummosi usum exigit , ut essentia mastichina cum melle & sublimato mixta ope penicilli aliquoties de die illiniatur. Aut ut sponsa hac essentia madida ope *obturatorii palatini* foraminis carioso applicetur.

## SCABIES VENEREA MENTI.

Est scabies crustosa , a viru venereo orta , quæ ambitum barbæ mentalis occupat.

*Curatio* exigit usum internum mercurii gummosi. *Externe* solutio sublimati aut aqua phagædenica applicetur.

MORBI VENEREI COLLI  
ET FAUCIUM.

SCROPHULÆ VENEREÆ.

SUNT indurationes glandularum submaxillarium vel jugularium in collo.

1. SCROPHULÆ A LUE UNIVERSALI  
Hæ ex præsentia aliorum morborum venereorum noscuntur, ut plurimum leviter inflamatæ sunt. Quandoque una quandoque plures simul adsunt. Raro resolvuntur, ut plurimum in lenta ulcera colli abeunt.

*Curatio* exigit internum usum mercurii gummosi. Externe saturata solutio sublimati forma fomenti applicetur.

2. SCROPHULÆ A LUE LATENTE. Infantes quorum parentes quondam lue laborarunt, & infantes quibus tinea capititis non radicitus curatur, proiectiori ætate scrophulosi fiunt. \*)

Ad curationem internam mercurius gummofus, solutio sublimati, aquilla alba &

---

\*) Cacochymiam scrophulosam persæpe ex degenerato viru venereo esse censet Cel. HAUSMANN *Diss. de morbis venereis larvatis. Gotting.* p. 55.

*xthiops mineralis* cum extracto vel pulvere cicutæ laudatur.

### A N G I N A V E N E R E A.

Est deglutitio difficilis & dolorosa a viru venereo ad fauces deposito.

Nullum symptomata venereum est frequenter videre quam maculæ & ulcera faucium.

1. *ANGINA INFLAMMATORIA*, noscitur maculis rubris & latis, quæ in superficialia ulcuscula seu aphthas venereas abeunt.

*Curatio* exigit internum usum mercurii gummosi ac purgans antiphlogisticum. *Externe* solutio tenuis sublimati seu gargarisma mercuriale applicetur.

2. *ANGINA ULCEROSEA*, noscitur ulceribus gryfeis, folidis, lardaceis, latis, circa pharyngem, laryngem, uvulam, tonfillas & velum palatinum serpentibus; voce rauca & nasalí; ptyalismo fœtido & mucoso.

*Curatio.* Interne mercurius gummosus atque decoctum sarsaparillæ detur. *Externe* gargarisma mercuriale adhibetur.

Si vero ulcera non brevi sanentur, tunc ea aliquoties de die saturata solutione sublimati ope penicilli tangantur.

3. *ANGINA IN VETERATA.* In hac specie  
ulcera vel jam cancrescunt, vel colli ver-  
tebrarum corpora jam cariosa sunt. Peni-  
cillatio faueium cum sublimato in effen-  
tia mastichina soluto quandoque etiam in  
hoc casu mihi profuit. \*)

4. *ANGINA A DYSPHAGIA VENEREA.*  
Noscitur sensu obicis vel nodi in ipso æso-  
phagi cavo quasi hærentis ac prægressis  
vel adhuc præsentibus luis venereæ signis.  
*Curatio* exigit mercurium gummosum. \*\*)  
Quæ autem dysphagia a nimia sénilitate  
faucium post ulcera bene sanata remanet,  
tempore sua sponte curatur.

\*) Plures ægroti annuis ulceribus faucium laborantes ,  
qui non solum mercurium gummosum sed etiam  
sublimatum & dulcem & frictiones cum & sine  
salivatione sine omni ulcerum emendatione , diu  
adhibuerunt , ab usu mercurii abstinere jussi , fau-  
ces penicillavi Essentia mastichina mercuriali v. for-  
mulas , ac illos intra aliquot septimanæ penitus  
curavi.

\*\*) Dysphagiam talem sine præsentibus signis venereis  
a lue latente natam , mercurio curatam recenset Cel.  
de MEZA. V. Cel. STRACK *Beobacht. von der Petet-  
schenkranheit.* p. 233. Dysphagiam , ab ulceribus ve-  
nereis faucium curatis remanentem , etiam vidit Cel.  
DUCAN. *Medical. Casus.* p. 176.

---

## MORBI VENEREI OSSIUM.

---

### TOPHUS VENEREUS.

**E**st topica ossis intumescentia a viru venereo,  
ad ossis substantiam deposito.

Tophus osse durior *exostosis* dicitur; ac tophus  
valde mollis *gummi venereum* vocatur.

Causa *proxima* est lamellarum ossicularum vel pe-  
riostei elevatio a muco venereo sub his  
effuso.

*Sedes* frequentissima tophorum est cranium, cla-  
vicula, sternum, antibrachium, tibia.

i. *TOPHUS SIMPLEX* noscitur tumore pro-  
fundo, immobili, plano, osse vix moliori  
ut plurimum ovato, cuti concolori, ac  
ut plurimum dolente dolore osteocopo.

*Resolutio* exigit usum internum mercurii  
gummosi, ac decoctum sarsaparillæ cum  
radice mezeræi. \*)

---

\*) Cel. RUSSEL corticem radicis daphnidis mezeræi in to-  
phis venereis & doloribus osteocopis valde laudat;  
sedecim casibus practicis comprobat, tophos, qui  
sæpe magnitudinem nucis juglandis aquabant, intra-  
mensem solo hoc cortice sæpe resolutos fuisse. Sed  
in vera exostosi parum profuit hic cortex. Binus  
recenset casus ubi caries subfuit, quæ tamen feli-

2. *TOPHUS CARIOUS*, noscitur prægressa inflammatione ac subsecente secessione & exulceratione partium mollium.

*Curatio* exigit denudationem loci & applicationem solutionis sublimati cum essentia mastichina.

### HYPERTOSTOSIS VENEREA.

Est totius extremitatis in osse longo intumescencia a viru venereo in substantiam spongiosam ossis deposita.

1. *HYPERTOSTOSIS SIMPLEX*, noscitur intumentia totius extremitatis in off. Si malum recens est & tumor exostoticam duritiem nondum habet, tunc ut tophus resolvitur, alias est irresolubilis.

Internus usus mercurii præcipitati albi vel mercurii præcipitati per se, quotidie ad granum datus in hoc morbo laudatur.

2. *HYPERTOSTOSIS CARIOSA*. Noscitur signis tophi exulcerati. *Curatio* præter internum usum mercurii gummosi exigit profundas perforationes ossis cariosi ut

---

citer curata fuit sub usu corticis post applicatum causticum insequente exfoliatione. V. *Medical observations and inquir.* T. 3. p. 189. Cel. RAZOUX decoctum stipitum dulcaniaræ ad tophos curandos laudat. V. *Journal de Médecine* T. 22. p. 236.

succus medullaris corruptus effluere pos-  
fit. Si caries totam extremitatem jam oc-  
cupat sola amputatio supereft.

### C A R I E S   V E N E R E A.

Est ossis corruptio in externa ossis superficie a  
viru venereo.

Sedes frequentissima est in cavo narium, in cra-  
nio \*) claviculis, sterno, cubito, tibia.

\*) Vedit *III. MORGAGNUS* vetulam, cui venerea caries  
tantum de sinistro osse syncipitis & proximo fron-  
tis absumperat, ut per foramen trium digitorum  
transversorum quoquoversus cerebrum pateret,  
liceretque perspicere, ubi arteriam ad carpum tan-  
geres, eodem temporis puncto hanc & cerebrum  
tum sese attolere, tum subsidere. Ipsius autem  
membrana cerebri nitida & pura conspiciebatur,  
*De sedibus & causis morborum lib. IV. epistol. 58.*  
*art. 11. & 12. Cel. LIBAVIUS* in femina venerea  
totum os temporale dextrum cum dimidio osse bre-  
gmati carie consumptum & cerebrum ad ventri-  
culos usque destructum vedit, hinc sopore mors  
succedat. *Ephem. Nat. Curios. Cent. VIII obs. 21.*  
*p. 284.* In scorto ope mercurialium aliquot polli-  
cum fragmentum ossis frontis a diploe cranii sepa-  
rabatur remanente fœdissima cicatrice. *TRIOEN*  
*Observat. fasciculus p. 45.* Hujusmodi separationis  
exemplum etiam adnotavit *STALPART VAN DER*  
*WIEL. Centur. prior. observ. 4.*

1. *CARIES TOPICA*, quæ unam solummodo in osse locum occupat. Ut plurimum a prægressa inflammatione periosteī, topho, vel gummi in suppurationem abeunte, rarius ab ulcere cutaneo ad os rodente oritur.

*Curatio* exigit applicationem sublimati cum melle rosaceo & tinctura myrrhæ vel mastichis. *Interne* detur mercurius gummosus cum afa fœtida, decocto sarsaparillæ & mezeræi.

2. *CARIES UNIVERSALIS* est caries quæ totam fere superficiem in uno vel pluribus ossibus occupat. \*) *Noscitur* quod pluribus locis partes molles os cariosum tegentes exulcerentur.

\*) Cel. KNOLLE in *Diss. de ossium carie venerea* quatuor crania in plurimis locis cranii & faciei cariosa describit. p. 18. Totam compagem ossium, pelvim constituentium, in sceleto pueri, tam foraminulenta, quam ullum unquam esse potest lignum cariosum putridumve, idque ex lue venerea hereditaria, vidit HOFFMANNUS. Vide OLITZSCH *Diss. de spina ventosa*. Lips. 1672. §. IV. Cel. CHESELDEN in sua *Osteographia or, the Anatomy of the bones* Lond. 1733. Tab. XLII. Fig. I. sceletum feminæ venereæ describit, cuius vix ullum os fuit sanum. Habuit NUCKIUS sceleton, vid. HEYNE *Tentamen de præcipuis ossium morbis* §. 29. lasciva ex venere

*Curatio* eadem est tentanda ac in priori specie, rarius autem in universalis carie succedit, hæc enim ut plurimum tabe necat.

### SPINA VENTOSA VENEREA.

Est ossis corruptio in meditullio ossis incipiens & extrorsum pergens.

Est morbus frequens infantum a parentibus venereis genitorum. Spina ventosa adultorum fere semper venerea est.

Ossa minora manus pedisve ac ossium longorum extrema afficere amat.

1. *SPINA VENTOSA INCIPiens*, noscitur dolore profundo, osteocopo, diu durante, demum rubente & tumente cute externa cariosum locum tegente.

*Curatio* exigit interne usum mercurii gummosi. *Externe* unguentum mercuriale applicetur.

2. *SPINA VENTOSA APERTA*, pars affecta demum rubentem ac spongiosum tumorem pluribus foraminibus se exulcerantem contrahit.

---

ita cariosum & infinitis foraminulis pertusum, ut vix ac ne vix quidem cohæserit; propterea brevi hac inscriptione ab eo exornatum: *Amor intimus inhaeret medullis.*

*Curatio.* Detur interne mercurius gummosus vel aquila alba cum asa fœtida ac decocto corticis peruviani, mezeræi, cicutæ & sarsaparillæ. *Externe* applicetur ulceri essentia mastichina cum sublimato corrosivo ac melle rosaceo; dein tumor tegatur unguento neapolitano. Hac methodo ego plures ægrotos sanavi.

### MOLLITIES VENEREA OSSIUM.

Est ossis flexilitas a viru venereo.

1. *MOLLITIES TOPICA*, quandoque unus alterve locus in osse ut in tophis videre est ceræ ad instar emollitur.

*Curatio* ut in topho instituitur.

2. *MOLLITIES UNIVERSALIS*, quæ plura vel omnia ossa simul aggreditur. *Signa* mollitiei universalis sunt; statura corporis prægresso dolore osteocopo decrescit; æger stare nequit; urinæ sunt calcareæ, turbidæ; ossa curvantur; curvata facile extendi possunt, at facile franguntur.

Est morbus *incurabilis*. Nec inunctio mercurialis, nec succi antiscorbutici, nec multi infusum nec rubia tinctorum profuit.

## FRAGILITAS VENEREA OSSIUM.

Est ossis dispositio , qua a levissima causa frangitur.

Hoc vitium etiam vel *topicum* vel *universale* est.

1. *FRAGILITAS A MOLLITIE OSSIS.*

Noscitur ex spontanea vel facili curvatura ossis.

Fractura ossis emolliti est *incurabilis* \*)

2. *FRACTURA AB ARIDITATE VENEREA OSSIS.* Noscitur fractura ossis ex levi causa , absente flexilitate ossis. *Curatio* talis fracturæ etiam non est possibilis. \*\*)
3. *FRACTURA A CARIE VENEREA OSSIS.* Hæc enim ossis substantiam internam depascens fracturam ossis in loco carioso facile admittit. \*\*\*)

Fractura talis *curari* nequit , nisi locus ossis cariosi prius exfolietur.

\*) Historiam ossium a viru venereo emollitorum & simul fractorum recensetur. In *medizinischen Bemerkungen einer Gesellschaft von Aerzten in London.* VI. Band. 216. S.

\*\*) *Ill. VAN SWIETEN Comment.* T. 1. p. 567.

\*\*\*) *Adversat. medic. pract. vol. III. pars IV. p. 580.*  
Cel. REICHEL de carie venerea ossis femoris sponte fracti , observationem communicat.

---

## MORBI VENEREI ARTICULATIONUM.

---

### G A N G L I A V E N E R E A.

**S**UNT tumores cysticis similes, qui hinc inde circa articulationes in venereis oriuntur.

Tumores cystici non venerei frigidæ sunt indolis ad inflammationes & suppurationes minime proni. Tumores autem crysticos venereos subitus ac fugax æstus, rubor, dolorque intermittens commitatur. Frequenter etiam observatur plures talium tumorum simul apparere.

A gummatibus ossibus differunt ganglia sua mobilitate. Quandoque a lue universali quandoque a latente ut hordeola palpebrarum oriuntur.

*Curatio* exigit interne mercurium gummosum, decoctum lignorum aut sarsaparillæ cum cortice mezeræi. *Externe* solutio sublimata & unguentum mercuriale applicetur. \*)

---

\*) Homo 35 annorum, qui sinistri testiculi indolentem intumescientiam jam ultra annum a suppressa gonorrhœa ortum habuit, sepius hordeoleis palpebrarum & tribus tumoribus gangliformibus in externo

## ANCHYLOYSIS VENEREA.

Est articulationis immobilitas a viru venereo orta.

*Species* sunt

## 1. ANCHYLOYSIS AB HYPEROSTOSI.

Noscitur tactu ipsius ossis extremi tumidi.

V. *Hyperostosis.*

## 2. ANCHYLOYSIS A SYNOVIA INSPISSATA,

Tumor articulationis magis globosus est, nec præcessit tumor inflammatorius, dolens articulationis.

*Curatio* exigit internum usum mercurii gummosi & decoctum lignorum, vel mezeræi  
*Externe* solutio sublimati instar fomenti applicetur, aut unguentum mercuriale cum gummi ammoniaco.

## 3. ANCHYLOYSIS A PHLOGOSI LIGAMENTORUM.

Tumor in suo exordio est dolentissimus, de nocte aliquantum rubens.

*Curatio* exigit in stadio inflammatorio mercurium gummosum cum emulsione nitroso & purgante antiphlogistico. *Externe* mel

---

genu latere cruris sinistri prehenditur, simile ganglion in dextri genu latere interno at valde dolente & rubente vexatur; dato mercurio gummoso nova jam ultra annum suppressa gonorrhœa rediit, evanescitque tumor testiculi, ac ganglia intra 6 septimanas integre mox dicta methodo curabantur.

mandragoræ cum unguento neapolitano applicetur. Quandoque applicata solutio aquosa sublimati profuit.

---

## MORBI VENEREI SEXUS FEMINEI.

---

### MORBI PARTIUM GENITALIUM.

---

#### LEUCORRHÆA VENEREA

S E U

#### FLUOR ALBUS VENEREUS.

**E**st muci puriformis stillicidium ex vagina muliebri a viru venereo ortum.

Contrahitur ut plurimum a coitu cum viro gonorrhæa venerea affecto, rarius per lactationem infantis venerei, aut ab hereditate oritur.

**S I G N A** quibus leucorrhæa venerea a non venerea distinguitur sunt,

1. *Subitanea invasio* mali uno alterove die post coitum impurum. Benigna lente incipit.
2. *Ardor vaginæ aut dysuria*, quæ recensem gonorrhæam non raro comitatur. Benigna fine dolore est nisi inveterata fit.
3. *Pustulæ prurientes aut ulcuscula aphthosæ in sinu muliebri*, quæ leucorrhæam

venereum etiam non diu durantem comi-  
tatur; nam aphthæ leucorrhæam benignam  
valde jam inveteratam solummodo se-  
comites jungunt.

4. *Humor puriformis*, flavo-viridescens e  
vagina manans, qui in benigna vel mu-  
cosa vel laetiformis solummodo est.
5. *Infectio viri sani* cum gonorrhæa vene-  
rea, quod certissimum est signum.

*Species* varietatum sunt leucorrhæa *simplex*, *com-  
plicata*, *inveterata*.

1. *LEUCORRHÆA SIMPLEX*, est illa quæ  
in glandulis muciparis inferiorem vaginæ  
ambitum obfidentibus sedem habet. *Nosci-  
tur* effluxu muci puriformis ex vaginæ  
cavo.

Hæc species ut plurimum sine dysuria at  
cum levi vaginæ ardore atque pruritu si-  
nus muriebris incipit, diu durat, demum  
effluens humor mere mucosus evadit &  
pedetentim at lente cessat.

Ob humiditatem vaginæ leucorrhæa in fe-  
minis difficilius curatur & diutius durat,  
quam gonorrhæa in viris.

*Curatio* exigit.

1. *pulverem eccoproticum*.
2. *Decoctum bardanæ*, quod primis septi-  
manis datur; dein

3. *pulverem eccoproticum* cum aliquot guttis balsami copaivæ ac

4. *Injectionem* ex solutione sublimati corrofivi, quater de die repetendam.

2. *LEUCORRHÆA COMPLICATA*; quæ cum inflammatione urethræ vel ejus officii vel cum inflammatione glandulæ santorianæ complicatur. *Noscitur* visu ruboris loci inflammati, exitu humoris puriformis ex urethræ ostio, aut tuberculo inflammatorio glandulæ santorianæ, quæ ad latus sphincteris vaginæ locatur, ac ex dysuria vehementi sub & post exitum urinæ. Simul sensatio corporis e finu elabentis percipitur.

*Curatio* ab initio sit antiphlogistica cum mercurio gummoso juncta, ut in periodo gonorrhææ inflammatoria. Evanida hac periodo adhibetur medela gonorrhææ purulescentis & continentur injectiones mercuriales.

Leucorrhæa cum ulcusculis, pustulis pruriensibus, condylomatibus aut aliis morbis *complicata* tractetur ut hi morbi peculiariter exigunt.

3. *LEUCORRHÆA IN VETERATA seu HABITUALIS*, quæ jam multos menses aut ultra annum durat. Causa hujus speciei vel *atonia* lacunarum muciparum vaginæ vel *ulcus* in *utero* aut *vaginæ* ambitu est.

*α Leucor-*

a) *leucorrhæa habitualis mucosæ* stillicidio  
muci tenuis non purulenti & absentia do-  
loris topici in utero vel vagina noscitur.

*Curatio* exigit medicamenta roborantia in-  
terna ut vinum roborans ex cortice peru-  
viano, Winterano, foliis gratiolæ, uvæ  
ursinæ & marte.

*Externe* convenit injectio aquæ vitriolatæ,  
aquæ frigidæ, balneum aquæ frigidæ.

β) *Leucorrhæa habitualis ulcerosa*, noscitur  
tabo purulento aut sanioso extillante, do-  
lore topico, exploratione digitali. Leu-  
corrhæa ab uteri exulceratione adstringen-  
tibus suppressa abit in tympanitidem uteri.

#### V. Physometra.

*Curatio* leucorrhææ ulcerosæ exigit sanationem  
ulceris in uteri vel vaginæ cavo latentis;  
hinc vide *ulcus vaginæ* & *ulcus uteri*.

## PHLOGOSIS VENEREA GENITALIUM.

Est inflammatio venerea in finu muliebri vel in  
vagina uteri.

Hæc inflammatio quandoque *cum* quandoque *sine*  
leucorrhæa est.

### I. PHLOGOSIS SINUS MULIEBRIS.

Est intumescientia labiorum vulvæ ac ori-  
ficii vaginæ. *Noscitur* visu, vulvæ ardore  
ac dysuria sub urinæ exitu.

Σ.H.

*Curatio* exigit purgationem eccoproticam, venæsectionem, si inflammatio ingens emulsionem refrigerantem cum mercurio gummoso. *Externe* lac mercuriale vel solutio aquosa sublimati corrosivi forma fomenti applicetur.

Quandoque unum vel utrumque labium in suppurationem abit & pluribus aperturis pus eructat, tunc unguentum mercuriale cum emplastro diachilon mistum applicetur.

2. *PHLOGOSIS GLANDULÆ SANTORIANÆ.* Noscitur ex tuberculo inflammatore ad latus orificii vaginæ, ingenti pruritu & ardore vulvæ.

*Curatio* est ut in priori specie.

3. *PHLOGOSIS VAGINÆ MULIEBRIS* est ardor in ipsa vagina, quandoque pluribus mensibus durans, raro fine ulcere, multoties fine leucorrhœa est.

*Curatio* est ut in ulcere vaginæ.

## INDURATIO VENEREA GENITALIUM.

Est induratio venerca vulvæ vel vaginæ muliebris. Ut plurimum a prægressa phlogosi & validis applicatis injectionibus adstringentibus oritur.

1. *INDURATIO SINUS MULIEBRIS.*

Est labiorum integrorum induratio, quan-

doque simul vaginæ orificium a tali scirrhositate admodum arctatum invenitur.

2. *INDURATIO TUBERCULOSA.* Tuberculum unum vel plura in sinu vel labiis vulvæ tanguntur. Quandoque etiam vagina tali bus sed minoribus tuberculis plena est.

Hæc tubercula inveterata quandoque in pefima ulcera cancrosa degenerant.

*Curatio* exigit internum usum mercurii gummofi cum extracto cicutæ & gratiolæ. *Externe* fomentum ex foliis cicutæ cum sublimato, ac de nocte linimentum mercuriale applicetur.

### ULCERA VENEREA VULVÆ.

Sunt ulcera venerea in sinu muliebri, quæ gallis *chanchres* dicuntur.

1. *ULCERA APHTHOSA.* Incipiunt a pustulis prurientibus vel a vesiculis crystallinis, quæ in superficialia ulcuscula grysea vel albicantia abeunt.

Facile curantur elutione vulvæ cum solutio ne sublimati.

2. *ULCERA SERPENTIA.* Incipiunt a macula lata rubra vel a tuberculo inflammatorio nympharum, aut glandulae santonianæ; valde dolent; ac perpetuo in latitudinem serpunt, adeo ut nymphas, cli-

toridem & orificium vaginæ pedetentim erodant, si non brevi legitima medela adhibeatur.

*Curatio* exigit usum internum mercurii ac externe saturata solutio sublimati cum melle rosaceo vel essentia mastichina applicetur.

3. *ULCERA CANCRESCENTIA.* Nascuntur ex tuberculis scirrhofis vulvæ, admodum dolent, valde serpunt, ac difficulter sanantur, quandoque in verum cancrum venereum vulvæ abeunt.

*Curatio.* Præter mercurium gummosum detur cicutæ magna dosis. Externe saturata solutio sublimati & aër fixus applicetur.

## ULCERA VENEREA VAGINÆ.

Sunt ulcera venerea in cavo vaginæ muliebris.

1. *ULCERA SIMPLICIA.* Sunt ulcuscula superficialia, non multum serpentia, nec adeo dolentia, Nascuntur puris effluxo, dolore topico sub exploratione digitali.

*Curatio* interno usu mercurii gummosi, ac injectione sublimati corrosivi diluta peragitur.

2. *ULCERA SERPENTIA.* Hæc ulcerum species est dolentissima, cum simul inflamatio omnem ulceris ambitum occupet,

ac vaginæ superficies hinc inde in fissuras dissiliat, quæ acerrimam faniem perpetuo plorant.

*Curatio* præter internum usum mercurii exigit simul cicutam; *externe* fiat *injeccio* ex infuso saturato cicutæ cum majori dosi sublimati quam in priori specie.

3. *ULCERA LATENTIA.* Quandoque ulcera in superiori vaginæ parte resident, valde parum dolent, ac valde parum faniei eructant. Talia ulcera nullum notabile symptomata, quo sui præsentiam redderent signum, producunt. Nec enim fluor albus, nec dolor aut molestia in reddenda urina observatur. Leves enim vaginæ dolores, quos sub coitu aut exploratione digitali in loco ulceroso percipiunt, longe aliis & innocentibus causis adscribunt.

Hinc femina talis potest esse infecta, quæ post omnem visitationem ac inspectionem genitalium sana videtur, & quin ipsa se infectam esse sciat. Inde quandoque viri gonorrhæa vel ulcere glandis inficiuntur a femina, quæ sanissima appareat. \*)

*Curatio* ut in priori specie est instituenda.

\*) *III. L. B. DE STÖRCK præcepta med. pract. T. II. p. 135.*

4. *ULCERA URINARIA.* Sunt ulcera ex vagina in urethram vel in vesicam penetrantia. Si in urethram solam penetrant, tunc urina solummodo sub emissione in vaginam penetrat, si vero ulcus ipsum collum vel cavum vesicæ perforet, tunc urina continuo in vaginam stillat.

*Curatio* est in priori casu facilior, in altero difficillima. Candelula cava balsamo mercuriali illita, urethræ vel vesicæ cavo imitenda. In vaginam injectio mercurialis facienda.

5. *ULCERA STERCOREA.* Sunt ulcera, quæ ex vagina in intestinum rectum adeo penetrant, ut fœces alvinæ saltēm liquidiores per vaginam exeant.

*Curatio* difficillima. Tentetur injectio mercurialis in vaginam, & immissio tubuli latioris ex candelula formati, ut exitus fœcis in intestinum prohibeatur, sic sanatio ulceris facilitatur.

---

## MORBI VENEREI UTERI.

---

MENOSTASIA VENEREA.  
EST catameniorum emanatio a viru venereo.

1. *MENOSTASIA A LEUCORRHÆA.* Per multas vidi feminas fluore albo venereo

laborantes , quæ ultra annum jam cata-  
meniis carebant. Omnibus his mercurius  
gummosus per mensem datus catamenio-  
rum fluxum felicissime restituit.

**2. MENOSTASIA A LUE UNIVERBALI.**

Quandoque sine leucorrhææ presentia men-  
strua deficiunt , cum virus venereum san-  
guinem inviscat , aut uteri obstrukcionem  
pariat.

*Curatio* exigit mercurium gummosum.

**EXULCERATIO VENEREA UTERI.**

Est exulceratio in interna uteri superficie vel in  
ejus orificio.

Sequitur ut plurimum leucorrhææ inveteratae sup-  
pressionem.

**1. EXULCERATIO CAVITATIS UTE-  
RINÆ.** Signa , totam fere uteri superfi-  
ciem esse miasmate venereo exulceratam ,  
sunt ardor in regione uteri , fluor albus  
saniosus , dysuria atque tenesmus vesicæ  
urinariæ , emaciatio totius corporis , fe-  
bris heftica.

*Curatio* ut plurimum incassum vel difficil-  
lima est. Exigit autem internum usum mer-  
curii gummosi cum decocto saturato sarsa-  
parillæ ac lacte.

*Externe injectiones ex cicuta & sublimato  
non in solam vaginæ sed in ipsius uteri  
cavum ope instrumenti apti fiant.*

**2. EXULCERATIO ORIFICII UTERINI.**

Symptomata sunt eadem at mitiora , digito  
explorari potest orificium lacerum ulce-  
rosum.

*Curatio est tentanda eadem.*

**P H Y S O M E T R A V E N E R E A**

S E U

**T Y M P A N I T E S U T E R I V E N E R E A.**

Est uteri intumescentia ab aëre & humore sanioso  
uteri cavum distendente.

Sequitur ut plurimum uteri chronicam exulce-  
rationem.

**1. P H Y S O M E T R A A B O R I F I C I O U T E-  
R I N O C O N C R E T O.** Prægressis uteri  
exulcerati signis oritur in sede uteri tumor  
hypogastrii , constans , rotundus , elasticus ,  
levis ; nullus e vagina crepitus aut subita-  
neus humoris saniosi effluxus observatur.

*Curatio ob orificium uteri concretum non  
exspectanda.*

**2. P H Y S O M E T R A A B O R I F I C I O U T E-  
R I N O O B D U R A T O.** Prægressis uteri  
exulcerati signis subito intumescit uterus ,  
ut in priori specie , at quandoque simul

subito humor saniosus & acris cum crepitu vaginali seu aëris fætidi explosione ex vaginæ cavo erumpentis quam aliqualis uteri tumidi confidentia sequitur , percipi solet. \*)

\*) III. L. B. DE STÖRCK tympanitidem uteri binis in feminis observavit. *V. annus medicus secundus*, p. 204. Ambæ hæ feminæ a pluribus annis pessimo fluore albo venereo laborarunt , & materies effluens fuit penitus ichorosa , putridissima & adeo acris , ut totam vaginam & pudendorum labia corroserit. Urina semper erat stranguriosa ; Multis tandem medicamentis effectum est , ut in una harum feminarum fluor albus cessaverit & ulcera vaginali & vulvæ coierint ; in altera vero fluor reddebat minus frequens & minus molestus. Ambæ tamen hæ feminæ continuum ardorem & dolorem rodentem in hypogastrio quandoque magnas anxietates , tenesmos uterinos , & dolores tendentes versus inquina & uteri vaginali adverterunt ; hos tenesmos ac leve animi deliquum excipiebat & dein plures fætidissimi flatus magno cum strepitu & summa cum violentia per anteriora ex utero explodebantur , & mox sequabantur materies saniosa , flocculenta , ignis instar urens , corrodens. Brevi autem hæc materies iterum cessavit fluere. Post unum , binos , vel ternos dies eadem denuo symptomata redierunt , erupere flatus & materies pessime fætens vi quasi propulsa est. Dum hæc per plures septimas observata sunt tunc cepit tumor in hypogastrio comparere , qui valde durus , valde elasticus & subrotundus fuit ;

*Curatio difficillima & incerta.* Interim detur interne mercurius gummosus cum decocto saturato sarsaparillæ. *Externe* tubulo argenteo orificium uterinum servetur aperatum, ut humor acris ex cavo effluere ac injectiones mercuriales in uteri cavum fieri possint.

---

hic autem tumor post quenlibet flatum & matriei per anteriora explosionem minor videbatur, & mollior. Moles hujus tumoris sensim aucta est. Verum quo major fiebat tumor, eo minus frequens fuit flatuum explosio; imo sensim hæc penitus cessavit, & tunc tumor longe citius & manifestius increvit. Ambæ hæc ægræ continua febricula affectæ erant, circa vesperas autem haberunt magnas & frequentes horripilationes, & secutus est ingens calor cum siti non extinguenda. Inde somnus inquietus, delirium & tendinum subsultus sequebantur; Tandem post diurnam corporis extenuationem anima efflabatur. Symptoma in binis his ægris erant prorsus similia. Alvis erat toto morbi tempore libera, urina vero fuit semper tenesmoidea, stranguriosa, fœtida.

In prima femina, cuius fluor ex usu medicamentorum penitus cessavit, sectione anatomica inventus est uterus durus, elasticus, & magnitudine caput viri adæquans. Cum chirurgus scalpello in cavum penetravit, aër summa cum violentia prorupit, & vehementissime fœtebat. Ulteriori sectione reperiebatur in uteri cavo materies saniosa, fœtidissima.

---

## MORBI VENEREI MAM- MARUM.

---

### INFLAMMATIO VENEREA MAMMARUM.

**E**s tumor inflammatorius in mamma a viru  
venereo ortus.

**I. INFLAMMATIO PAPILLÆ.** Hęc ut  
plurimum a lactatione infantis venerei ori-  
tur. Cutis circa papillam intumescens,  
papillam occultat.

---

Uteri autem substantia erat tenuis, membranacea;  
lamellæ internæ erant omnes exulceratæ & sphä-  
celo corruptæ. Os uteri fuit penitus induratum,  
concretum, ea autem parte, qua cavum spectabat,  
corrosum. In vagina deprehensæ sunt variæ ex-  
crescentiæ fungosæ & innumeræ cicatrices.

In altero cadavere inventus est uterus inflatus, elāsticus,  
mole autem multo minor, quam in cadavere prio-  
ri; cæteroquin in ejus cavo fuit similis materies  
faniosa, & copiosissimus aér valde fœtens. Cavum  
uteri erat quoque penitus exulceratum, corrosum,  
fœda quoque ulcera in vagina reperta sunt. Os  
uteri hoc in cadavere non erat concretum, verum  
obstruebatur sanguine grumoso, polypoſo; præterea  
fanie valde erat exefsum. Vagina tota & vulva  
labia erant undequaque exulcerata.

2. *INFLAMNATIO GLANDULARIS.* Oritur tuberculum profundum, calidum, durum, quod buboni inquinali simile est. Difficulter resolvitur ac difficulter in suppurationem abit. Quandoque glandulam subaxillarem induratam simul comitem habet.

*Curatio* exigit internum usum mercurii. Externe ope aquæ vegetomineralis sublimati solutione mixta vel fomentum vel additamica panis albi cataplasma fiat resolvens. Si resolutio non succedat, procuretur suppuration, & tractetur ut bubo inquinalis.

### ULCUS VENEREUM MAMMÆ.

Est ulcus in mamma a viru venereo ortum.

1. *ULCUS* seu *CHANCRE PAPILLÆ.* Ut plurimum a lactatione infantis venerei, vel lactis exsudatione a suetrice venerea oritur. Solam papillam vel discum ejus simul occupat.

2. *ULCUS CUTANÉUM.* Hoc cutem ac pinguedinem ipsius mammæ late erodit. Oritur cum prægressa lata macula venerea a lue universali vel latente.

*Curatio* præter usum internum mercurii gummosi externe balsamum mercuriale aut solutionem sublimati exigit.

## CARCINOMA VENEREUM MAMMÆ.

Est tumor durus, lacinans, ac decolor in mamma a viru venereo ortus.

1. *CARCINOMA SCIRRHOSUM.* Est tumor subdurus, lacinans, decolor, clausus vel exulceratus.

*Distinguitur carcinoma venereum a cancro vero*

1. Quod cancer verus ut plurimum trade, venereus *cito* increscat.
2. *Durities* est in cancro vero lapidea quasi, in venereo elastica ut in phlegmonoideo tumore, & non profunda est.
3. *Pus* in venereo flavo-viridescens in vero cancro saniosum, brunum.
4. Verus cancer a mercurio exasperatur, venereus curatur.

*Curatio* exigit internum usum mercurii gummosi, cum cicuta gratiola & sarsaparillæ decocto. *Externe* emplastrum mercuriale & solutio sublimati corosivi applicetur. Si curatio non succedit, fiat extirratio mammæ. \*)

---

\*) Vedit III. SAUVAGES *Nofol.* meth. T. II. p. 549. in muliere venerea tumorem exulceratum, infantili capite maiorem, usu mercurii ad pugni magnitudinem cito rediisse, verum non omnino sanari po-

2. *CARCINOMA FUNGOSUM.* Est tumor fungosus, lancinas a viru venereo ortus.

*Curatio* exigit mercurium gummosum cum saturato decocto sarsaparillæ; aut his nil proficientibus fiat excisio tumoris. \*)

3. *CARCINOMA GANGRÆNOSUM seu NOMA VENEREUM.* Est ulcus gangrænosum venereæ indolis. *Noscitur* ortu tuberculi rubroflavi quod intra paucum tempus in ulcus valde profundum, gangrænosum, margine rubroflavo circumdatum valde fœtens & dolens abit.

*Curatio* exigit ut interne mercurius gummosus cum cortice detur. *Externe* solutio

tuit hoc carcinoma, hinc reliquus tumor excindī debuit. Vedit in mamma puellæ, dudum siphiliticè duc̄s tumores, qui ovi gallinacei magnitudinem habebant, cum dolore lancinante & glandulis duris tuberosis ad axillam extensis, post tres mensēs adhibito spiritu antivenereo evanuisse simul cum ulceribus fauciū. Credidit Cel. BIERCHEN in libello de cancro serophulofas indurationes omnes esse a venereo viru degenerato, hinc carcinoma serophulofum & venereum idem esse atque mercurio sanari, quem aliud carcinoma non fert.

\*) ADOLPH. FRIDRICH VOGEL *Chirurgische Wahrnehmungen*  
I. Sammlung. S. 26. Excrecentia fungosa papillæ mammalis sarsaparillæ decocto contabescet.

sublimati corrosivi spirituosa ope linteī car-  
pti applicata profuit. \*)

## MORBI VENEREI INTERNI.

### F E B R E S V E N E R E A E.

#### V E N E R E A S I M P L E X.

**E**st febris continua acuta a viru venereo orta. Quandoque mox post coitum impurum fine genitalium infestatione ; quandoque a bubonibus evanescentibus, aut a gonorrhæa suppressa incipit.

\*) *Celeber.* BIERCHEN sola externa spiritus mercurialis saturati applicatione, quem ex 4. granis mercurii sublimati corrosivi & una spiritus vini uncia compositu, plura talia carcinomata sanavit. Opinatur illam canceri gangrænosi speciem, quæ *noma* vocatur & quæ buccas infantum adeo cito destruit etiam venereæ indolis esse cum etiam spiritu mercuriali sanari possit. V. *Abhandlung von den Kennzeichen der Krebschäden* p. 84. 82. & 120. Nomæ tales cancerosæ in scroto & labiis vulvæ observatæ remedio eodem curabantur.

Nonnunquam 20 aut 30 pluresque dies durat,  
quandoque vero paucos post dies jam ite-  
rum definit. \*)

*Judicatur hæc febris quadruplici modo*

1. per *sudorem copiosum ac fœtentem.*
2. --- *urinam turbidam, copiosam, fœten-*  
*tem & ardente.*
3. --- *gonorrhœam aut Leucorrhœam re-*  
*deuntem.*
4. --- *metastasim venereum ad cutim, unde*  
*miliaria, maculæ coloris cuprei aliique*  
*morbi cutanei; ad viscera inde variorum*  
*viscerum dolor ardens, chronicus; ad*  
*partes musculares inde arthritis & cepha-*  
*læa febrem venereum sequuntur.*

*Curatio* hujus febris exigit.

1. *Venæfæctionem, si febris vehemens aut*  
*plethora observetur.*
2. *Purgans antiphlogisticum*
3. *Emulsionem refrigerantem*
4. *Decoctum saturatum sarsaparillæ & dul-*  
*camaræ*
5. *Pillulas ex mercurio gummoſo.*

\*) *Ill. L. B. de Störck præcepta medico-practica T. II.*  
*p. 131. & ejus annus medicus secundus p. 221.*

## VENEREA INFLAMMATORIA.

Est febris continua acuta, quæ inflammations venereas comitatur.

Observatur in gonorrhææ stadio inflammatorio in inflammatione testiculorum, præputii, glandulæ prostatæ, glandularum inquinantium, in ophthalmia gonorrhœica & in inflammatione faucium.

Cum inflammatione incipit ac ea desinente definit, noctu semper observatur vehementior.

*Curatio* exigit *venæfæctionem*, decoctum *sarsaparillæ* cum *nitro* ac *mercurio gummoso*.

## VENEREA LENTA.

Est febricula chronica, quæ *tabem venereum* comitatur.

*Oritur* ab ulcere latente vel aperto, cuius pus in vasa absorbetur. Comitatur hinc ulcera uteri, pulmonum, medullæ ossium

*Curatio* exigit sanationem ulceris. v. *Phthisis venerea*.

## VENEREA BILIOSA.

Est febris a faburra biliosa primarum virum, quæ venereoſ ſæpe corripit.

Non proprius sed accessorius luis venereæ morbus est.

*Noscitur lingua sordida, inappetentia, tempestate biliofa.*

*Curatio exigit emeto - catarfim, & dein antibiliofa ut palpam tamarindorum cum cremore tartari. \*)*

### VENEREA INTERMITTENS.

Est febris quotidiana, tertiana, vel quartana, quæ a viru venereo oritur.

1. *INTERMITTENS VENEREA IDIOPATHICA*, quæ ab ipso viru venereo oritur. Hæc species cortice peruviano non fugatur, soli mercurio cedit. \*\*)

2. *INTERMITTENS ACCESSORIA*, quæ a sua propria causa ortum habens venenos aggreditur.

Hæc species cortice peruviano cum mercurio combinato curatur. \*\*\*)

\*) *Celeb. Stoll Rationis medendi part. II. p. 266 & sequent.* Sub usu mercurii quandoque saburram ventriculi vel nasci vel turgere vidi.

\*\*) Exempla febris quartanæ a lue venerea ortæ refert *Cl. MONROO Essays d'Edimb. Vol. V. obs. 47.* frustra enim remedia adversus febrim præscribabantur, hæc enim potius venereum morbum graviorem reddebat, præscripto autem mercurio dulci ad salivationem usque continuato post unicum adhuc paroxysmum & febris & symptomata venerea cessarunt. Similia exempla referunt *BALLONIUS oper. T. II. p. 97. & 117 nec non DEIDIER de morb. venereis. obs. 4.*

\*\*\*) Quando febris intermittens minime a viru venereo

## S P A S M I V E N E R E I.

## T E T A N U S V E N E R E U S.

**E**s t spastica contradicitione omnium muscularum  
spinæ dorfi, maxillarum, & artuum.

1. *TETANUS A LUE UNIVERSALI* qui ex præsentibus luis venereæ signis noscitur.

*Curatio* exigit mercurium gummosum cum opio vel si ob maxillarum clausuram mercurius deglutiri non posset, applicentur enemata ex mercurio gummoso & opio; fiantque simul ad salivationem usque frictiones mercuriales.

2. *TETANUS A LUE LATENTE*, qui ex diu prægressis morbis venereis suspicari potest. \*)

*Curatio* est eadem.

---

pendet, sed accessorius tantum labis venereæ morbus est, tunc remedium antifebrile & antivenereum combinari debet, ut eodem tempore uterque morbus tollatur. Ex hac combinatione ego aliquæ felicissimos effectus viderunt. Vid. *Cel. WERLHOF oper. T. 1. p. 133.* & *Cel. THEDEN Unterricht für Wundaerzte. p. 117.*

\*) *RIVERIUS Opera Medica universa, Lugd. 1664. p. 130.*  
obs. X. Amputato brachio & vulnere cicatrifato

## E P I L E P S I A V E N E R E A.

Est periodica totius corporis convulsio cum sensuum feriatione.

1. *EPILEPSIA AB EXOSTOSI INTERNA CRANII.* Suspicari potest ex dolore fixo in quodam loco sub crano.

*Tentetur* mercurius gummosus & decoctum mezeræi. Posset etiam pro remedio extremo trepanatio in loco dolente institui.

2. *EPILEPSIA A LUE LATENTE.* Est epilepsia infantum a parentibus, qui olim lue venerea laborarunt, natorum. \*) *Tentetur* syrpus ex mercurio gummofo.

oriebatur tetanus, reireratur amputatio at incassum. Suspicebantur medentes ex mala sanata olim gonorrhœa virus syphiliticum in amputati sanguine latere, ideo adhibent litum mercuriale & ptyalismo excitato æger a convulsionibus immunis evasit. Interim cum mercurius tetanum, ex alia causa ortum, etiam curet, non adeo certum est, tetanum hunc a lue originem habuisse.

\*) *III. ROSENSTEIN* l. c. p. 650. & *Cel. BLOCH* l. c. 178. Puerum 6 annorum, qui jam a tribus fere annis epilepticis, incerto tempore recurrentibus, insultibus, tinea capitis, ac quatuor spinis ventosis, dorsum manuum ac pedum obsidentibus, laboravit, usu interno mercurii gummosi, aquilæ albæ ac asæ fœtidæ intra septem menses sine excitata salivatione cura. vi. Ulcera spinæ ventosæ solutione sublimati melita & unguento neapolitano deligebantur. Omni altero die utebatur thermis budensibus.

## ADINAMIÆ VENEREÆ.

## LANGUOR VENEREUS.

**E**ST lassitudo totius corporis a viru venereo.

1. *LANGUOR A LUE LATENTE.* Languor sex annorum diæta lactea & hydrargyrosi instituta sanatus fuit \*)

2. *LANGUOR A FEBRE VENEREA.* Curratur secundum febris diversitatem. V.  
*Febres venereas.*

## PARAPLEGIA VENEREA.

Est paralyfis extremitatum inferiorum a viru venereo.

1. *PARAPLEGIA A GONORRHÆA SUPPRESSA.* Curatio præter usum internum mercurii gummosi exigit, ut gonorrhæa inoculatione revocetur. \*\*)

\*) *III. SAUVAGES.* l. c. T. I. p. 805. & *Illustr. VAN SWIETEN Comment.* T. v. p. 385.

\*\*) *III. SAUVAGES* l. c. p. 799. Vedit virum 40 annorum a multis retro annis ulceribus pudendorum laborantem, qui repressa imprudenter gonorrhœa, imperfecta extremitatum paralysi, adeo ut pedibus vix insistere potuerit, affectus fuit. Suasit Chirurgus semicupium ex aqua liquore saturni dealbata, inde paraplexia perfecta evasit. Tentata fuit

2. *PARAPLEGIA A TOPHO vel ALIO VITIO CIRCA MEDULLAM SPINALLEM*, ut a metastasi venerea ad specum vertebralem.

*Curatio* tentetur ut in topho venereo.

### HEMIPLEGIA VENEREA.

Est paralyfis dextri vel sinistri dimidii corporis, a vertice ad calcem, a viru venereo nata.

1. *HEMIPLEGIA A SUPPRESSA GONORRHÆA*, quæ eandem curam ac mox dicta paraplegia gonorrhœica postulat.

2. *HEMIPLEGIA A VITIO CRANII vel CEREBRI*. Sic tophus internæ cranii tabulae, aut topica cerebri induratio, suppuratio, aliudve vitium huic morbo ansam dedit. \*)

*Curatio* difficultima, raro possibilis, mercurio & decocto mezeræi, & stipitum dulcamaræ tentanda.

frustra hydrargyrosis & sublimati corrosivi solutio per duos menses. Vidi ego hominem 53 annorum, tophis venereis laborantem, qui usu thermarum Badensium Austriae hemiplegicus reddebat, usu autem decocti stipitum dulcamaræ ac mercurii gummosi curabatur.

\*\*) Cel. LEVELING *Diss. de carie cranii militis quondam venerei, postea epileptici, tandem apoplexia defuncti.*

---

## D O L O R E S V E N E R E I.

---

### CEPHALÆA VENEREA.

**E**ST capitidis dolor a viru venereo.

Vesperi ut plurimum increscit, noctu acerrimus evadit ac si ossa cranii dissilirent, circa auroram remittit.

1. *CEPHALÆA A LUE UNIVERSALL.* In hac specie simul dolores arthritici ac osteocopi in toto corpore adsunt, hicce dolor frontem ac cervicem maxime occupat.

*Curatio* exigit internum usum mercurii gummosi ac decocta antisyphilitica.

2. *CEPHALÆA A TOPHO CRANII.* Noscitur ex tumore & dolore topico seu fixo.

*Curatio* eadem ut in topho est.

3. *CEPHALÆA A LUE LATENTE.* In hac specie reliqua symptomata venerea desunt, at dolor noctu exacerbatus hujus speciei suspicionem movet; hinc.

*Curatio* exigit mercurium. \*)

---

\*) Cel. BLOCH. l. c. 178. Eximiam hujus speciei observationem habet.

## A G R Y P N I A V E N E R E A.

Est somni defectus a viru vel dolore venereo ortum habens.

1) *AGRYPNIA A DOLORE.* Dolorum venereorum indoles est, ut a nocte & lecti calore augeantur. Hi dolores vesperi ingruunt, media nocte intolerabiles evadunt, ac circa auroram remittunt.

Hinc venerei s̄pē præ dolorum acerbitate lecto surgunt, frigido cubiculi pavimento incumbunt ac oriente aurora primum dormire incipiunt. \*)

2. *AGRYPNIA SINE DOLORE.* Venerei quandoque sine omni vel gravi saltem dolore dormire nequeunt. Infantes qui solis masculis venereis laborabant forsitan ob pruritum venereum media nocte clamasse vidi.

*Curatio* exigit usum mercurii.

\*) Plures morbi noctu exacerbantur, ut febriles, dolores scorbutici, at hi morbi suis signis characteristicis facile a morbis venereis distinguuntur. V. III.  
TRILLERI *exercitatio de vespertina morborum exacerbatione* in T. II. Opusc. med. Interim etiam certum est, dolores venereos quandoque noctu non exacerbari, ut aliquoties observavi. De febre pituitosa vernali idem observavit Celeberr. STOLL *Rat. med. pars II.* p. 163.

## PLEURODINE VENEREA.

Est dolor thoracis a viru venereo.

1. *PLEURODINE A TOPHO COSTÆ vel STERNI.* Noscitur tumore topico & dolore fixo in costa vel sterno.

*Curatur ut tophus.*

2. *PLEURODINE A LUE LATENTE,* qui suspicatur ex acerbatione nocturna & mercurio cedit.

3. *PLEURODINE AB INDURATIONE GLANDULÆ THYMI.* Noscitur dolore obtuso & fixo sub sterno. *V. Dispnoea.*

## COLICA VENEREA.

Est dolor in intestinis vel abdomine, a viru venereo excitatus.

Hicce dolor quandoque *expansus*, ut plurimum autem *fixus* ac *chronicus* est.

1. *COLICA A GONORRHÆA SUPPRESSA vel BUBONE RESOLUTO.* Hicce dolor colicus ut plurimum indolis inflammatoriae est, hinc

*Curatio* exigit venæctionem, antiphlogistica, decoctum sarsaparillæ ac mercurium gummosum. \*)

\*) *Ill. L. B. de Störck. Annus med. secund. p. 225.*

2. *COLICA A LUE LATENTE.* Quando post impurum coitum non affectis genitalibus colica chronica, noctu exacerbata oritur, tunc suspicio hujus speciei adest. \*)

*Curatio* exigit mercurium gummosum cum saturato decocto sarsaparillæ.

### ARTHRITIS VENEREA.

Est artuum vehemens dolor, noctu maxime urgens, a viru venereo ortus.

Arthritis venerea potius medietatem, minus ut aliæ arthritidis species articulos ipsos vexat.

1. *ARTHRITIS A LUE UNIVERSALI*, quæ præsentibus aliis symptomatibus venereis ingruit, facile noscitur & si non valde inveterata est, facile mercurio gummoso curatur. \*\*)

2. *ARTHRITIS A LUE LATENTE.* Quæ diu resolutis bubonibus, ulcusculisve glandis exsiccatis sequi solet.

*Curatio* est eadem.

\*) Cel. SIEMERLING *Diss. de colica ejusque speciebus.* Göttingæ 1778. p. 33. & Clar. BERGER *Super chirurgia genuina indole allocutio.* Hamburgi.

\*\*) Cel. HERZOG *diss. de morbo articulari, speciatim venereo.* Helmst. 1768. inveteratum malum mercurio gummoso curatum.

## RHEUMATISMUS VENEREUS.

Est musculi unius vel plurium dolor a viru venereo.

Rheumatismus venereus ut plurimum topicus est ac noctu exasperatur.

*Curatio* mercurium gummosum cum decocto lignorum & sarsaparillæ ac balnea tepida exigit.

## ISCHIAS VENEREA.

Est dolor in regione ischiatica a viru venereo.

1. *ISCHIAS A BUBONE RESOLUTO.* Bis vidi a bubone evanescente dolorem circa articulum femoris & claudicationem supervenisse.

*Curatio* exigit mercurium gummosum, antimonium, sarsaparillam. \*)

\*) Duos vidi militum præfatos, quorum quilibet a bubone sine mercurialibus resoluto claudicabat & levi dolore ischiatico laborabat. Unum, qui a tribus mensibus ægrotabat, intra mensem fere mercurio gummoso & purgantibus integre sanavi. Alter, qui jam ultra 18 menses majori dolore ischiatico affectus erat, febre biliosa prehenditur, quæ metastasim ad locum affectum causavit, quam articulationis suppuratio, caries & mors sequebatur. Feminam denique vidi quæ a bubone resoluto jam ultra duos annos claudicabat, cæterum

**2. ISCHIAS A LUE LATENTE.** Ex anam-  
nefi & exacerbatione nocturna hæc species  
est ab aliis mali ischiatrici speciebus no-  
scenda.

*Curatio* est ut in priori specie instituenda. \*)

### DOLOR OSTEOCOPUS VENEREUS.

Est dolor in ipsis ossibus a viru venereo exci-  
tatus.

**1. DOLOR OSTEOCOPUS A LUE UNI-  
VERSALI.** Hic dolor est acerrimus , qua-  
si ossifragus , ac si ossa dissilirent , fron-  
tem , cervicem , scapulas , brachia & femora ,  
potissimum vero tibias occupat , adeo ut  
miseri ægrotantes mollissimis quamvis stra-

bene se habuit , ac sine omni dolore fuit. An hæc  
claudicatio a sola fibrarum muscularium contractili-  
tate remanente ?

\*) Cel. BAGLIVIUS dicit ; *libro 2. §. 2. p. 206* virum gravi  
ischia de laborantem nuperrime curabamus , iritis-  
que optimis præfidiis desperabamus de salute recupe-  
randa , cum vero par transennam nobis ægrotus sub-  
indicasset , se viginti abhinc annis , bubonibus galli-  
cis male affectum fuisse , statim suspicionem dedit ,  
ischia dem a fomite gallico pendere ; quapropter  
præscriptis decocto sarsaparillæ , antimonio crudo ,  
cortice nucum &c. paucis diebus interjectis , a  
gravi ischia de convaluit non sine adstantium stu-  
pore.

gulis tecti ignito tamen in furno ustulari  
fibi videantur. Nox ac lecti calor hos  
dolores auget, circa auroram remittunt.

*Curatio* exigit mercurium gummosum ac de-  
cocta antivenerea.

2. *DOLOR OSTEOCOPUS FIXUS.* Hic  
vel a topho aut carie aut osse mollito  
habet originem.

Noscitur horum morborum præsentia ac eo-  
rum ablatione curatur. *V. Tophus &*  
*Caries.*

## ANHELATIONES VENEREÆ.

### D Y S P N O E A V E N E R E A.

**E**st chronica respirandi difficultas a viru ve-  
nereo.

1. *DYSPIA A LUE LATENTE.* Rarissime dyspnœa symptoma luis universalis  
sæpius vero morbus venereus larvatus est.  
Quandoque hoc virus exostoses costarum  
procreat, aut Lympham pulmonalem in-  
spissando indurations & vomicas pul-  
monum producit.

*Curatio* exigit usum mercurii gummosi cum  
decoctis antivenereis solventibus.

2. *D Y S P N E A A V I T I O T R A C H E A E.* Hic morbus a trachea viru venereo erosa visus & exciso annulo cartilagineo curatus legitur. \*)

2. *D Y S P N E A A G L A N D U L A T H Y M O T U M I D A.* In multis cadaveribus syphiliticorum, qui dum viverent, dyspnœa laborabant, thymus infactus, tumescens & putridus inveniebatur. \*\*)

### T U S S I S V E N E R E A.

Est exspiratio sonora & convulsiva a viru venereo.

1. *T U S S I S A G O N O R R H A E A S U P P R E S S A.* Materia gonorrhœica ad laryngem deposita hanc tussim excitat.

*Curatio* exigit mercurium gummosum & revocationem gonorrhœæ.

2) *T U S S I S A L U E U N I V E R S A L I.* Noscitur symptomatum venereorum præsentia Quandoque hæc tussis *cruenta* est.

*Curatio* exigit mercurium gummosum cum decocto sarsaparillæ. Solutio spirituosa

\*) *Memoires de l'Acad. de chirurgie a Paris* Tom. I.  
p. 348.

\*\*) *Cel. LIEUTAUD historia anatomico-medica.* T. II. p. 91.  
& 92.

sublimati corrosivi in morbis venereis pe-  
ctus affidentibus est valde nocua.


### R A U C I T A S V E N E R E A.

Est vox aspera & obscura a viru venereo laryn-  
gem affiente.

1. *R A U C I T A S A B E X U L C E R A T I O N E  
L A R Y N G I S*, ut cadavera quandoque  
monstrabant.

*Curatio* exigit usum internum mercurii gum-  
mosi cum decocto sarsaparillæ.

2. *R A U C I T A S A L U E L A T E N T E*. Ho-  
minem diu scabie venerea, raucitate & tussi  
laborantem mercurio gummoso & cibis  
glaciatis a raucitate curatum vidi.



### P R O F L U V I A V E N E R E A.

#### P T Y A L I S M U S V E N E R E U S.

Est salivæ vel muci frequens exscreatus e fau-  
cibus.

1. *P T Y A L I S M U S A B U L C E R I B U S FAU-  
C I U M*. Hæc irritando nervos glandula-  
rum mucosarum & salivalium ptyalismum  
etiam sine dato mercurio causant.

*Curatio exigit sanationem ulcerum. V. Angina ulcerosa.*

### TENESMUS VENEREUS.

Est assidua alvum egerendi cupiditas cum pauca ejectione mucosa.

1. *TENESMUS GONORRHOCUS*, qui ab inflammatione glandulæ prostatæ oritur.  
De curatione vide inflammationem glandulæ prostatæ.

### PROCTORRHÆA VENEREA.

Est muci puriformis vel puris effluxus ex ano.

1. *PROCTORRHÆA AB ULCERE INTESTINI RECTI*, quod sœpe suppurationem glandulæ prostatæ sequitur.

*Curatio exigit injectionem solutionis sublimati.*

2. *PROCTORRHÆA NON ULCEROSEA.*  
Vidi juvenem condylomatibus ani laborantem, cui simul ex intestino recto mucus puriformis exstillabat. *Curabatur* eadem injectione.

### P Y U R I A V E N E R E A.

Est midus urinæ purulentæ a viru venereo ortum habens.


1. *PYURIA*

1. *PYURIA AB ULCERE VESICÆ.* Quando  
ulcus venereum vesicæ urinariæ cavum affi-  
cit, tunc hæc pyuria observatur.

*Curatio* exigit usum internum mercurii gum-  
mosi cum extracto myrrhæ aquoso.

2. *PYURIA GONORRHOICORUM.* Circā  
gonorrhææ finem filamenta mucosa vel  
puriformia in urina observari solent.

*Curatur* hæc species sua sponte.



## EMACIATIONES VENEREÆ.

### A T R O P H I A V E N E R E A.

E ST totius corporis contabescentia sine febre  
lenta.

1. *ATROPHIA GONORRHOICA* aut *LEU-*  
*CORRHOICA.* Quæ gonorrhæas chro-  
nicas virorum & leucorrhæas similes mu-  
lierum comitatur.

*Curatio* præter sanationem gonorrhææ vel  
leucorrhææ exigit stomachica & bonum  
viictum nutrientem.

2. *ATROPHIA AB INDURATIS GLANDU-*  
*LIS MESARAICIS.* Has glandulas  
non raro in scirrhos a viru venereo de-

generare & atrophiam inducere cadavera  
lue mortuorum docent. \*)

3. *ATROPHIA A LUE LATENTE.* Hanc speciem observavi in illis qui non integre a lue curati a mercurio abstinent. Nam dato mercurio gummoso & decocto sarsaparillæ brevi pinguiores evadebant.

### T A B E S V E N E R E A.

Est corporis contabescentia cum febre lenta, at fine tussi & puris anacatharsi.

#### 1. *TABES A DOLORIBUS NOCTURNIS.*

Sic arthritico, osteocopo dolore & agrypnia venerea laborantes brevi emaciari ac febricula hectica corripi solent.

*Curatio* mercurium gummosum & decoctum sarsaparillæ ac lichenis islandici cum lacte exigit.

2. *TABES AB ULCERE VENEREO*, ut ab exulceratione uteri, a vomica pulmonis vel alias visceris. Vomica venerea diu quandoque ægrotos emaciatione febrili consumit, ac demum necat.

*Curatio* eadem ac in priori specie indicatur, at raro succedit.

\*) *III. HALLERI de partium corporis humani fabrica & functionibus T. 1. p. 362.*

3. *TABES AB ULCERE IN MEDULLA OSSIUM*; hæc noscitur ex topho carioso vel carie interna ossis.

*Curatio* exigit loci affecti perforationem.

V. *Spina ventosa*.

4. *TABES AB INDURATIONE* seu *TUBERCULIS VENEREIS PULMONUM*. Hæc species simul dispnœam causat, & ut plurimum in mortem abit. V. *Dyspnœa*.

### P H T H I S I S V E N E R E A.

Est corporis contabescentia cum puris expectoratione, tussi & febre lenta.

1. *PHTHYSIS PULMONALIS*, quæ ex venereo pulmonum ulcere oritur, ac ex prægressâ dyspnœa & expectoratione viscidio-purulenta, morbos venereos sequente, noscitur.

Raro hæc species curatur, præsertim si morbus jam diu duravit.

*Curatio* tentetur mercurio gummoso, & decocto sarsaparillæ ac lichenis islandici \*) cum cortice peruviano, melle & laetè. *Cel. MORTON* æthiopem mineralem laudat.

2. *PHTHYSIS FAUCIUM*, est illa, quæ ex ulceribus fauces multum depauperatis oritur. *Noscitur* ex raucitate.

\*) *Cel. REISSE Diss. de lichene islandico. Erford. 1778.*

Quamvis pulmones in hac specie sani sint ,  
 ægrotus tamen purulenta excretione , ta-  
 be corporis ac febre lenta laborat. At  
 hæc species facilius quam prior curatur.  
*Curatio* exigit sanationem faucium , de qua  
 vide *angina ulcerosa*.

---

## DE LUE GRAVIDARUM.

**M**ULIERES leucorrhæa venerea laborantes con-  
 cipere & gravidas sub tempore graviditatis labo-  
 rante venerea contaminari posse expe-  
 rientia docuit.

In utroque casu virus venereum mediante san-  
 guine fœtui communicatur.

Gravidæ lue venerea laborantes facile abortiunt.  
 Abortus quandoque , non autem semper  
 luis signa habet.

Mercurius gummosus , prius instituta venæsectione  
 tuto gravidis , ut observavi , datur. \*) *Curat*  
 gravidam ac fœtum simul a lue.

---

\*) Cum mercurius moveat menstrua ac salivatio exhau-  
 riendo matrem , fœtui nutrimentum subtrahat , hinc  
 multorum consilium est , ut curatio luis in grida  
 differatur , donec partus sit finitus , ne mercurio  
 abortus procuretur. At miasma venereum omni  
 die magis & magis matrem atque fœtum infi-  
 cit , nec non sèpe putris fœtus abortum sine dato  
 mercurio procurat , hinc opinor gravidis mercu-

## DE LUE INFANTUM.

**I**NFANTES luem venereum vel jam in utero a matre venerea vel post partum a nutrice venerea contrahere possunt.

Hinc lues infantum vel *connata* vel post partum *aquisita* est.

1. *LUES, INFANTUM CONNATA.* Tales infantes nascuntur cum maculis cuprei coloris circa anum, perinæum, scrotum, vel vulvam, quandoque circa totum corpus. Hæ macule intra aliquot septimanas in superficialia, lardacea & serpentia ulcera abeunt. Non raro fauces & comissuræ labiorum simul eroduntur. Inde vox rauca, clamores nocturni, noctes insomnes, deglutitio difficilis, tabes, mors.

Quandoque bubones inquinales & in puellis fluor albus cum maculis venereis vel stolidi a partu vel paullo post apparent.

2. *LUES INFANTUM LATENS.* Quandoque infantes a matre venerea sine consuetis maculis venereis aut alio vitio venereo

---

rium guminosum esse dandum; experientia enim me docuit blandum hoc præparatum mercuriale feliciter ac sine abortu luem in gravidis curare. Salivatio autem & acria præparata mercuralia sine periculo in graviditate exhiberi nequeunt.

nascuntur ac per tres quatuorve septimanas sanissimi esse videntur; at hoc tempore elapsō palpebræ intumescere & humorem alboflavescensem copiose eructare solent, paulo post si non statim medela adhibetur, maculae venereæ genitalium apparent. Hinc lippitudo est primarium luis latentis signum in infantibus. V. *Lippitudo*.

Quandoque virus venereum latens, aliquot post annos ulcera faucium, vel tineam capitis, vel scrophulas, aut epilepsiam causat. V. *Morbos larvatos*.

Ex his ergo patet, primis a partu septimanis non semper dari signa certa, quibus infantem recens natum lue venerea esse contaminatum affirmare possimus. \*)

### 3. LUES INFANTUM POST PARTUM AQUISITA. Infantes a sana matre nati

\*) *Journal de Médecine*, T. 44. p. 207. Parisiis floret institutum, ex quo nutrices matribus, qui infantes suos lactare nolunt, commendantur. Maxima in hoc loco a chirurgis adhibetur cura, ne nutrices venereæ, aut infantes venerei in hanc domum recipiantur. Nihilominus tamen factum est, ut infans lue latente laborans nutrici sanæ traderetur, quo illa & alius infans, qui lue non erat contaminatus, corriperentur. V. GARDANE *Détail de la nouvelle direction du Bureau des Nourrices de Paris, &c.* 1775. p. 16.

at nutrice venerea lactati ulcera contrahunt in faucibus, ore, angulis labiorum, vox fit rauca, deglutitio impossibilis; corporis demum macies vitæ finem imponit.

**QUINTUPLEX METHODUS** luem venereum in infantibus curandi ab authoribus proponitur.

1. Per *exiguas frictiones mercuriales ipsi infanti applicatas*. At hac methodo infantes brevi hydropicos fieri & perire observatum fuit. \*)
2. Per *frictiones mercuriales matri venereæ, infantem lactanti, applicatas*. Etiam hac methodo vidi infantes lue mortuos.
3. Per *frictiones mercuriales sanæ nutrici applicatas*. Sanæ nutricis mammæ ab infante venereo mox infectæ paullo post lactationi ineptæ redduntur; ac raro pro venereo infante nutrix sana etiam magna data pecunia haberi potest.
4. Per *frictiones mercuriales capræ, in quodam loco rasæ, applicatas*. Talis lactatio est valde incommoda & capra brevi cum infante perit.
5. Per *aquilam albam vel aliud præparatum mercuriale, infanti vel nutrici interne da-*

\*) Cel. LEVRET *l'Art des Accouchemens. Paris. 1761.*

*tum.* Hæc præparata mercurialia infantibus vel dysenteriam vel ptyalismum lethalem inducunt.

*METHODUS MEA.* Ego matri venereæ, si infantem lactare valet, pilulas ex mercurio gummoso & decoctum saturatum sarsaparillæ præbeo; infanti autem simul quotidie mane ac vesperi cochleare caffaceum *syrupi mercurialis* ingerō.

Hac methodo plures infantes felicissime sanavi cum & fine lactatione materna vel nutricis.

Simul observatio me docuit, infantes jam intra uterum venereoſ, posſe mercurio gummoso gravidæ matri dato, jam intra uterum a lue venerea curari. \*)

\*) Pluribus feminis gravidis lue contaminatis sub graviditate mercurium gummosum exhibui ac vidi infantes sanissimos ab his esse enixos. Semel tamen vidi in nosocomio Viennensi S. MARCI, cum adhuc arti obstetriciæ in hoc loco ſtudarem, infantem, cuius anterior pars colli adeo tumidum fuit, ut capiti æquale eſſet, a matre venerea natum, quæ ſub tempore graviditatis magnam ſpiritus mercurialis copiam hauiſit; infans brevi poſt partum obiit. An mercurius ſalivam in fœtu movere non valens hunc tumorem produxit? Summopere doleo quod hunc tumorem in cadavere non cultro indagare potuerim. Sunt demum alii qui dubitant an mercurius gravidæ datus in fœtum penetret; at obſervavit

## DE LUE LATENTE.

**V**IRUS venererum quandoque diu sine omni excitato morbo in corpore latet.

Lues *latens* nullo signo se manifestat, & coitu tamen quandoque inficit. \*)

*Cel. LEVRET* l. c. p. 46. liquorem amnii in gravidis, quibus durante gravitate frictiones mercuriales applicantur, esse cinerei coloris & cuprum rubrum dealbare & §. 421. p. 73. dicit: meconium talis foetus etiam plumbeum habere colorem. Hinc patet mercurium ex matre grava in foetum transfire.

\*) *Cel. GOULARD*, *Oeuvres de Chirurgie*, T. II. p. 19. Hanc sententiam peculiari observatione comprobat. Femina exanthemate quodam cutaneo, papillarum formam praes se ferente & ulceribus in variis corporis regionibus laborabat. Cum maritum ante 15 annos bubones & ulcera venerea genitalium infestassent, suspicabatur GOULARD aliquid virus venerei hic subesse. Semel quoque usu mercurialium sanata erat uxor, cum vero maritus neutquam persuaderi posset, ut venenum in corpore latens remediis usitatis extingueret, denuo infecta supremum demum diem obiit. Maritus vero 25 annos postea vixit, nec ullum symptomata miasmatis latentis percepit. Hujus sententiae strenuus defensor quoque est *Cel. PRESSAVIN* vide *Traité des Maladies Vénériennes*, a Geneve 1773. ubi pag. 22. sequentem observationem adducit: on connoit une femme


Incertum est *tempus*, per quod virus venereum  
in corpore, donec in morbum erumpat,  
latere possit. \*)

---

mariée; on en reçoit du virus: son mari, qui la connoit habituellement, ne se plaint d'aucun accident, & en effet n'en éprouve aucun. On est tenté de croire cette femme saine; cependant elle porte dans son sang le virus, qu'elle a reçu de son mari, quoique ce dernier ne reprenne pas avec elle les accidents, qu'il lui a d'abord communiqué; elle n'est pas moins susceptible de les transmettre à tous ceux qui auroient un commerce avec elle. J'ai vu plusieurs jeunes gens dans pareil cas; ils ne pouvoient se persuader, que des symptômes très-caractérisés du virus vénérien eussent aucun rapport avec cette maladie; parceque, disoient-ils, ils savoient positivement, que la femme, avec laquelle ils avoient eu commerce, couchoit ordinairement avec son mari, & que ce mari ne se plaignoit, & n'avoit en effet aucun des accidents, dont ils étoient atteints.

\*) Vidi ego puellam nobilem a nutrice lactatam, quæ anno ætatis 13 dum menstruæ eruptio-  
nis conamina inciperent subito acerrimo fluore  
albo & pessimis capillitii ulceribus mercurio sana-  
tis affiebatur. Ut miasma morbillosum, variolo-  
sum & hydrophobicum du quandoque antequam  
in morbum erumpat in corpore latere potest, sic  
idem quoque de viru venereo observatur. III. ROSEN  
A ROSENSTEIN *Anweisung zur Kentnis und Cur  
der Kinderkrankheiten.* Götting. 1774. p. 652 & 671,

Si suspicio est virus venereum in corpore latere  
 ut in infantibus matre venerea natis, aut  
 nutrice venerea laetatis vel in adultis qui  
 quondam venereo morbo laborarunt, aut  
 si coitus sanæ apparentis personæ inficiat,  
 tunc illico mercurius gummosus cum  
 decocto sarsaparillæ & stipitum dulcamarae,  
 quæ virus venereum evolvere dicitur, \*)  
 est dandus.



## DE LUE LARVATA.

**V**IRUS venereum vel latens vel conspicuum  
 quandoque morbos in lue venerea non  
 confuetos producit. \*\*)

pluribus observatis id demonstrat. Puella biennis  
 a nutrice, quæ cibos, quos manducaverat, illi  
 porrigebat, infecta, modo post novem annos infec-  
 tionis effectus sentiebat. Duo porro infantes ger-  
 mani, a nutrice infecti, symptomata infectionis de-  
 dum ad annum trigesimum proiecti, experieban-  
 tur. Vixit infantem qui usque ad annum undeci-  
 mum perfecta fruebatur sanitate, quo autem tem-  
 pore infestatione variolarum feliciter peracta, huius  
 signa apparuere; a matre enim, quæ olim morbo  
 gallico laboraverat, fuit infectus. I. e. pag. 654. &  
 III. VAN SWIETEN *Comment.* T. v. p. 385.

\*) *III. SAUVAGES nosol. method.* T. II. p. 549.

\*\*) Vide egregiam *Diss. Cel. HAUSMANN de morbis vene-  
 reis larvatis.* *Göttingæ* 1778.

Morbi venerei *consueti* sunt gonorrhæa , ulcera genitalium & faucium , bubones , condylomata , phymofis , tophi , maculæ cuprei coloris , arthritis , cephalæa nocturna.

Morbi *non consueti* sunt febris venerea , tussis , colica , languor , paralyfis , epilepfia , tabes &c.

Nullus fere morbus est , quem virus venereum simulare nequeat.

*Noscuntur* hi morbi

1. Si homo adultus confiteatur se quondam gonorrhæa , vel ulcere glandis vel bube ne laborasse ; aut
2. Si ejus parens , mater , vel nutrix lue fuerunt contaminatæ.
3. Si morbus omnibus remediis consuetis reficitur.
4. Si morbus media nocte augeatur & circa auroram remittat. \*)
5. Si ab usu mercurii symptomata morbi mitigentur.

Omnia autem hæc signa *probabilia* , non vero penitus certa sunt ægroti morbum a viru venereo pendere.

*Curiatio* talis morbi suspecti exigit usum mercurii & alia remedia antivenerea.

---

\*) Hæc exacerbatio nocturna non auten in omnibus morbis venereis observatur ; id ego & alii observarunt. Vide BLOCHS *Bemerkungen*. p. 181.

DE LUE CUM ALIO MORBO  
COMPLICATA.

**L**UES venerea cum omni alio morbo complicata inveniri potest.

Talis complicatio quandoque diagnosim & curationem utriusque morbi confundit, difficioremque reddit.

Frequentissima luis complicatio est

i. Cum *scorbuto*. Si scorbuticus simul venereus est, tunc difficillima est luis curatio, quia mercurius in scorbuticis veneni adinstar agit. \*) Hinc

*Curatio scorbutio - venereorum* exigit ut ab

\*) Noxium scorbuticis esse mercurii usum observationibus docuit *Cel. GRAINGER* qui ab unica drachma unguenti mercurialis militi siphylitico-venereo inuncta salivationem sanguineam, dentium intumescentiam & gingivarum putridissimarum exsificationem cum animi deliquiis & ingenti debilitate vidit. V. *Historia febris anomala, Batavæ.* p. 6. *in monitis siphyliticis.* *Cel. KRAMER* medicus castrensis dicit 400 milites scorbuticos mercurii usu misserrime perisse. *Cel. GOULARD* duos milites scorbuticos in cubiculum, in quo venerei cuidam mercurio curabantur, locatos, a sola atmosphæra salvantium in capitis intumescentiam, ingentem salivationem & pessima oris ulcera incidisse observavit. Nullus vero authorum evidentius effectum de-

initio remedia antiscorbutica dentur, dein mercurius gummosus sensim medicamentis antiscorbuticis addi debet. Infusum mali cum succo nasturtii, cochleariæ vel beccabungæ præ omnibus congruum est.

*Contractura genuum*, quæ usum mercurii in occulte scorbuticis quandoque sequitur iisdem remediis antiscorbuticis egregie curatur.

2. Cum *scrophulis*. Venereo-scrophulosis mercurius tuto dari potest. Pilulæ ex sublimato & æthiops mineralis a multis contra scrophulas eximie laudantur.
3. Cum *lepra*. De hac complicatione vide *lepram venereum*.
4. Cum *morbo acuto*. Si febris inflammatoria, biliosa vel putrida venereum prehendat, tunc ille raro evadit. *Curatio autem ad morbum acutum est dirigenda.*

Lues venerea non, ut quidam voluere, a *peste* præservat. \*)

---

leterium, quem inunctiones mercuriales in scorbuticis vel scorbutico-venereis edunt, expertus est, quam doctissimus chirurgus castrensis HEMPEL vide *Erfahrung und Wahrnehmungen vom Schaarbocke* 1778. pag. 26. qui ab usu mercurii buccas gangræna consumptus & mortem exinde secutam vidit.

\*) Cel. CAROL. DE MERTENS *Observat. Medicæ de febribus putridis & peste. Vindobonæ* 1778. pag. 182.

5. Cum *morbis a nimia venere*. Hi non raro lue affectos comitantur. Ab immoderata seminis profusione oritur lassitudo, encephali dolores, epilepsia, fatuitas sensuum omnium, vel maxime visus hebetudo, amaurosis, tabes dorsalis & pulmonica, febricula hectica, pollutio gonorrhœica præsertim nocturna.

Noscuntur hi morbi ex ægroti relatione, ex symptomatibus luem præcedentibus, ex atonia scroti, &c.

*Curatio* præter exiguum mercurii gummosi dosim exigit

1. *Abstinentiam a coitu & pollutione.*
2. *Vidum ex nutrimentis facillime digerendis ut ex oriza, gelatinis, laſte, præfer- tim autem lichen islandicus prodeſt.*
3. *Potum ex hordeo & sarsaparilla cum laſte.*
4. *Aerem ruralem.*
5. *Corticem peruvianum cum marte, tintura cinamomi & amaris stomachicis, si febri- cula hectica his non contradicat.*
6. *Balnea frigida, quæ efficacissime corpus enervatum roborant.*
6. Cum *morbis a mercurio inductis*. Effectus a dato mercurio, bene ab effectibus, a virū venereo causatis, distingui debent, ne incautus, morbos mercuriales pro venereis

aspiciens, augendo mercurii dosim ægrotum pessumdet.

Effectus generales mercurii, nimia dosi dati, sunt

1. *Sanguinis motus velocior*, adeo ut pulsuum numerus ad 120 & 130 quandoque increscat.
2. *Rarefactio sanguinis*, inde plethora spuria & febis inflammatoria ab initio curationis mercurialis sæpe observatur.
3. *Resolutio sanguinis putrida*. Inde protracta cura febris quandoque putrido-biliofa cum hæmorrhagiis & mors; aut *scorbutus* cum genuum lassitudine ac gingivis cruentis; inde oris, urinæ ac sudoris fœtor; inde salivatio cruenta.
4. *Ptyalismus immoderatus*. Inde corpus exhaustum, debile, omnibus in articulis quandoque contractum. Inde cynanche in faucibus cum pessimis ulceribus circa officia ductuum salivalium in interna buccarum superficie ac sub lingua. Inde suffocatio salivantium ac mors. Quandoque contractura maxillarum & buccarum concretio cum gingivis superata salivatione remanet.
5. *Depositio mercurii* in varia loca, præcipue autem in ossa. Inde dolores rheumatici,

ci, aut osteocopi, tremor, hæmoptoe, languor, anevrismata, epilepsia, & alia mala chronica.

Ex his patet morbos mercuriales in inflammatoryos, putridos & chronicos posse dividi.

*Morbi inflammatorii*, ut febris & cynanche inflammatorya exigit

1. *Abstinentiam ab omni mercurio*
2. *Venæfæctionem*
3. *Purgationem antiphlogisticam, eccoproticam*
4. *Emulsionem nitrofam*
5. *Decoctum hordei cum nitro & gummi arabico.*

*Morbi putridi* ut febris putrida, ulcera oris fœtentia & scorbutus mercurialis exigunt.

1. *Infusum malti hordeacei cum succis antiscorbuticis.*
2. *Corticem peruvianum.*
3. *Vičum vegetabilem.*

*Morbi chronicci* a mercurio in corpore relieto, ut contractura ligamentorum, rheumatismi, tremor muscularum curantur, si remediis antiscorbuticis simul jungantur.

1. *Balnea tepida etiam quinquagies repetita.* \*)

\*) Qui Idriæ fodinis mercurialibus operam navant, citissime ptyalisimo corripiuntur; si vero saliva fluere non

2. *Sudorifera* ut dococatum *ennulæ*, aut *imperatoriæ*, essentiam *pimpinellæ* at præcipue *antimonium*. \*\*)

---

incipit, tunc illico tremoribus totum corpus oberrantibus afficiuntur. Balnea, sudorifera & purgantia sola sunt adminicula, quibus hi sanitati restituuntur. In balneorum etiam diu usitatorum fundo semper inventur mercurius vivus. Etiam in illorum balneis, qui tremoribus a nimium ingurgitatis præparationibus mercurialibus salinis correpti fuere, mercurium vivum fuisse inventum dicitur. Videmus porro dicit *Cel. Prof. ADOLPH MURRAY* senes, pueros & frigidoris naturæ homines ut & feminas tremoribus corripi; illos autem qui calidioris sunt sanguinis ideoque faciliter globulos mercuriales subigere possunt, ptyalismo potius prehendi. V. *Cel. DUBB Diss. cit.* pag. 9.

\*\*) Miles a longo tempore jam venereus & multiplici mercurii usu nunc extenuatus, valde arthriticus, in naso aliisque locis ulcerosus, ab omni dato mercurio deterius se habuit: præscribuntur misero huic ab *Illustri nostræ facultatis Directore Celeberrimo DE VEZA* antimonii crudi grana viij cum 3j sacchari quotidie sumenda, augebatur antimonii dosis sensim ad 3ij de die. Pro potu dabatur decoctum lignorum. Ægrotus intra aliquot dies vehementi corripitur diarrhæa, reliquis diebus vehementer quotidie sudabat, arthritis penitus remisit, ulcera, pulvere flamulæ jovis conspersa, bonum concepient pus, officula nasi cariosa exfoliantur, ægrotus intra aliquot septimanæ totus restituitur.

3. Quandoque purgantia.
4. Lac & in emaciatis diætam lacream.

DE LUIS VENEREÆ PRO-  
PHYLAXI.

**R**EMEDIUM , quod impediret , ne vir sanus cum femina fluore albo vel ulcere , vaginæ laborante coiens , viru venereo inficiatur , aut infectus illico iterum a viru liberetur , nondum innotescit. \*)

**LAVATURA** membra , statim a celebrato coitu instituta , quandoque prodeesse potest , si miasma venereum lacunas urethræ nondum penetravit. Cito autem ut plurimum miasma poris harum lacunarum absorberi solet.

**INUNCTIO MEMBRI** ante coitum cum oleo vel linimento mercuriali , aut applicata ad penem pellicula in formam vaginæ efficta , ( *Condons* ) aliæque nefandæ artes virus non arcent , ut in ægrotis observavi.

**INJECTIO LIXIVII SAPONARIORUM**  
\*\*) aut *succi citri* aqua diluti & statim a coitu finito applicata , aliave a va-

\*) Ill. ASTRUC , *Libr. de morb. venereis* Cap. II. §. II.


\*\*) Cel. KERN *Diss. de infalibili remedio prophylactico si-  
phylos.* Friburg. 1777.

riis authoribus ebuccinata remedia, ut experientia docuit, successu caruere. \*)

Plus adhuc a solutione dilutissima mercurii *sublimati corrosivi*, aut *mercurii gummosi* late diluti, ut lavacrum & injectio adhibita, sperandum est; quamvis id pluribus ac directis experimentis experiendum adhuc restet.

Hinc abstinentia a *bono* venereo est unica adhuc prophylaxis a *malo* venereo.

\*) Cel. GALL *Diss. sistens criticen prophylaxeos siphylidis. Friburgi 1777.* de omnibus remediis prophylacticis ex professo & docte differit. Novum Celeber-rimi PEYRILLHE remedium, nempe alcali volatile, quod ad luem curandam laudatur, pessime semel cessisse vidi. Idem expertus est Cel. A MURRAY qui dosim a Cel. PEYRILLHE praescriptam in gonorrhæa virulenta & jam inveterata adhibuit. Sensit exinde æger ardorem urinæ vehementissimum & lotium ipsum sanguine mixtum fuit. Dedit igitur simul largam decoctorum mucilaginosorum copiam, verum in sequente die, gonorrhæa suppressa erat & testiculus sinister inflammatus. Alio tempore ju-veni, ulceribus venereis vehementer foedato, idem remedium cautius tamen præscripsit; ulcera vero dolore aucto inflammari incipiebant, & ægrotus de tanta inquietudine querebatur, ut a remedio hoc abstinere coactus fuerit. V. Cel. DUBB *Diss. cit.* p. 5.



FORMULÆ REMEDIORUM IN HOC  
OPUSCULO LAUDATORUM.

F O R M U L Æ I N T E R N Æ.

SOLUTIO MERCURII GUMMOSI.

**R.** MERCURII vivi depuratissimi ʒj.

Gummi arabici pulverisati ʒij

Syrupi cichorei cum rheo. q. s.

Conterantur in mortario vitreo, sensim adfundendo aliquantum syrupi, donec mercurius omnis abiit in mucum. His satis subactis addantur sensim conterendo.

Aquæ rosarum ʒxij

Detur in ampullam vitream. S. mane ac vesperi duo cochlearia lignea mensualia assumentur.

**U**sus. *Hæc solutio in omnibus morbis venereis primarium remedium internum est, quod cito, tuto ac jucunde miasma venereum delet. Raro salivam movet, si omni decimo die pilulæ purgantes vel pulvis purgans exhibatur. Solutio ex cochleari ligneo assumi debet, cochleari enim argenteo vel metallico mercurius adhæret. Quibus saliva moveri*

*incipit, hi assumant purgans & aliquot dies a solutione abstineant.*

### PILULÆ EX MERCURIO GUMMOSO.

℞. Mercurii vivi depuratissimi ʒj  
Gummi arabici pulverisati ʒiij  
Syrupi cichorei cum rheo. q. s.

Conterantur bene in mortario marmoreo ,vel vitreo, donec mercurius omnis in mucum abiit, huic adde

Micæ panis albissimi ʒſ

Subigantur bene in massam pilularem. Fiant pilulæ gr. iij. conspergantur pulvere liquoritiæ. D. S. mane ac vesperi affuman- tur pilulæ x.

U s u s. *Commodior harum pilularum, quam solutionis assumptio est, hinc ab aliquot jam annis frequentissime his pilulis magno cum effectu utor.*

### SYRUPUS MERCURIALIS.

℞. Mercurii vivi depuratissimi. Ǝj  
Gummi arabici pulverisati. Ǝiij.  
Syrupi cichorei c. rheo. q. s.

m. conterantur in mortario vitreo donec mercurius abiit in mucum ; adde insuper con- terendo

Syrupi cichorei c. rheo. ʒſ.

m. d. u. S. mane ac vesperi detur infantibus cochleare parvum ligneum, dosis sensim augatur.

**U**sus. *Infantibus venereis hicce syrpus commodissime adhibetur.*

### PILULÆ PURGANTES ORDINARIÆ.

**N**. Massæ pilularum Ruffi. 3*ʒ*  
resinæ jalapæ  
aquilæ albæ aa gr. iv.

m. f. pil. gr. iij. S. assūnantur pro una dosi.

**U**sus. *His pilulis omni decimo die alvum moveo illis, qui mercurio utuntur; hæ pilulæ septies vel sœpius alvum facile & certo movent, millenis ægrotis præscriptæ hypercatharsin non causarunt.*

### SOLUTIO SUBLIMATI SPIRITUOSA.

**N**. Mercurii sublim. corrosivi. gr. vij.

Spiritus frumenti 1*lbj.*

In phiala vitrea stet in digestione, filtretur, & ad usum servetur. S. mane ac vesperi assumatur cochleare unum.

**U**sus. *Si mercurius gummosus morbum venereum non curet, tentari potest sublimatus corrosivus; laudatur imprimis in morbis venereis cutis & ossium. Ingratus metallicus sapor admixto syrupo quodam aromatico aliquantum corrigi potest. Paulo post assumptionem larga co-*

*pia decocti altheæ cum hordeo desuper hauriri debet, ne tormina vel cardialgia excitentur.*

### SOLUTIO SUBLIMATI AQUOSA.

**R.** Mercurii sublimati corrosivi. gr. vij.

Aqua menthæ. ℥vj.

Syrupi papaveris albi. ʒj

Solvæ exactissime. S. mane ac vesperi assumatur cochleare unum.

**Usus.** *Aquosa solutio saporem gratiorem, quam spirituosa habet, ab illis, qui spiritum frumenti mercuriale ob ingratisimum saporem metallicum assumere nequeunt, ut mulieres, delicatuli ac infantes, facilius fertur.*

### PILULÆ EX SUBLIMATO CORROSIVO.

**R.** Mercurii sublim. corros. gr. xv.

Solv. in aqua destillata ʒvj. decantato liquori adde

Micæ panis albissimi. ʒiiij.

m. f. pil. 120 S. mane ac vesperi assumantur pilulæ dux.

**Usus.** *Hac forma mercurius sublimatus facilius ac tutius in majori quantitate assumi atque a ventriculo ferri potest, quam in solutione aquosa. Pilulæ enim sensim solutæ non subito ac insimul, ut hausta solutio, ventriculum afficere dicitur. Una pilula  $\frac{1}{3}$  grani ex sublimato continet.*

## D E C O C T U M A L T H E Æ.

℞. Radicis althææ ȝij  
 Fol. malvæ  
 Flor. papav. rhœados aa M ȝ.  
 coque in s. q. aquæ per horæ quadrantem, de-  
 tur col. ȝij.

S. Omni bihorio cum syrupo diacodii vel  
 saccharo hauriantur vascula duo.

U S U S. *In gonorrhææ & aliorum morborum sta-*  
*dio inflammatorio conducit.*

PULVIS ECCOPROTICUS AD GONOR-  
R H Æ A M.

℞. Rhei electi  
 Salis mirabilis  
 Cremoris tartari aa ȝij.  
 m. f. pulv. dividatur in jx doses æquales. S. omni  
 trihorio de die assumatur unus.

U S U S *Compescit urethræ ardorem & pus gonor-*  
*rhoicum intra aliquot septimanas reddit*  
*lymphaticum.*

E L E C T U A R I U M B A L S A M I C U M  
A D G O N O R R H Æ A M.

℞. Rhei electi  
 Salis mirabilis  
 Cremoris tartari aa ȝij  
 Balsami copaivæ cum saccharo bene subadti. ȝȝ.  
 Electuarii lenitivi. q. t.

m. f. ele&t. S. quater de die assumatur drachma  
semis.

U S U S. *Cessante urinæ ardore ac effluvio jam lymphatico existente, morbum brevi curat, si non nimis magna ade&t laxitas urethræ.*

### ELECTUARIUM ROBORANS AD GONORRHÆAM.

**N.** Cort. Winterani

— peruviani aa 3ij

— aurant.

— cinamomi

Extract. martis pomati aa 3ij

Syrup. cort. aurantiorum. q. s.

m. f. ele&tuar. S. quater de die assumatur drachma una.

U S U S *in lucorrhæa & in lymphatico gonorrhææ studio, si morbus incipiat chronicus fieri ac ægrotum emaciæ, conduceit.*

### V I N U M R O B O R A N S.

**N.** Limaturæ martis non rubiginos.

Cort. peruviani

— cinamomi.

— Winterani aa 3ij

m. f. pulv. cui affunde vini generosi austriaci 3ij.  
relinque in leni digestione per 24. horas,  
dein colaturam per inclinationem exhibe.

m. S. detur ter de die cochleare unum,  
sensim augendo dosin.

*Usus est ut electuarii roborantis, nempe gonorrhæam ac fluorem album non amplius venereum curat.*

### DECOCTUM LIGNI GUAJACI.

- ℞. Rasuræ ligni guajaci, ʒij  
Coq. in aquæ font. ℥viij  
ad remanent. ℥vij  
m. d. S. hauriantur quotidie ℥vij

*Usus. Ante mercurii usum in lue venerea inventum, unicum in hoc morbo majoribus nostris fuit remedium. Convenit subiectis phlegmaticis. Sunt qui addunt decocto huic argenti vivi & antimonii crudi in sacculo singulum ligati ʒj & vocant decoctum ligni guajaci compositum.*

### DECOCTUM LIGNORUM ANTIMONIALE.

- ℞. Rad. sarsaparillæ  
Santali albi & rubri aa ʒjj.  
Rad. glycyrrh.  
Cort. mezeræi aa ʒii.  
Ligni rhodii  
— guajaci  
— sassafras. aa ʒj  
Antimonii crudi. ʒij  
m. & infund. cum aqua font. ebull. ℥ x per horas 24. dein coqu. ad ℥ v. Collaturæ capiat æger ℥vj sensim augendo dosim ad ℥ v.

**U**sus. *Hoc decoctum Lisbonæ inter medicos familiare est quo morbos post ptyalismum & usum mercurii liberaliorem residuos tollunt. Vid. Ill. MURRAY apparatus medicament. vol. I. pag. 338.*

### DECOCTUM SARSAPARILLÆ.

b. Radicis Sarsaparillæ  $\frac{3}{4}$ ij.  
Coq. in aquæ font.  $\frac{1}{2}$ ij. ad remanentiam  $\frac{1}{2}$ ij

d. S. Hauriantur quotidie libræ duæ.

**U**sus. *Optimum diluens & mundificans in lue venerea est. Convenit præcipue subje $\tilde{\text{e}}$ is calidis, sanguineis.*

### DECOCTUM SARSAPARILLÆ COMPOSITUM.

b. Radic. sarsaparillæ.  $\frac{3}{4}$ ij  
Cort. mezeræi.  $\frac{3}{4}$ lb  
coq. in aquæ fontanæ  $\frac{1}{2}$ ij ad remanentiam unc. xxx. adde solutionis aquosæ sublimati.  $\frac{3}{4}$ j

m. d. S. Hauriantur quotidie per 30 dies  $\frac{1}{2}$ ij

**U**sus in lue inveterata cutis ac ossium magni usus esse laudatur. *V. Samml. zum gebrauch praktischer Aertzte 2. St. 85. S.*

### DECOCTUM CORTICIS MEZERÆI.

b. Corticis e radice mezeræi recentis  $\frac{3}{4}$ lb  
Coquatur in aquæ fontanæ  $\frac{1}{2}$ lb vj  
ad remanentiam  $\frac{1}{2}$ iv

Sub finem adde radicis liquiritiae 3j.

Collatura detur. S. Hujus decocti. Iib⁹ bibat  
xger quater in die.

**Usus.** *Laudatur in tophis, nodis venereis, doloribus osteocopis nocturnis, ac tumoribus venereis articulationum.*

### DECOCTUM STIPITUM DULCAMARÆ.

**R.** Stipitum dulcamaræ recent. 3lb  
Aqua fontanæ 3vj.

Coquantur ad uncias xi. S. ter de die bibantur  
cum lacte 3ij.

**Usus** in exostosi, herpete, arthritide venerea  
valde laudatur. *V. Journal de Médecine,*  
*T. 22 p. 236.*

### FORMULÆ EXTERNÆ

#### SOLUTIO SUBLIMATI PRO USU EXTERNO.

**R.** **M**ERCURII sublimati corrosivi. gr. j*g*.

Gummi arabici 3j.

Aqua fontanæ. Ibj

Solvantur conterendo exakte in mortario vitro  
vel marmoreo.

**Usus.** *Inservit hæc solutio pro injectione in gonorrhœa & fluore albo. In ipsa ophthalmia gonorrhœica hac solutione oculos*

*elui curabam; plus autem sublimati quam gr. j*ss* in libra aquæ nec oculus, nec urethra tulit. Cum mellis 3*j* mixta ulceribus loco aquæ vulnerariæ ac faucibus ulcerosis forma gargarismatis applicatur. Bubones, tophi, phymosis, ac alii tumores venerei forma fomenti hac solutione tegantur.*

### SOLUTIO SUBLIMATI BALSAMICA.

**R.** Effentiæ mastichinæ 3*ij*  
Mercurii subl. corrosivi. gr. vi.  
misce conterendo.

**U**sus. *Sordida, inveterata, cancrefientia & cariosæ ulcera venerea sanat, si fauces talibus afficiantur ulceribus, tunc hæc ope penicilli bis vel ter de die hac solutione tangantur.*

### AQUA CAUSTICA PRO CONDYLOMATIBUS.

**R.** Spiritus vini rectificati  
Aceti destillati aa 3*ijss*  
Mercurii subl. corros. 3*j*.  
Aluminis crudi  
Camphoræ

Cerussæ. aa 3*ss*  
**m.** solv. d. u.

**U**sus *Condylomata ope penicilli hac aqua bis de die illiniantur & dein linimento mercu-*

riali tegantur. *Condylomata sic brevi ac sensim evanescunt; cutis sana, condylomatibus intermedia, ab hac aqua non exulceratur.*

### L A C M E R C U R I A L E.

- R.** Mercurii vivi depuratissimi ʒj  
Gummi arabici pulverisat. ʒβ  
Syrupi diacodii q. s.  
**m.** conterantur in mortario marmoreo sensim addendo syrupum donec omnia abeant in mucum, cui sensim adde laetis ebullientis vaccini ʒvij.  
**m.** d. usui

**U**sus. *In ophthalmia gonorrhœica ope vasculi balneatorii & in phymosi venerea, forma peniluvii applicetur. Idem Lac in angina venerea dolorosa sub forma gargarismatis optimo cum successu adhibetur.*

### B A L S A M U S M E R C U R I A L I S.

- R.** Unguenti basiliconis ʒjβ  
Mercurii præcipitati rubri. ʒij.  
misceantur exactissime.

**U**sus. *Ad ulcera venerea consolidanda ad topbos aut scirrhos venereos resolvendos, adhibetur. Eodem cum affetu loco mercurii præcipitati rubri, mercurium dul-*

*cem, vel mercurium præcipitatum album  
cum balsamo quodam mixtum abhibui.*

### BALSAMUS OPHTHALMICUS RUBER.

℞. Butyri recentis insulsi. ʒij  
Ceræ albæ ʒr. liquefactis adde  
Mercurii præcipitati rubri ʒijr.  
Tutiæ præparatæ ʒj  
Camphoræ in oleo ovorum ʒr solutæ gr. xlv.  
m. f. unguent. S. ter de die lentis magnitudo  
illiniatur oculo.

Usus. *Corneæ maculas, ulcera & obscuratio-  
nes, nec non lippitudinem ac reliquos  
oculorum morbos venereos, chronicos,  
egregie curat.*

### UNGUENTUM RESOLVENS AD BUBONES.

℞. Unguenti de arthanita  
--- neapolitani. aa ʒj.  
Pulv. rad. mandragoræ. ʒjr  
Mellis communis. q. s.  
m. f. lenimentum.

Usus. *Ad bubones induratos resolvendos lau-  
datur. Inungatur bubo mane ac vesperi  
& dein tegatur hocce unguento.*



